

NOROGA GIRKU  
DAVVISÁMI LITURGIJAGIRJI

NORDSAMISK LITURGIBOK  
FOR DEN NORSKE KIRKE

Sámi Girkoráđđi – Samisk kirkeråd

## SISDOALLU (INNHold)

- Allameassu (høymesse 1977) s 7
- Kollektarohkosat (kollektbønner 1977) s 47
- Bearašipmilbálvalus (familiegudstjeneste 1977) s 64
- Rihppadovddastusipmilbálvalus (skriftemålgudstjeneste 1977) s 77
- Ovddasrohkosipmilbálvalus (forbønngudstjeneste 1977) s 89
- Idedislávlumat (morgensang 1977) s 101
- Eahkedislávlumat (aftensang 1977) s 111
- Eahketrohkos (kveldsbønn 1977) s 117
- Mánáidgásta (barnedåp 1977) s 123
- Gásta ruovttus (hjemmedåp 2007) s 133
- Rávvasiidgásta (dåp av voksne 1977) s 140
- Heahtegásta (nøddåp 1977) s 147
- Risttašeapmi (stadfestelse av dåp 1977) s 152
- Ovttaskasaid rihppadovddastus (enkeltskriftemål 1977) s 166
- Vihaheapmi (vigsel 2003) s 171
- Ovddasrohkos boargárlaš náitalan náittusdili ovddas (forbønn for borgerlig inngått ekteskap 2003) s 184
- Hávdádeapmi (gravferd 2002) s 202
- Rohkos gisttu guoras (båreandakt 1977) s 231
- Ruovttu buressivdnideapmi (velsignelse av hus og hjem 2007) s 236

## Ovdasátni

Sámi girkoráđđi nammadii Davvisámi liturgiijalávdegotti jagis 1994 gerget barggu heivehit Norgga girku 1977-liturgiijaid davvisámegillii. Lávdegoddi oaččui čuovvovaš mandáhta: “Sámi ipmilbálvalusárbevierru ja Norgga girku liturgalaš ortnegat adnojit vuodđun bargui, ja sámeigiella, musihkkaarbevierru ja kultuvra.”

Davvisámi liturgiijalávdegoddi lea jorgalan moanat dárogiel 1977-liturgiijaid, ja dasto maid hávdádanliturgiija mearriduvvon jagis 2002 ja vihahanliturgiija mearriduvvon jagis 2003. Lávdegoddi lea maid ovdánahtán liturgalaš ”Gásta ruovttus” ja ”Ruovttu buressivdnideapmi” ortnegiid. Sámi girkoráđđi ja Girkoráđđi mearridedje jagis 2007 dohkkehit buot dáid sámeigiellit liturgiijaid Norgga girku geavaheapmái.

Buot namahuvvon liturgiijat leat mielde dan odđa liturgiijagirjjiis, earret muhtun liturgiijaid mat gullet eaŋkilbeivviide dahje eaŋkildaguide girkojagis. Dat maŋimuš liturgiijat biddjojit dušše internehtti.

Leat deattuhan ovdandivvut liturgalaš musihka mii áimmahuššá sámi nuohtadovddu ja mii doaibmá bures sámi teavsttain. Dan suorggis ovddasta liturgiijagirji fuomášuhtti odasteaddji barggu dárui 1977-liturgiijaid ektui. Halvdan Nedrejord lea ráhkadan buot dan odđa nuohtamateriála, earret dan musihka maid Frode Fjellheim lea dahkan bearašipmilbálvalusliturgiijai.

Sámi girkoráđđi hálida giitit buohkaid geat leat leamaš mielde dán deatalaš barggus. Rohkadallot dáid liturgiijaid ovddas, ahte dat šattaše buressivdnádussan sámi ipmilbálvaluseallimii boahhtevaš jagiid.

Sámi girkoráđđi

Oslo, čakčamánu 2010

## Forord

I 1994 ble Nordsamisk liturgiutvalg opprettet av Samisk kirkeråd for å fullføre arbeidet med å tilpasse Den norske kirkes 1977-liturgier til nordsamisk. Utvalget ble gitt følgende mandat: ”Den samiske gudstjenestetradisjon og de liturgiske ordninger for Den norske kirke legges til grunn for arbeidet, og det legges vekt på samisk språk, musikktradisjon og kultur.”

Nordsamisk liturgiutvalg har oversatt et stort utvalg av de norske 1977-liturgiene, samt gravferdsliturgien av 2002 og vigselsliturgien av 2003. Utvalget har også laget liturgiske ordninger for ”Hjemmedåp” og ”Velsignelse av hus og hjem”. Disse samiske liturgiene er godkjent for bruk i Den norske kirke ved vedtak i Samisk kirkeråd og Kirkerådet i 2007.

Alle nevnte liturgier er med i denne liturgiboka, med unntak av noen liturgier knyttet til enkeltdager eller enkelthandlinger i kirkeåret. De siste legges kun ut på internett.

Det har vært vektlagt å frembringe liturgisk musikk som ivaretar samisk tonefølelse og som fungerer godt sammen med den samiske teksten. På dette feltet representerer denne liturgiboka et betydelig nyskapsarbeid i forhold til de norske 1977-liturgiene. Med unntak av musikken til familiegudstjenesteliturgien, som er komponert av Frode Fjellheim, er alt nytt melodimateriale komponert av Halvdan Nedrejord.

Samisk kirkeråd vil takke alle som har bidratt i dette viktige arbeidet. La oss be om at disse liturgiene måtte bli til velsignelse for samisk gudstjenesteliv i årene som kommer.

Samisk kirkeråd

Oslo, september 2010

## Girjji geavaheami birra

Girjji bagadallanoasis leat *Dábálaš mearrádušat* biddjon kapihttaliid álgui. Juohke ortnegii leat daguid *gohččumat* biddjon ovdalii ortnega iežas teavstta ja eanžil lađđasiid gohččumat leat fas *rubrihkan* ortnegis.

Muhtin ortnegiid lađđasiin leat geavahan árbevirolaš latiinna namahusaid. Dat nuppesmuitaluvojit sámegeiŋnamain.

[ ] adno dain lađđasiin dahje osiin maid sáhtta váldit eret dihto eavttuid mielde.

+ čájeha dárbbášlaš lađđasiid ortnegiin main lea stuora válljenfriddjavuohta.

*Kursiivačála* mearkkaša ahte liturgiija galgá heivehuvvot sániide dan áigequovdilis dilis dasa mii guoská loguide, omd.

son/su/sutnje/soai/sudno/sudnuide/dat/sii/sin/sidjiide jna.

## Om bruken av boken

Veiledningsdelen av boken er ordnet slik at til vanlig kommer *Alminnelige bestemmelser* først i kapitlene. Under de enkelte ordninger gjengis *instruksjoner* til handlingen foran teksten til selve ordningen og instruksjoner til de enkelte ledd som *rubrikker* inne i ordningen.

Ved enkelte ledd i ordningene er de tradisjonelle latinske betegnelser tatt med. De gjengis etter det samiske navnet.

[ ] brukes ved ledd eller momenter som kan utgå på nærmere angitte betingelser.

+ merkerer nødvendige ledd i ordninger med stor valgfrihet.

*Kursivering* betyr at liturgen skal tilpasseordene til den aktuelle situasjonen med hensyn til tall, f.eks. “son” (han/hun), “su” (ham/henne/hans/hennes) “sutnje” (til ham/henne), “soai” (de to), “sudnuide” (til de to), “dat”, “sii” (de), “sin” (dem/deres) “sidjiide” (til dem) osv.

## Teavsttas leat čuovvovaš mearkkat. Følgende tegn forekommer i teksten.

*L* = Liturga / Liturg

*S* = Searvegoddi / Menighet

*B* = Báhppa / Prest

*O* = Ovdalávlu(t) / Forsanger(e)

*T* = Teakstalohkki / Tekstleser

*Buo* = Buohkat / Alle

† go ruossamearkka atná / ved bruk av korstegnet

# ALLAMEASSU

1. Biibbalaš sálmma sáhtta atnit čuovvovaš sajiin allameassus:

- 1. lađasin **Álggahansálbma**
- 7. lađasin **Allameassusálbma**
- 18. lađđasis **Eahkedismállásat**

Biibbalaš sálbma adnojuvvo dušše ovttá sajis allameassus.

2. Searvegottiin gos rihppadovddastusa illá sáhtta bidjat ovdal ipmilbálvalusa, sáhtta biibbalsálbma boahit 2. lađđasa **Suttudovddastus** sadjái. Rihppadovddastus sáhtta maiddá boahit 15. lađđasa maŋŋil ovdalis **Eahkedismállásat**. Rihppadovddastus ipmilbálvalus ortnegis: 2, 4 ja 7-9. Rihppadovddastusa maŋŋil joatká dalle 3. lađđasiin **Rohkosčuorvvas**. Dalle berre atnit dáid lađđasiid.

3. Maŋŋil 6. lađđasa **Vuosttaš teakstalohkan**, dahje maŋŋil 7. lađđasa **Allameassusálbma**, dahje maŋŋil 9. lađđasa **Oskkudovddastus**, sáhtta čuovvut moteahhta dahje girkolaš máidnunlávlla. Dábálaččat dát lávlojuvvon koaras. Jos biibbalaš sálbma adnojuvvo allameassusálbman, de ii sáhte leat koarralávlu vuosttaš teakstalohkama maŋŋil.

4. Jos gásta ii doaimmahuvvo sierra gástaipmilbálvalusas, de gásta boahit maŋŋil 14.-15. lađđasa **Ovddasrohkos/Searvegotti giittusoaffar**.

# I - ÁLGU: ROHKOS JA MÁIDNUNLÁVLLA

## 1 Álggaheapmi

Go lea čuojahuvvon girkobielluiguin, de ipmilbálvalus álggahuvvo álggahanrohkosiiin ja dasto álggahansálmmain dahje biibbalaš sálmmain. Dan botta manná liturga áltárii.

Liturga sáhtta čohkkát koaras ja mannat áltárii go sálbma loahpahuvvo.

## Álggahanrohkos

Luhkkár rohkadallá koaravssas:

Rohkadallot!

Herrá! Mii leat bohtán dán du bassi vissui  
gullan dihtii maid don, Ipmil Áhčči, min sivdnideaddji,  
don Herrá Jesus, min Beasti,  
don Bassi Vuoigŋa, min jedđejeaddji eallimis ja jápmimis,  
áiggut sárdnut midjiide.  
Herrá, rabas dál min váimmuid Bassi Vuoigŋainat,  
vai mii du sánis oahpašeimmet moraštit suttuideamet,  
oskut Jesusii eallimis ja jápmimis,  
ja juohke beavvi buoridit iežamet bassi eallimii ja eallingeardái.  
Dán gulašit ja dagašit don Jesus Kristusa bokte!

S Amen.

Jos dát rohkos ii lohkkajuvvo, de manná njuolga čuovvovaš ladđasii.

## Álggahanmusihkka - PRELUDIA

Dábálaččat ovdačuojaheapmin álggahansálbmii.

## Álggahansálbma

Máidnunsálbma dahje sálbma mii lea heivvolaš girkojagi áigái. Álggahansálbman sáhtta lávlut biibballaš sálmma.

## Álggahansátni

Jos lea intimašuvdna, de lea dás, ja son guhte intimere, álggaha dáiguin sániiguin:

*Jogo A*

*L áltára guoras, searvegoddái čalmmiid*

Ráhkis searvegoddi. Árbmu lehkos dinguin ja ráfi Ipmilis, Áhčisteamet, ja Hearnás Jesus Kristusis.

*Dahje B*

*L áltára guoras, searvegoddái čalmmiid*

Áhči ja Bártni ja Bassi Vuoiŋŋa nammii.

Álggahansániid maŋŋil liturga sáhtta mitalit oanehaččat dán beaivvi sisdoalu ja ipmilbálvalusa birra.

## 2 Suttudovddastus

*L* Gopmirdehкот Ipmila ovdii ja dovddastehkot suttuideamet.

*Liturga čipposta áltárii čalmmiid.*

*Buo* Bassi Ipmil, almmálaš Áhčči. Geahča árpmuin munnje, suttolaš olbmui, guhte lean rihkkon du vuostái jurdagiiguin, sániiguin ja daguiguin ja dovddan bahás anistumi váimmustan. Jesus Kristusa dihtii, ane muinna gierdavašvuoda. Atte munnje buot mu suttuid ándagassii ja suova mu aivvefal dus ballat ja du ráhkistit.



### 3 Rohkosčuorvvas KYRIE

Liturga čuožžu áltáarii čalmmiid

*Buo* Kyrie eleison, Ipmil Áhččámet árpmit min.

Kriste eleison, Hearrámet Kristus árpmit min.

Kyrie eleison, Bassi Vuoigna árpmit min.

### 4 Máidnunlávlla GLORIA

Fástoáiggis ii dárbbas dán laddasa geavahit.

*Jogo A*

*I Máidnunlávlla*

*L dahje O* Gudni lehkos Ipmilii allagasas.

*S* Ja ráfi eatnama alde olbmuide geaid Ipmil árpmiha.

Mii máidnut du, mii rámidit du, mii bálvalit du, mii bajidit du. Amen.

*Dahje B*

*L dahje O* Gudni lehkos Ipmilii allagasas.

*S* Ja ráfi eatnama alde olbmuide geaid Ipmil árpmiha.

Mii máidnut du, mii rámidit du, mii bálvalit du, mii bajidit du. Amen.

*Dahje C*

*II Máidnunlávlla*

*L dahje O* Gudni lehkos Ipmilii allagasas.

*S* Ja ráfi eatnama alde olbmuide geaid Ipmil árpmiha.

Mii máidnut du, mii rámidit du, mii bálvalit du, mii bajidit du.

*L* Mii máidnut du du stuorra hearvásvuoda dihtii,

Hearrá Ipmil, almmálaš gonagas, buotveagalaš Áhčči.

*S* Mii máidnut du, mii rámidit du, mii bálvalit du, mii bajidit du.

*L* Hearrá, Ipmila áidnoriegádan Bárdni, Jesus Kristus,  
Ipmila Láppis guhte guoddá máilmmi suttu, árpmit min.  
Don guhte čohkkát Áhči olgeš gieda bealde, gula min.

*S* Mii máidnut du, mii rámidit du, mii bálvalit du, mii bajidit du.

*L* Aivve don leat bassi, aivve don leat Hearrá, aivve don leat Buot Alimus, Jesus  
Kristus Bassi Vuoiŋŋain Áhči hearvásvuodas.

*S* Mii máidnut du, mii rámidit du, mii bálvalit du, mii bajidit du.  
Amen.

*Dahje D*

*III Máidnunlávlla*

*L dahje O* Gudni lehkos Ipmilii allagasas.

*S* Ja ráfi eatnama alde olbmuide geaid Ipmil árpmiha.

Du hearvásvuoda ovddas mii,  
o Áhčči, gopmárdallat,  
ja ráhkisvuodat ovddas mii  
du giitit, rohkadallat.

Du fámuin buot lea sivdnidun,  
du vuollái buot lea biddjojun,  
dus galget buohkat ballat.

Don ieš min áidnu Beasti leat,  
gii eallin midje attát.  
Don leat dat oaffarláppis, gii

min ovddas jápmin girdet.  
Don Ipmiliin min soabahat  
ja jápmimis min lonistat  
ja ávdugassan dagat.

Du duoji bokte, Bassi Vuoign',  
mii gávdnat čuovgas, ilu.  
Don soadis gievrán dagat min,  
vai máhttit vuoittu vuoittit.  
Don Sáhtán vuostái veahkehat  
ja váibmui oskku sivdnidat  
min Jesus ala. Ámen.

*Aivv' almmi riikkas, Sálbmagirjji 2, 4 ja 5. vearsa*

## **5 Beavvi kolleaktarohkos**

*L lohká dahje messe searvegoddái čalmmiid*

Rohkadallot mii buohkat.

*Liturga jorgala áltáarii ja rohkadallá beavvi kolleaktarohkosa, geahča Kolleaktarohkosat s. 47.*

S Amen

## **II - IPMILA SÁNI SÁRDNIDEAPMI**

*L lohká dahje messe áltáris dahje lohkanbulppis*

Gullot Ipmila sáni.

*S Čuožžila ja lávlu*

Máidnojuvvon lehkos Ipmil. Halleluja, halleluja, halleluja.

## 6 Vuosttaš lohkan

Teaksta Boares testamenttas dahje Ođđa testamentta reivviin, Apoastaliid daguin dahje Johanasa almmustusgirjjis.

Guokte vuosttaš teavstta lohkkujuvvojit dábálaččat lohkanbulppis, ja berre leat seammá teakstalohkki. Liturga sáhtá dalle guođdit áltára vuosttaš teakstalohkama ovdal.

Go liturga lohká teavsttaid, de sáhtá lohkat áltáris.

*T / L*

Dát bassi logus lea čállojuvvon ... kapihttalis.

*dahje*

Lea čállojuvvon ... kapihttalis.

Searvegoddi čuožžila.

Teakstalohkan loahpahuvo ná:

Nu čuodjá Hearrá sátni.

Searvegoddi čohkkeda teakstalohkama maŋŋil.

## 7 Allameassusálbma

Sálbma mii heive beavvi sisdollui dahje ovttá ipmilbálvalusa teavsttaide, dahje biibballeš sálbma.

Sáhtá lávlut dán sálmma vearssaid vurrolagaid.

## 8 Nubbi lohkan

Teaksta Ođđa testamentta reivviin, Apoastaliid daguin, Johanasa almmustusgirjjis, dahje evangeliumiin.

*T / L*

Dát bassi logus lea čállojuvvon ... kapihttalis.

*dahje*

Lea čállojuvvon ... kapihttalis.

Searvegoddi čuožžila.

Teakstalohkan loahpahuvo ná:

Nu čuodjá Hearrá sátni.

## 9 Oskkudovddastus CREDO

Oskkudovddastus lohkkoujvvo dahje lávlojuvvo.

Allabassebeivviid dahje go lea gásta ipmilbálvalusas, de sáhtá geavahit nikealaš

oskkudovddastusa.

Jos lea gásta, de sáhtá diktit oskkudovddastusa logakehtái dás. Sáhtá máiddái lávlu

oskkudovddastussálmma dás. Dalle ii leat sálbma sártni ovdal.

*T / L*

Dovddastehkot bassi oskomet.

*Jogo*

*Buo* Mun oskkun Ipmil Áhččái, buotveagalažžii,  
almmi ja eatnama sivdnideaddjái.

Mun oskkun Jesus Kristusii,  
Ipmila áidnoriegádan Bárdnái, min Hearrái,

guhte sahkanii Bassi Vuoiŋnas,  
riegádii nieiddas Márjjás,  
givssiduvvui Pontius Pilatusa áiggi,  
russiinávlejuvvui, jámii ja hávdáduvvui,  
njejjai jábmiid riikii,  
bajásčuožžilii jábmiid luhtte goalmát beaivvi,  
manai bajás albmái,  
čohkká Ipmila, buotveagalaš Áhči, olgeš gieda bealde,  
máhccá doppe dubmet elliid ja jábmiid.

Mun oskkun Bassi Vuigŋii,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

*Apoastallaš oskkudovddastus*

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,  
guhte sahkanii Bassi Vuoiŋna bokte,  
riegádii nieida Marias,  
givssiduvvui Pontius Pilatusa vuolde,  
russiinávlejuvvui, jámii ja hávdáduvvui,  
vuolás manai jábmiid riikii,  
bajásčuožžilii jábmiid luhtte goalmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieda bealde,

galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

**Apoastallaš oskkudovddastus**

*Dahje C*

*Buo* Mii oskut ovtta Ipmilii,  
buotveagalaš Áhččái,  
almmi ja eatnama,  
buot oinnolaččaid ja oaidnemeahttumiid Sivdnideaddjái.

Mii oskut ovtta Hearrái, Jesus Kristusii,  
Ipmila áidnoriegádan Bárdnái,  
guhte lea riegádan Áhčis ovdal buot áiggiid,  
Ipmil Ipmilis, čuovggas čuovgasis,  
duohta Ipmil duohta Ipmilis,  
riegádan, ii ge sivdniduvvon,  
geas lea seammá luondu go Áhčis  
ja gean bokte buot lea šaddan,  
guhte min olbmuid ja min bestojumi dihtii  
njejai almmis,  
šattai olmmožin Bassi Vuoiŋŋa bokte ja nieiddas Márjjás,  
rusiinávlejuvvui min ovddas Pontius Pilatusa áiggi,  
gillái ja hávdáduvvui,  
bajásčuožžilii jábmiid luhtte goalmát beaivvi čállaggiid mielde  
ja manai bajás albmái,  
čohkká Áhči olgeš gieđa bealde,

boahotá fas hearvásvuođas  
dubmet elliid ja jábmiid,  
ja gean riikkas ii leat loahppa.

Mii oskut Bassi Vuignii,  
Hearrái ja eallindahkkái,  
guhte vuolgá Áhčis [ja Bártnis],  
guhte ovttas Áhčiin ja Bártniin rohkadalloyuvvo ja gudnejahttojuvvo,  
ja guhte lea sárdnon profetaid bokte.  
Mii oskut ovttá, bassi, oktasaš ja apoastallaš girku.  
Mii dovddastit ovttá gástta sudduid ándagassii addojupmin,  
vuordit jábmiid bajásčuožžileami  
ja boahttevaš máilmmi eallima.  
Amen

Nikealaš oskkudovddastus

Searvegoddi čohkkeda

## 10 Sálbma sártni ovdal

### 11 Sárdni

Sárdnideaddji sáhtá vuos rohkadallat oanehis, friddja rohkosa.

Allabassebeivviid searvegoddi lávlu allabassevearssa, manñil go sárdnideaddji lea cealkán  
álggahansániid.

Dasto lohkkoyuvvo sárdneteaksta.

Teakstalohkan álggahuvvo dáiguin sániiguin:

Dát bassi evangelium lea čallojuvvon ... kapihttalís.

*dahje*

Lea čallojuvvon ... kapihttalís.



Searvegoddi čuožžila.

Teakstalohkan sáhtta loahpahuuvot ná:

Nu čuodjá Hearrá sátni.

Searvegoddi čohkkeda.

Sárdnideaddji sárdnida beaivvi teavstta vuodul.

Muhtun háve, muhto ii allabasiid, sáhtta sárdnidit eará lohkkjuuvvon teavstta vuodul dahje friddja válljejuuvvon biibbalteavstta vuodul.

Sárdni loahpahuuvvo dáinna rámaidusain:

Gudni lehkos Áhččái ja Bárdnái ja Bassi Vuignii, guhte lei ja lea ja bissu oktan duohta Ipmilin agálašvuodas agálašvuhtii.

## **12 Sálbma sártni maŋŋil**

Fástoáiggi dát sálbma ii dárbaš lávlojuuvot go litaniija geavahuuvvo ovddasrohkosin.

## **III - SEARVEGOTTI OVDDASROHKOS**

Dás sáhtta čuovvut

### **13 Diedáhusat**

Luhkkár, eará searvegottelahttu dahje liturga sáhtta dábálaččat lohkat diedáhusaid

lohkanbulppis dahje eará sajis koaras.

Diedáhusat sisttisdoallet

a) ipmilbálvalusaid ja eará čoakkalmasaid,

b) áigejuovdilis áššiid searvegottis ja girkus,

c) giittusoaffara, kolleavtta jna.

d) áigeovdilis rohkosáššiid mat válđojuvvojit mielde čuovvovaš ovddasrohkosis,

e) ávžžuhusaid rohkadallat gástamáid, náittosbáraid ja buhcciid ovddas.

Go litaniija geavahuvvo, de dieđáhusain sáhtta leat oanehis, čállojuvvon ovddasrohkosis.

Dieđáhusat sáhttet loahpahuvtot ná:

Dan rájes go searvegoddi lei čoahkis ovddit háve, de *dát* olbmot leat eret vádjolan:  
Searvegoddi čuožžila, ja jábmiid namat lohkkovuvvojit.

Oanehis jaskes bottu maŋŋil okta dáin biibbalvearssain sáhtta geavahuvtot:

*Jogo A*

Herrá, oahpat min lohkat beivviideamet, de mii oazžut viissisvuoda váibmui!

Sál 90,12

*Dahje B*

Jesus cealká: Mun lean bajásčuožžileapmi ja eallin; dat guhte osku munnje, oazžu eallit vaikko vel jápmá ge.

Joh 11,25

## 14 Ovddasrohkosis

I, II, IV Ovddasrohkosis leat dušše árvaluvvon áigeovdilis rohkosáššit. Go dakkár rohkosáššit válđojuvvojit mielde, de liturga ferte čállit daid ovddalgihtii, oanehis ja oktageardán cealkagiiguin. Jos lea vejolaš, de berre ságastallat dakkár áigeovdilis rohkosáššiid birra searvegottarádi ovdalbmui dahje muhtun eará searvegotti njunnožiin.

Fástoáiggi geavahuvvo Litaniija, s. 31.

## *Jogo A*

*I Ovddasrohkos*

*L searvegoddái čalmmiid*

Loaiddastehkot Ipmila ovdii rohkosiin.

*L áltárii čalmmiid*

Herrá, min Ipmil ja Áhčči, mii giitit du ja máidnut du bassi nama, dasgo don leat buorre, ja du árkkálmastinvuohta bistá agálaččat.

Mii rohkadallat du girku ovddas eatnama alde. Deavdde dan Vuoiŋŋainat. Várjal dan Sáni ja sakramentaidda bokte, ja divtte dan šaddadit ráhkisvuođa šattuid du ovddas.

Buessivdnit min searvegotti, ja veahket min buohkaid bargat oskkáldasvuođain du riikka ovddas. Rávka min konfirmánttaid eallit biehttaleamis, oskkus ja bálvalusas.

Divtte sánát ovdánit buot álbmogiid gaskii. Atte fámu ja roahkkatvuođa sidjiide geat doarrádallovvojit du nama dihtii. Rávka sin geat leat jorralan, ruoktot gástta árbmui.

Jesus Kristusa dihtii.

S Herrá, gula min rohkosa.

*L* Atte ráfi eatnama ala, friddjavuođa ja vánhurskkisvuođa buohkaide. Oahpat min suodjalit olmmošárvvu heakka álggus gitta lohppii. Árpmit sin geat ellet geafivuođas ja headis. Veahket min gáhttet buot dan maid don leat sivdnidan ja juogadit du attáldagaid rievttuid.

Buessivdnit min gonagasa ja su bearraša, min álbmoga ja váhneneatnama ja min riikaguimmiid guhkkinn eret ja meara alde. Doala suodjaleaddji giedat mánáid ja nuoraid badjel. Deavdde Vuoiŋŋainat ruovttu ja skuvlla. Atte viissisvuođa ja vuoiggalašvuođa buohkaide geain lea ovddasvástádus servodagas, ja oahpat min bargat guhtet guoibmáseamet buorrin.

Jesus Kristusa dihtii.

S Herrá, gula min rohkosa.

L [Odne mii rohkadallat erenoamážit ... (Dákko sáhhtá namuhit áigeuovdilis rohkosáššiid.

Gástamáid namat namuhuvvojit.)]

Boađe sin lusa geat ohcet du, ja buohkaid lusa guđet sohtet eahpádusain ja átestusain. Jedđe buhcciid ja morašteddjiid, leage buot ovttaskasaid luhtte, boađe agálaš eallima doaivagiin sin lusa guđet sohtet jápminheadis, árpmat buot olbmuid.

Jesus Kristusa dihtii.

*Jogo AA*

S Herra, gula min rohkosa. Amen.

*Dahje BB*  
jos liturga joatká,

S Herra, gula min rohkosa.

L Jaskatvuodas mii bidjat dál du ovdii dan mii mis guđesge lea váimmu alde.

*Jaskes rohkos.*

L Jesus Kristusa nammii mii rohkadallat dus, min Ipmit ja Áhčči.

S Herra, gula min rohkosa. Amen.

*Go ii leat gásta eai ge eahkedismállásat, de ovddasrohkos loahpahuvo Herra rohkosiin.*

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.  
Ale ge doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

*Dahje*

*Buo* Áhčči min, don guhte leat almmis!  
Basuhuvvos du namma.  
Bohtos du riika.  
Šaddos du dáhttu  
mo almmis nu maiddái eatnama alde.  
Atte midjiide odne min beaivválaš láibámet.  
Ja atte midjiide min suttuideamet ándagassii,  
nugo maiddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

Dás sáhhtá čuovvut 15. lađas **Searvegotti giittusoaffar**, s. 36.

Go ii leat gásta eai ge eahkedismállásat, de čuovvu 20. lađas **Loahpahansálbma**, s. 44

*Dahje B*

*II Ovdđasrohkos*

*L* **searvegoddái čalmmiid**

Loaiddastehkot Ipmila ovdii rohkosiin.

*L* **áltárii čalmmiid**

Agálaš Ipmil, mii giitit ja máidnut du, almmi ja eatnama Hearrá. Mii rohkadallat máilmmi ovdđas man don leat sivdnidan. Láide máilmmi álbmogiid ja našuvnnaid

eallit ovttasbarggus ja ráfis. Atte friddjavuođa ja vuoigatvuoda gefiide ja sidjiide geat sordojuvvojit.

Veahket min buohkaid gáhttet buot dan maid don leat sivdnidan, nu ahte mii suodjalit olmmošárvvu ja hálddašit luonddu attáldagaid guhtet guoibmásamet buorin. Doala suodjaleaddji giedat mánáža badjel gii lea eatni heakkas. Doarjal sin guđet leat massán mánáset, ja sin guđet leat ožžon váhnenovddasvástádusa.

[Odne mii rohkadallat erenoamážit ... (Dákko sáhtta namuhit áigeuovdilis rohkosáššiid.)]

Ipmil Áhčči, dan mii rohkadallat dus.

Š Herra, gula min rohkosa.

L Mii rohkadallat riikamet ja álbmogeamet ovddas. Buressivdnit min gonagasa ja su bearraša. Atte oskkáldasvuoda ja viissisvuoda Stuoradiggái ja Ráddehussii, Sámediggái ja buot min eiseválddiide, buohkaide geat leat ožžon stivrenovddasvástádusa min gaskkas. Várjal ruovttuid ja servodaga billašumis ja riiddus, ja veahket min buohkaid geavahit min eallingearddi buori dáhtot mielde.

[Odne mii rohkadallat erenoamážit ... (Dákko sáhtta namuhit áigeuovdilis rohkosáššiid.)]

Ipmil Áhčči, dan mii rohkadallat dus.

Š Herra, gula min rohkosa.

L Mii rohkadallat sin ovddas guđet gillájit; buhcciid ja ovttaskasaid ovddas, ruovttuhemiid, báhtareddjiid ja soadi gillájeddjiid ovddas, geat leat deaivvahallan váinnuide ja lihkuhisvuodaide, ja juohke olbmo ovddas geas ii leat šat doaivva boahteáigái.

[Odne mii rohkadallat erenoamážit ... (Dákko sáhtta namuhit áigeuovdilis rohkosáššiid.)]

Leage sin luhtte ja atte midjiide návccaid ja dáhtu veahkehit.

Ipmil Áhčči, dan mii rohkadallat dus.

Š Herra, gula min rohkosa.

L Mii rohkadallat du girku ovddas. Deavdde girkot Vuoiŋnainat ja ođasmahte dan Sániin ja sakramenttaiguin. Rávka ruoktot gástta árbmui sin geat leat jorralan. Ovddit riikkat buot álbmogiid gaskii ja divtte evangeliuma šaddat bestojupmin Israela álbmogii. Hukse searvegottát juohke riikii, várjal min vearreoahtus ja jápma

ipmilbálvalusas, vai mii ovttamielalaččat ja ovtta oaivilis dovddastivččiimet ahte Jesus Kristus lea Hearrá.

[Odne mii rohkadallat erenoamážit ... (Dákko sáhtta namuhit áigeuoovdilis rohkosáššiid.)]

Ipmil Áhčči, dan mii rohkadallat dus.

Š Hearrá, gula min rohkosa.

L Mii rohkadallat searvegoddámet ovddas, ipmilbálvalusaid ja eará čoagganemiid ovddas mat leat du nammii, sin ovddas guđet gásttašuvvojit (mánáid namat namuhuvvojit), risváhnemiid ovddas, náittosolbmuid (namat sáhttet namuhuvvot) ja konfirmánttaid ovddas: Rávkka sin eallit biehttaleamis, oskkus ja bálvalusas.

[Odne mii rohkadallat erenoamážit ... (Dákko sáhtta namuhit áigeuoovdilis rohkosáššiid.)]

Veahket min buohkaid ja daga min dohkálažžan bálvalussii, vai mii livččiimet du árpmu buorit dálloodoallit, dan botta go mii vuordit Hearrámet Jesusa máhccama hearvásvuodas.

Ipmil Áhčči, dan mii rohkadallat dus.

*Jogo AA*

L Hearrá, gula min rohkosa. Amen.

*Dahje BB*  
jos liturga joatká,

Š Hearrá, gula min rohkosa.

L Jaskatvuodas mii bidjat dál du ovdii dan mii mis guđesge lea váimmu alde.

*Jaskes rohkos.*

L Jesus Kristusa nammii dan mii rohkadallat dus, min Ipmil ja Áhčči.

Š Hearrá, gula min rohkosa. Amen.

*Go ii leat gásta eai ge eahkedismállásat, de ovddasrohkos loahpahuvo Hearrá rohkosiin.*

### *Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

### *Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

Dás sáhtá čuovvut 15. lađas **Searvegotti giittusoaffar**, s. 36.

Go ii leat gásta eai ge eahkedismállásat, de čuovvu 20. lađas **Loahpahansálbma**, s. 44.

### *Dahje C*



### III Ovddasrohkos

#### L searvegoddái čálmmiid

Loaiddastehkot Ipmila ovdii rohkosiin.

#### L áltárii čálmmiid

Agálaš Ipmil, mii giitit du buot du buorrevuoda ovddas midjiide. Don attát beivválaš láibbi, don attát ilu ja buriid beivviid, don bajásgeasát min riikasat ruossain ja átestusain. Don leat addán midjiide bassi sánát, don leat váldán min girkot lahttun eatnama alde ja leat bidjan min ovdii agálaš mihttomeari iežat luhtte.

Mii rohkadallat Jesusa nammii: Geahča árpmuin girkosat ja basut dan duohtavuodastat. Divtte sánát sárdniduvvot čielgasit ja buhtásit ja du sakramenttaid adnojuvvot rievttuid. Atte girkosat bálvaeddjiid guđet oahpahit ja ellet rievttuid, ja veahket min buohkaid bálvalit du oskkáldasat.

Ipmil Áhčči, dan mii rohkadallat dus.

S Herra, gula min rohkosa.

L Várjal min searvegotti. Divtte uhcahaččaid guđet gásttašuvvojit, bajásšaddat du searvevuodas. Rávka min konfirmánttaid eallit biehttaleamis, oskkus ja bálvalusas. Láide sin geat leat jorralan, ruoktot gástta árbmui. Atte du áltargussiide ráfi ja agálaš eallima beavddistat.

Vuolggat bargiid ladjosat ja divtte riikkat evangeliuma ovdánit buot álbmogiid gaskii. Geahča árpmuin dan álbmogii masa don addet boares lihtu lohpusaidat. Nanne sin guđet doarrádallojuvvojit Jesusa nama dihtii, jurddaš váibmoládisvuodain sin geat vuostálastet du sáni, ja jorgalahte sin eallimii.

Ipmil Áhčči, dan mii rohkadallat dus.

S Herra, gula min rohkosa.

L Atte ráfi eatnama ala ja váimmuide. Atte máilmmi ráddejeddjiide dáhtu ja viissisvuoda ovddidit voigatvuoda ja ráfi, ja divtte ovttasbarggu ovdánit álbmogiid gaskkas. Doala suodjaleaddji gieđat buot dan badjel maid don leat sivdnidan. Veahket min juogadit eatnama riggodagaid rievttuid ja geavahit daid dutnje gudnin ja boahte buolvvaide buorin. Veahket máilmmi gefiid headis ja badjelgehččojumis eret ja atte friddjavuoda buohkaide geat leat sordojuvvon.

Buessivdnit min álbmoga ja váhneneatnama, min riikaguimmiid geat leat meara alde ja amas eatnamiin. Várjal min gonagasa ja su bearraša ja atte viissisvuoda buohkaide geain lea ráđđenváldi ja ovddasvástádus servodagas. Divtte min bargat guhtet guoibmáseamet buorin, ja veahket min eallit ovtta ráhkisvuodas ja ráfis.

Ipmil Áhčči, dan mii rohkadallat dus.

S Herra, gula min rohkosa.

L Várjal náittosdili ja ruovttuid, buessivdnit min skuvllaid, láide min nuorragearddi geainnuidat mielde. Doarjal ovttaskasaid ja suodjal oarbásiid. Atte buhcciide ja morašteddjiide geahpádusa ja jeddehusa. Veahket sin guđet leat vuoiŋgalaš seavdnjadasas, jedde sin guđet leat mášuheamit ja balus, ja leage sin luhte geat sohtet jápminheadis. Atte midjiide návccaid veahkehit gos eallin áitojuvvo, ja dáhtu suodjalit olmmošárvvu heakka álggus gitta lohppii.

Ipmil Áhčči, dan mii rohkadallat dus.

S Herra, gula min rohkosa.

L Árpmit, Ipmil, buot olbmuid, Jesus Kristusa dihtii. Ja suova min, go min diibmu boahdá, jápmit ávdugassan dán máilmmis eret ja maŋimus beaivvi bajásčuožžilit du hearvásvuhtii.

Ipmil Áhčči, dan mii rohkadallat dus.

*Jogo AA*

S Herra, gula min rohkosa. Amen.

*Dahje BB*  
*jos liturga joatká,*

S Herra, gula min rohkosa.

L Jaskatvuodas mii bidjat dál du ovdii dan mii juohkehaččas mis lea váimmu alde.

*Jaskes rohkos.*

L Jesus Kristusa nammii dan mii rohkadallat dus, min Ipmil ja Áhčči.

Š Hearná, gula min rohkosa. Amen.

Go ii leat gásta eai ge eahkedismállásat, de ovddasrohkos loahpahunvo Hearná rohkosiin.

*Jogo*

*Buo* Áhčámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalusii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

Dás sáhtá čuovvut 15. lađas **Searvegotti giittusoaffar**, s. 36.

Go ii leat gásta eai ge eahkedismállásat, de čuovvu 20. lađas **Loahpahansálbma**, s. 44.

### *Dahje D*

#### *IV Ovddasrohkos*

**Dat guhte jođiha ovddasrohkosa, cealká:**

Go mii dál leat čoahkkanan Jesusa nammii, de rohkadallot su sáni ja lohpadusa mielde searvegoddámet ja Ipmila álbmoga ovddas miehtá máilmmi.

**Dárbbu mielde sáhttá lasihuvvot dás:**

Ja rohkadallot erenoamážit dáid ovddas:

- daid ovddas geat odne gásttašuvvojit,
- daid ovddas geat vihahuvvojit náitosii,
- min konfirmánttaid ovddas,
- daid ovddas geat leat rávkjuvvon njunušovddasvástádussii girkus,
- buot min miššuvdnabargiid ovddas.

**Dás sáhttet maidđái namuhuvvot omd. masa manná otnábeaivvi oaffar, ođđa mielbargit girkus ja searvegottis, searvegotteráđđi, stuorra girkolaš dáhpáhusat jnv.**

**Dás sáhttá geavahit oanehis, jaskes rohkosa.**

*L* Almmálaš Áhčči, guhte leat addán midjiide ruovttu girkustat eatnama alde, mii rohkadallat dus, várjal min bissut duohta oskkus, vai mii álelassii ealášeimmet du searvevuodas, ja sániiguin ja daguiguin gudnejahtášeimmet du nama, Jesus Kristusa, Hearrámet, bokte.

*S* Hearrá, gula min rohkosa.

**dahje daddjojuvvon**

*S* Amen.

**Jođiheaddji**

Rohkadallot álbmogeamet ja sin ovddas geain lea ráđđenváldi ja ovddasvástádus servodagas.

Dárbbu mielde sáhttá lasihuvvot dás:

Ja rohkadallot erenoamážit ... (Dákko sáhttá namuhit áigegeovdilis rohkosáššiid, omd. boahttevaš gielddastivraválga, Sámediggeválga, Stuorradiggeválga, ođđa gielddastivra, ođđa Sámediggi, ođđa Stuorradiggi, ođđa ráđđehus, šiehtadallamat bargo- ja ealáhusdoaimma hárrái, ođđa skuvlajahki jnv.)

Dás sáhttá geavahit oanehis, jaskes rohkosa.

*L* Almmálaš Áhčči, várjal árpmustat min álbmoga ja váhneneatnama. Buressivdnit min gonagasa ja su bearraša ja atte viissisvuoda ja fámu buohkaide geain lea stuorra ovddasvástádus servodagas, vai sin dahku lihkostuvašii, dutnje gudnin ja álbmogii buressivdnádussan, Jesus Kristusa, Hearrámet, bokte.

*S* Hearrá, gula min rohkosa.

dahje daddjojuvvon

*S* Amen.

**Jodiheaddji**

Rohkadallot sin ovddas geat leat deaivvahallan buozalvassii ja lihkuhisvuodaide, buot ovttaskasaid ovddas ja sin ovddas geain leat lossa noađit.

Dárbbu mielde sáhttá lasihuvvot dás:

Ja odne erenoamážit dáid ovddas: (Dákko sáhttá namuhit áigegeovdilis rohkosáššiid, omd. sii guđet leat bivdán searvegotti ovddasrohkosa, sii guđet leat deaivvahallan johtolatlihkuhisvuodaide ja roasuide jnv.)

Dás sáhttá geavahit oanehis, jaskes rohkosa.

*L* Váibmoládis Ipmil, guhte áhči ráhkisvuodain geahčat buot du sivdnádusaide, mii rohkadallat dus, gula min rohkosa sin ovddas geat leat headis ja átestusas, ja sin ovddas geat sohtet jápminheadis: Beastte sin dorvvuhisvuodas ja headis. Nanne sin gillámušas ja suova sin buohkaid dovdat du árpmolaš veahki, Jesus Kristusa, Hearrámet, bokte.

S Hearrá, gula min rohkosa.

dahje daddjojuvvon

S Amen.

Jodiheaddji

Rohkadallot máilmmi ráfi ovddas ja vuoigatvuoda ja buot olbmuid friddjavuoda ovddas.

Dárbbu mielde sáhtta lasihuvvot dás:

Ja odne erenoamážit ... (Dákko sáhtta namuhit áigeovdilis rohkosáššiid, omd. ahte áigeovdilis čearddalaš ja riikkaidgaskasaš váttisvuodat čovdojuvvošedje jnv.)

Dás sáhtta geavahit oanehis, jaskes rohkosa.

L Almmálaš Áhčči, árpmat min máilmmi mii lea baluin dievva. Veahket min, amamet ieža šaddat sivalažžan ráfehivuhtii ja riidui, muhto vai mii eallit ovttas ráfis ja du dáhtu mielde, dassáži go don ođasmahtát buot, Jesus Kristusa, Hearrámet, bokte.

S Hearrá, gula min rohkosa.

dahje daddjojuvvon

S Amen.

Go ii leat gásta eai ge eahkedismállásat, de ovddasrohkos loahpahuvo Hearrá rohkosiin.

Jogo

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,  
nugo mii ge ándagassii addit velggolaččaidasamet.  
Ale ge doalvvo min geahččalusii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,  
nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,  
muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

Dás sáhtá čuovvut 15. lađas **Searvegotti giittusoaffar**, s. 36.

Go ii leat gásta eai ge eahkedismállásat, de čuovvu 20. lađas **Loahpahansálbma**, s. 44.

*Dahje E*

**Fástoáiggi geavahuvvo**

*Litaniija ja Fástokolleakta*

Jos liturga ii messe, de searvegoddi lávlu olles 2. ja 8. vearssa.

1. *Buo* Kyrie eleison, Ipmil Áhččámet, árpmit min.

Kriste eleison, Hearrámet Kristus, árpmit min.

Kyrie eleison, Bassi Vuoignja, árpmit min.

2. *L* Ipmil, almmálaš Áhččámet,

*Buo* árpmit min badjelii.

*L* Hearrá Jesus, máilmmi Beasti,

*Buo* árpmit min badjelii.

*L* Bassi Vuoigná, jeddejeaddjámet,

*Buo* árpmit min badjelii.

3. *L* Buot suttuin, buot čádjádusain, buot das mii bahá lea,

*B* Hearrá Ipmil, beastte min.

4. *L* Bahás ja fáhkkes jápmimis, soađis ja sordojumis, lihkuhisvuodain ja duššadeamis,

*Buo* Hearrá Ipmil, beastte min.

*L* Agálaš jápmimis,

*Buo* Hearrá Ipmil, beastte min.

5. *L* Kristusa bassi riegádeami dihtii, su ruossa ja jápmima dihtii, su vuittolaš bajásčuožžileami ja albmáimannama dihtii, min lihku áiggi, min morrašis ja headis, min mañimuš bottus ja duopmobeavvi,



*Buo* Hearrá Ipmil, veahket min.

6. *L* Stivre ja láide bassi kristtalaš girkot ja ovttastahte dan duohta-vuođastat. Atte girkosat bálvaleddjiid guđet dollet gitta du sánis. Várjal min vearreoahtus ja jápma oskkus.

*Buo* Hearrá Ipmil, gula min.

*L* Nanne min searvegotti Vuoiŋŋainat ja fámuinat.

Rávkka sin guđet leat jorralan, ja divtte sánát ovdánit eatnama alde.

*Buo* Hearrá Ipmil, gula min.

7. *L* Atte ráfi ja soabalašvuoda buot riikkain. Suodjal min álbmoga ja gonagasa. Várjal eatnama ja buressivdnit min barggu.

*Buo* Hearrá Ipmil, gula min.

*L* Boađe veahkkin sidjiide guđet leat headis ja váralašvuodas. Daga buriid sidjiide geat dahket baháid midjiide. Árpmit buot olbmuid.

*Buo* Hearrá Ipmil, gula min.

*L* Jesus Kristus, Ipmila Bárdni.

*Buo* Hearrá, gula min rohkosa.

8. *L* Buhtes Ipmil Láppis, guhte guddet máilmmi suttu,

*Buo* árpmit min badjelii.

*L* Buhtes Ipmil Láppis, guhte guddet máilmmi suttu,

*Buo* árpmat min badjelii.

*L* Buhtes Ipmil Láppis, guhte guddet máilmmi suttu,

*Buo* attášit du ráfi.

9. *Buo* O Hearrá, gula min ja divtte min čuorvasa olahit du lusa. Amen.

*Dasto čuovvo Fástokolleakta.*

*L joatká litaniija manjil*

Mii giitit du, Ipmil Áhččámet, go don leat addán midjiide áidnoriegádan Bártnát, Jesus Kristusa, amas oktage láhppot guhte osku sutnje, muhto vai son oážžu agálaš eallima.

Mii giitit du, Hearrá Jesus Kristus, go don leat guoddán buot min suttuid rupmašisttát ja sihkkon varainat buot min rihkkumiid.

Mii giitit du, Bassi Vuoigŋa, go don leat addán dan oskku min váibmui ahte Jesus Kristus lea min áidna gáddjojupmi ja bestojupmi.

Ipmil, atte midjiide árpmot, vai mii ollásii ja nannosit oskkošeimmet ahte buot min suttut leat ándagassii addojuvvon Jesus Kristusa gillámuša ja jápmima dihtii. Nanne min Bassi Vuoigŋainat, vai mii beaivválaččat vuostálasttášeimmet suttu ja geahččalusaid ja álelassii bisošeimmet Jesusa luhtte, dassáži go mii oaidnit su muođus muhtui agálaš eallimis.

Dán mii rohkadallat Hearrámet Jesusa nammii.

*Go ii leat gásta eai ge eahkedismállásat, de ovddasrohkos loahpahunvo Hearrá rohkosiin.*

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,  
mo almmis nu maiddái eatnama alde.  
Atte midjiide odne min beaivválaš láibbi.  
Atte midjiide min suttuid ándagassii,  
nugo mii ge ándagassii addit velggolaččaidasamet.  
Ale ge doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

*Dahje*

*Buo* Áhčči min, don guhte leat almmis!  
Basuhuvvos du namma.  
Bohtos du riika.  
Šaddos du dáhttu  
mo almmis nu maiddái eatnama alde.  
Atte midjiide odne min beaivválaš láibámet.  
Ja atte midjiide min suttuideamet ándagassii,  
nugo maiddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

Dás sáhtá čuovvut 15. lađas **Searvegotti giittusoaffar**, s. 36.

Go ii leat gásta eai ge eahkedismállásat, de čuovvu 20. lađas **Loahpahansálbma**, s. 44.

Dás sáhtá čuovvut:

## 15 Searvegotti giittusoaffar

Sáhtta oaffaruššat giittusoaffara go lávka, kore d.e. sáddejuvvo olbmos olbmui girkobeankkain. Attáldagat guddojuvvojit loahpas ovdan áltárii.

Allabasiid ja sierranas dilálašvuodain sáhtta oaffaruššat go searvegoddi manná ovdan ja bidjá attáldagaid oaffarlihttái dahje oaffargiisái mii lea áltára alde dahje dan guoras.

Sáhtta oaffaruššat áltáris máiddái go postludia čuojahuvvo.

Giittusoaffar sáhtta čoggojuvvot girkoskáhpuiquin dahje oaffargiissás olgouvssaid bokte.

Go oaffaruššá, de sáhtta máiddái čuojahit heivvolaš čuojanas- dahje vokálmusihka, dahje máiddái sáhtta lávlut sálmma.

Go oaffaruššá, de sáhtta loahpahit oanehis rohkosiin, omd. ovttain dáin:

### *Jogo A*

#### *L áltárii čalmmiid*

Herrá Ipmil, almmálaš Áhčči,  
du lea eanan ja buot mii das lea.  
Buot maid mii oamastit, gullá dutnje.  
Buressivdnidivččet dáid  
attáldagaid, vai dat šattašedje  
ávkin du riikii ja min lagamužžii,  
Jesus Kristusa, Herrámet, bokte.

### *Dahje B*

#### *L áltárii čalmmiid*

Herrá Ipmil, almmálaš Áhčči,  
du lea eanan ja buot mii das lea.  
Du opmodagas addit mii fas dutnje.  
Válddášit vuostái min ja dáid  
attáldagaid,  
Jesus Kristusa dihtii.

## **Gásta**

Go lea gásta allameassus, de lea dábálaččat dás. Geahča ortnega **Mánáidgásta allameassus**, s. 123 ja **Rávvásiidgásta allameassus**, s. 140.

Jos eai leat eahkedismállásat, de čuovvu 20. lađas **Loahpahansálbma**, s. 44.

## **IV - EAHKEDISMÁLLÁSAT**

### **16 Sálbma eahkedismállásiid ovdal**

Meassuhagel gárvvohuvvo dan sálmma lávllodettiin.

Liturga bidjá láibbi láibediskka ala ja leike viinni káلكii.

### **17 Máidnun ja Hearrá ásahussánit**

*L* messe dahje cealká, searvegoddái čalmmiid

Hearrá lehkos dinguin.

*S* Searvegoddi čuožžila ja lávlu

Ja du vuoiŋŋain.

*L* Bajidehket váimmuideattet Hearrá guvlui.

*S* Mii bajidit váimmuideamet Hearrá guvlui.

*L* Giitot Hearrá Ipmileamet.

*S* Dat lea dohkálaš ja riekta.

## Máidnun PREFAŠUVDNA

Liturga jorgala áltára guvlui ja messe dahje cealká girkojagi áiggi prefašuvnna.

*Trinitatisáigi*

*Jogo A*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Herraámet bokte, gean don vuolggahit beastin dihtii máilmmi, vai mii su jápmima bokte oččošeimmet sudduid ándagassii addojumi, ja su bajásčuožžileami bokte vuoihtášeimmet agálaš eallima. Su bokte máidnot engelat du hearvásvuoda, ja du searvegoddi almmis ja eatnama alde rávida du nama ovttamielalaš ávuin. Singuin mii ge áigut ovttastahttit jienaideamet ja rohkadaladettiin lávlut:

*Dahje B*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Herraámet bokte, son lea duohta láibi mii boahdá vuolás almmis ja addá eallima máilbmái, amas at guhte boahdá su lusa, nealgut, ja dat guhte osku sutnje, goassege jápmit. Su bokte máidnot engelat du hearvásvuoda, ja du searvegoddi almmis ja eatnama alde rávida du nama ovttamielalaš ávuin. Singuin mii ge áigut ovttastahttit jienaideamet ja rohkadaladettiin lávlut:

*Adveantaáigi*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Herraámet, bokte, gean don vuolggahit beastin dihtii máilmmi, ollašuttit lohpadusaid maid don addet máddariidda profetaid bokte. Su bokte máidnot engelat du hearvásvuoda, ja du searvegoddi almmis ja eatnama alde rávida du nama ovttamielalaš ávuin. Singuin mii ge áigut ovttastahttit jienaideamet ja rohkadaladettiin lávlut:

*Juovlaidja*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Herraámet, bokte, guhte dán bassi ija šattai olmmožin, vai mii su bokte šattašeimmet du mánnán guđet leat bestojuvvon seavdnjadasas eret du ovddolaš čuovgasii. Su bokte máidnot engelat du hearvásvuoda, ja du searvegoddi almmis ja eatnama alde rávida du nama

ovttamielalaš ávuin. Singuin mii ge áigut ovttahttit jienaideamet ja rohkadaladettiin lávlut:

*Juovlabeaivvi rájes fástoláskkáš sotnabeaivvi rádjái*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Hearrámet, bokte, guhte min dihtii šattai olmmožin, vai mii su bokte šattašeimmet du mánnán guđet leat bestojuvvon seavdnjadasas eret du ovddolaš čuovgasii. Su bokte máidnot engelat du hearvásvuoda, ja du searvegoddi almmis ja eatnama alde rávida du nama ovttamielalaš ávuin. Singuin mii ge áigut ovttahttit jienaideamet ja rohkadaladettiin lávlut:

*Fástoáigi*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Hearrámet, bokte, guhte ráhkistii min ja attii iežas min ovddas, ja lei gulolaš jápmima rádjái, ruossa jápmima rádjái. Su bokte máidnot engelat du hearvásvuoda, ja du searvegoddi almmis ja eatnama alde rávida du nama ovttamielalaš ávuin. Singuin mii ge áigut ovttahttit jienaideamet ja rohkadaladettiin lávlut:

*Beassášbeaivvi rájes 5. sotnabeaivvi rádjái beassážiid maŋŋil*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Hearrámet, bokte. Son lea duohta beassášlappis guhte lea guoddán min sudduid, ja bajásčuožžileamis bokte lea son vuoitán jápmima badjel. Su bokte máidnot engelat du hearvásvuoda, ja du searvegoddi almmis ja eatnama alde rávida du nama ovttamielalaš ávuin. Singuin mii ge áigut ovttahttit jienaideamet ja rohkadaladettiin lávlut:

*Helladuorastaga rájes ja 6. sotnabeaivvi rádjái beassážiid maŋŋil*

L Duodaid lea dohkálaš ja riekta ahte mii álelassii ja juohke báikkis rámidit du, bassi Herra, buotveagalaš Áhčči, agálaš Ipmil, Jesus Kristusa, Hearrámet bokte, guhte manai bajás albmái ja dál čohkká du olgeš gieda bealde ja álelassii rohkadallá min ovddas. Su bokte máidnot engelat du hearvásvuoda, ja du searvegoddi almmis ja eatnama alde rávida du nama ovttamielalaš ávuin. Singuin mii ge áigut ovttahttit jienaideamet ja rohkadaladettiin lávlut:

*Hellodagat*

*L* Duodaid lea dohkálaš ja riehta ahte mii álelassi ja juohke báikkis rámidit du, bassi Hearrá, buotveagalaš Áhčči, agálaš Ipmil, Jesus Kristusa, Hearrámet, bokte, dasgo son truvdnida du olgeš gieđa bealde, ja lea vuolggahan Bassi Vuoiŋŋa su duodašteddjiid badjelii, vai du álbmot beasašii ávvudit iluin, ja sárdnut du stuorra daguid birra eatnat gillii. Su bokte máidnot engelat du hearvásvuoda, ja du searvegoddi almmis ja eatnama alde rámidat du nama ovttamielalaš ávuin. Singuin mii ge áigut ovttastahttit jienaideamet ja rohkadaladettiin lávlut:

## **Bassi SANCTUS**

*S* Bassi, bassi, bassi lea Hearrá Sebaot,  
oppa eanan lea dievva su hearvásvuodas.

Hosianna allagasas.

Buessivdniduvvon lehkos son guhte bohta Hearrá nammii.

Hosianna allagasas.

### *Jogo A*

*L* Bajásčuožžilan Hearrá ja Beasti, mii máidnut ja rámidit du bassi nama, go don addet iežat min sudduid ovddas. Dutnje lehkos gudni ráhkisvuoda ovddas mii lea gievrrat go jápmin. Veahket min geat bohtit du beavdá, oazžun dihtii du rupmaša ja vara, vuostáiváldit daid bassi mállásiid vuollegašvuodain ja duodalašvuodain. Ovttastahte min iežainat dego ovssiid viidnemuorain. Oahpat min ráhkistit guhtet guimmiideamet nugo don leat ráhkistan min, ja suova min oktii čoahkkanit du lusa du ollašuvvan riikii.

**Dás čuovvu Hearrá rohkos ja Hearrá áhahussánit.**

### *Dahje B*

*L* Mii máidnut du, bassi Ipmil, almmi ja eatnama Hearrá, guhte leat ráhkistan máilmmi ja addán Bártnát, Jesus Kristusa, vai son beaštášii min suddus ja jápmimis eret ja vuoittášii dutnje bassi álbmoga. Oskkodettiin sutnje ja buot du mánáid searvevuodas mii rohkadallat dan rohkosa man du Bárdni lea oahpahan midjiide:

**Dás čuovvu Hearrá rohkos ja Hearrá áhahussánit.**



## Hearrá rohkos

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddáí eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddáí eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddáí mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## Hearrá ásahussánit VERBA

Ľ Hearrámet Jesus Kristus, dan ija go son behttojuvvui, de

válddii láibbi,

(liturga váldá láibediskka)

giittii, doadjalii dan, attii máhttájeddjiidasas ja celkkii: Váldet dán ja borret. Dát lea mu rumaš, mii addojuvvo din ovddas. Dahket dan muitin dihtii mu.

Nu son válddii geara ge eahkedismállásiid maŋŋil,

(liturga váldá geara)

giittii, attii sidjiide ja celkkii: Juhket buohkat das. Dát gearra lea odđa lihttu mu varas mii golggahuvvo din ovddas suttuid ándagassii addojupmin. Dahket dan, nu dávjá go juhkabehtet dan, muitin dihtii mu.

*Jogo A*

Dás čuovvu **Buhtes Ipmil Láppis**

*Dahje B*

*L* Hearrá, mii ávvudit dáid mállásiid iluin ja giitosiin du ollašuvvan oaffara ovddas, ja oskkodettiin du bajásčuožžileapmái ja albmáimannamii mii vuordit du hearvás boahtima. Mii rohkadallat, suovašit min guđet boahit du beavdái vuostáiváldit du rupmaša ja vara, loaiddastit du muođuid ovdii vuollegis ja duođalaš váimmuiguin. Ovttašte min iežainat nugo ovssiid viidnemuorain, oahpat min ráhkistit guhtet guimmiideamet nugo don leat ráhkistan min, ja suova min oktii čoagganit du lusa ollislaš riikasat.

## **Buhtes Ipmil Láppis    AGNUS DEI**

*S* Buhtes Ipmil Láppis, guhte guddet máilmmi suttu, árpmit min badjelii.

Buhtes Ipmil Láppis, guhte guddet máilmmi suttu, árpmit min badjelii.

Buhtes Ipmil Láppis, guhte guddet máilmmi suttu, attášit du ráfi.

## **18 Hearrá eahkedismállásat**

*L* **sáhtta cealkit, searvegoddái čalmmiid**

Bohtet, dasgo buot lea gárvvistuvvon.

**Vuosttaš áltárguossit mannet áltára ovdii čippostit. Searvegoddi muđuid čohkkeda.**

Juogadeami botta searvegoddi ja koarra lávlu vuogas sálmmaid, soaitevaš biibbalaš sálmma.

Vuogas musihkka dahje lávlu sáhtá maiddái geavahuvvot. Oassi dan doaimmas sáhtá maiddái leat jaska.

Juogadeamis liturga sáhtá oažžut veahki báhpas dahje eará dohkkehuvvon veahkeheaddjis.

Dat guhte veahkeha, boahá áltáree easka go juogadeapmi álggahuvvo.

Liturga juogada láibbi.

Juogadansánit leat:

Dát lea Jesusa rumaš.

Dát lea Jesusa varra.

Láibi biddjojuvvo áltárguossi rabas gihtii. Go viidni juogaduvvo, de sáhtá geavahit oktasaš kálkka dahje sierra kálkka. Go sierra kálka geavahuvvo, de áltárguossi ieš doallá kálkkas.

Doaimmaheaddji báhppa buressivdnida gieđa bidjamiin dahje ruossa mearkkain mánáid guđet leat mielde bassi eahkedismállásiin, eai ge vuostáiváldde láibbi ja viinni.

Buressivdnádussátnin rávvejuvvojit čuovvovaš sánit:

(Hearrá) Jesus/Ipmil buressivdnidivččii du ja várjalivččii du.

(Hearrá) Jesus/Ipmil buressivdnidivččii du ja várjalivččii du buot bahás eret ja dolvošii du agálaš eallimii.

(Hearrá) Jesus/Ipmil buressivdnidivččii du ja várjalivččii du gástta árpmus agálaš eallimii.

Juogadeami manjil liturga dadjá:

Russiinávlejuvvon ja bajásčuožžilan Jesus Kristus lea dál addán didjiide (midjiide, munnuide, dutnje, dudnuide) bassi rupmašis ja varas, man son attii lonástussan buot din (min) suttuid ovddas. Son nannešii ja bisuhivččii din (min) duohta oskkus agálaš eallimii. Ráfi lehkos dinguin.

Eahkedismállásat sáhttet lágiduvvot "jotkojuvvon kommuniuvdnan". Juohke áltárguossi manná čohkkedit go lea ožžon láibbi ja viinni, ja nubbi eará váldá rabas saji.

Eahkedismálissávaldat ("Russiinávlejuvvon ja bajásčuožžilan") ja ráfidearvuođat ("Ráfi lehkos dinguin") celkojuvvojit go buohkat leat čohkkedan sajiidasaset girkus.

Lea maiddái vejolaš cealkit eahkedismálissávaldaga dušše oktii, go buohkat leat čohkkedan.

Dalle liturga cealká ráfidearvuođaid juohke čipostallamii gaskkalduhtekeahhtái sálbmálavluma ja orgelmusihka. Ráfidearvuođat guđđojuvvojit loahpaheaddji eahkedismállásiid-sávaldagas.

Juogadeami maŋŋil liturga bidjá diskka kálkka ala ja gokčá dan kálkaliinniin.

## **19 Giittuskolleakta eahkedismállásiid ovddas**

Go buot eahkedismálisguossit leat čohkkedan fas, de liturga dadjá:

*L searvegoddái čalmmiid*  
Giitot ja rohkadallot.

*L áltárii čalmmiid*  
Mii giitit du, almmálaš Áhččámet, du buressivdniduvvon attáldagaid ovddas. Mii rohkadallat dus ahte don dáid attáldagaiguin várjalivččet min, vai mii bisošeimmet oskkus dutnje, ovttahtášit min ráhkisvuodainat ja nannešit midjiide agálaš eallima doaivaga, du Bártni, Jesus Kristusa, Hearrámet, dihtii.

S Amen

## **V - LOAHPAHEAPMI:**

### **BURESSIVDNÁDUS BÁLVALUSSII**

## **20 Loahpahansálbma**

## 21 Buressivdnáduš ja vuolggahuš

*Jogo A*

### Máidnun BENEDICAMUS

*L dahje O searvegoddái čalmmiid*

*L* Máidnot Hearrá.

*Searvegoddi čuožžila ja čuožžu postludia rádjái.*

*S* Máidnojuvvon lehkos Ipmil. Halleluja, halleluja, halleluja.

*Dahje B*

### Dearvvuođat SALUTATIO

*L* Hearrá lehkos dinguin.

*Searvegoddi čuožžila ja čuožžu postludia rádjái.*

*S* Ja Hearrá lehkos duinna.

*L* Hearrá buressivdnidivččii du ja várjalivččii du.

Hearrá divttášii muođuidis čuovgat du badjelii  
ja livččii dutnje árbmugas.

Hearrá bajdivččii čalmmiidis du ala  
ja attášii dutnje ráfi. †

*S* Amen, amen, amen.

*Dás sáhtá čuovvut:*

### Loahpahanrohkos

*Luhkkár sáhtá rohkadallat koarrauvsas*

Herrá, mii giitit du go don leat oahpahan midjiide maid don dáhtut min dahkat. Veahket dál min, Ipmileamet, Bassi Vuoiŋŋat bokte Jesus Kristusa dihtii, vai mii vurkešeimmet du sáni buhtes váibmui, nannejuvvošeimmet oskui dan bokte, buoriduvvošeimmet bassi eallingeardái, ja eallimis ja jápmimis oččošeimmet das jeddehusa.

*S* Amen

Čuovvovaš jaskes botta čuodjalahttojuvvo girkobielluin golmma geardde golbmii.

Liturga sáhtta dás joatkit:

*L* Mannet ráfái. Bálvalehket Herrá iluin.

## **22 Loahpaheapmi**

Liturga manná eret áltáris.

*Jogo A*

## **Postludia**

*Dahje B*

## **Olggosmannanlávlla**

Searvegoddi manná lávllu girkus olggos.

# KOLLEAKTAROHKOSAT

Girkojagi kolleaktarohkosat sáhttet geavahuvvot máŋgga ortnegis.

Sotnabeivviid ja eará bassebeivviid sáhttá válljet beaivvi kolleaktarohkosa.

Árgabeivviid (earret lávvordaga) sáhttá geavahit ovddit sotnabeaivvi kolleaktarohkosa.

Lávvordagaid geavahuvvo čuovvovaš sotnabeaivvi kolleaktarohkos, muhto ii leat nu ovdal girkojagi erenoamážit merkejuvvon beivviid.

Go kolleaktarohkos messejuvvo, de geavahuvvo sierra nuohtta dahje sierra sojahanminsttar.

## *1. adveantasotnabeaivi*

Buotveagalaš Ipmil, mii máidnut ja rámidit du go don leat bidjan Bártnát, Jesus Kristusa, min gonagassan ja fasttain suovat min álggahit ođđa árbmojagi girkustat. Atte midjiide Bassi Vuoiŋŋat, vai mii dovddašeimmet su go son odne bohtá bálvaleddji hámis, ja vai son dovddašii min ge go oktii bohtá hearvásvuodastis, son guhte eallá ja ráđde du ja Bassi Vuoiŋŋa searvevuodas, okta duohta Ipmil agálašvuodas agálašvuhtii.

## *2. adveantasotnabeaivi*

Herrá Jesus Kristus, guhte máhcat stuorra fámuin ja hearvásvuodain, mii rohkadallat: Bovtte min fuollameahttunvuodas ja behtolaš oadjebasvuodas, ja oahpat min gohcit ja rohkadallat. Doala min gitta sániinat, vai mii du árpmu nana dorvvuin vuorddášeimmet ilolaččat du bohtima, don guhte ealát ja ráđdet Áhčiin ja Bassi Vuoiŋŋain, okta duohta Ipmil agálašvuodas agálašvuhtii.

## *3. adveantasotnabeaivi*

Váibmoládis Ipmil, guhte diktet Bártnát šaddat olmmožin, vai son beasttášii min suddus ja jápmimis ja Sáhtána fámus. Mii rohkadallat: Leage min luhtte go mii eahpidišgoahdit ja fallehuvvot, vai mii doalašeimmet gitta oskkus Jesus Kristusii ja ráhkadivččiimet su geainnu eatnama alde, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

#### *4. adveantasotnabeaivi*

Agálaš Ipmil, mii giitit du go don leat vuolggahan profehtaid ja áirasiid duodaštan dihtii Bárnát Jesus Kristusa birra. Atte midjiide árpmu vuostáiváldit oskkuin sin duodaštusa, vai mii singuin gudnejahtášeimmet Beasti ja ávvudivččiimet su riegateami bassi ávuin du girkus, su guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *Juovlaruohtta*

Herrá Ipmil, almmálaš Áhčči, mii giitit du go don vuolggahit Bárnát máilbmái čoavdit min seavdnjadasa fámus. Suova min eallit su čuovgasis ja doalvut su sáni buohkaide guđet čohkkájit seavdnjadasas ja jápminsuoivanis, vai dát stuorra illu olášii buot álbmogiidda, du Bártni Jesus Kristusa bokte, guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *Juovlabeaivi*

Herrá Ipmil, almmálaš Áhčči, mii máidnut ja rámidit du go diktet Bárnát šaddat olmmožin, ja su bokte leat beastán min suddus ja jápmimis ja addán midjiide agálaš ilu. Mii rohkadallat: Atte midjiide Bassi Vuoiŋnat, vai mii giitosiin ja gopmirdemiin vuostáiválddášeimmet dan bestojumi ja oktii searvvašeimmet engeliid máidnunlávlumii buot du mánáiguin, du Bártni Jesus Kristusa, Hearrámet bokte, guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *Nubbi juovlabeaivi (Stefanusbeaivi)*

Buotveagalaš Ipmil, guhte leat lohpidan leat duodašteddjiidatguin, mii giitit du buohkaid ovddas guđet vuosteháguin ja doarrádallojumiin ledje oskkáldasat evangeliumii jápmima rádjái. Mii rohkadallat: Leage buohkaid luhtte guđet odne gillájit du nama dihtii. Suova min doallat gitta buori dovddastusas ja rohkadallat min vuostálastiid ovddas, du Bártni Jesus Kristusa, Hearrámet bokte, guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *Sotnabeaivi juovllaid maŋŋil*

Agálaš Ipmil, almmálaš Áhčči, guhte stuorra buorre vuodastat vuolggahit Bárnát min lusa ja dahket su buot álbmogiid čuovggasin, mii rohkadallat: Atte midjiide Bassi Vuoiŋnat, vai mii oainnášeimmet du bestojumi, bálvalivččiimet du gulolačat ja oktii vuolggášeimmet dáppe ráfis du sáni mielde, du Bártni Jesus Kristusa, Hearrámet bokte, guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.



### *Ođđajagi ruohtta*

Buotveagalaš, árpmolaš Ipmil, don leat leamaš midjiide orrunvistin buolvvas bulvii, ja du gonagasriika ii goassege lihkahuvvo. Mii rohkadallat: Atte midjiide ándagassii Kristusa dihtii go mii nu dávjá leat vajáldahtán du ja geavahan áigámet ja návccaideamet duššálažžan. Suova min šaddadit šattuid oskkodettiin sutnje guhte lea oskku álggaheaddji ja ollašuhti, vai mii ealášeimmet oanehis eallinahkámet dáppe eatnama alde du dáhtu mielde ja de šattašeimmet agálaččat ávdugassan, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiññain, okta duohta Ipmil agálašvuodas agálašvuhtii.

### *Ođđajagi beaivi (Jesusa nammabeaivi)*

Agálaš Ipmil, don vuolggahit Bártnát máilbmái ja addet sutnje nama Jesus, vai son beasttášii álbmogis sin suttuin. Mii giitit du go son lea dat seammá ikte ja odne ja agálaš áigái. Basut su nammii dan jagi mii lea min ovddabealde, vai mii oadjebasat vuostáiválddášeimmet boahhte áiggi, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiññain, okta duohta Ipmil agálašvuodas agálašvuhtii.

### *Kristusa almmustusbeaivi*

Agálaš Ipmil, buotveagalaš Áhčči, don leat diktán sánát báitit midjiide duohta nástin, ja dainna láidet min Jesus Kristusa lusa. Mii rohkadallat: Atte midjiide Bassi Vuoiññat, vai mii čuvošeimmet Sáni čuovgasa ja ovddidivččiimet du riikka dáppe min luhtte ja buot álbmogiid gaskkas, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiññain, okta duohta Ipmil agálašvuodas agálašvuhtii.

#### *1. sotnabeaivi Kristusa almmustusbeaivvi maññil*

Hearrá Ipmil, almmálaš Áhčči, don diktet ráhkis Bártnát Jesus Kristusa gásttašuvvot jápmit min suttolaš olbmuid ovddas. Mii giitit du go mii leat gásttašuvvon su jápmimii ja bajásčuožžileapmái ja dan bokte leat šaddan agálaš eallima árbbolažžan. Suova min dahkat beaivválaš jorgalusa, vai ođđa olmmoš šattašii min siste, ja mii joavddašeimmet eallima bajásčuožžileapmái, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiññain, okta duohta Ipmil agálašvuodas agálašvuhtii.

#### *2. sotnabeaivi Kristusa almmustusbeaivvi maññil*

Hearrá Ipmil, almmálaš Áhčči, mii giitit du go don leat diktán boahitit ođđa bestojumi áiggi árpmuin ja ráfiin Hearrámet Jesus Kristusis. Veahket min, vai mii oainnášeimmet du Bártni fámu ja hearvásvuoda ja beasašeimmet juhkat dan ádjagis mii addá agálaš eallima, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiññain, okta duohta Ipmil agálašvuodas agálašvuhtii.

### *3. sotnabeaivi Kristusa almmustusbeaivi maŋŋil*

Buotveagalaš, agálaš Ipmil, mii rohkadallat ahte don árpmolaččat geahčat min headjuvuoda beallái, ja geiget fámoláš gieđat suodjalit min bahá vašálačča vuostái, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *4. sotnabeaivi Kristusa almmustusbeaivi maŋŋil*

Agálaš Ipmil, buotveagalaš Áhčči, guhte dovddat min návccahisvuoda ja diedát ahte mii dávjá leat muoseheamit ja balus, árpmat min ja veahket min buot geahččalusain ja heđiin, nu ahte don daiguin nannet min oskku ja čanat min nannosabbot Bárdnásat, Jesus Kristusii, Hearráseamet, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *5. sotnabeaivi Kristusa almmustusbeaivi maŋŋil*

Hearrá Ipmil, almmálaš Áhčči, mii giitit du go don leat gilván sánát min váimmuide. Veahket min Bassi Vuoiŋnainat vuostálastit vašálačča gávvilis fallehemiid ja vurket Sáni, vai mii šaddadivččiimet šattuid du riikii, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *Viidnegárdesotnabeaivi*

Váibmoládis Ipmil, don leat rávkan min sániinat bargat girkustat dáppe eatnama alde. Atte midjiide Bassi Vuoiŋnat, vai mii vádjolivččiimet du dáhtu mielde eat ge bijaše doivomet iežamet ánsšáseapmái, muhto dan árbmui man don leat čájehan nu valljugasat midjiide Bártnistat Jesus Kristusis, Hearráseamet, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *Gilvisotnabeaivi*

Almmálaš Áhčči, mii giitit du go don árpmustat leat gilván sánát deike min gaskii. Atte midjiide Bassi Vuoiŋnat, vai mii gulašeimmet du sáni rievttuid, vurkešeimmet dan buriid váimmuide ja šaddadivččiimet das šattuid dutnje gudnin, du Bártni Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *Kristusa šearusmahttojumi beaivi*

Váibmoládis, agálaš Ipmil, mii giitit du go don leat almmustahtán Bártnát hearvásvuoda ja diktán evangeliumat čuovgasa báitit midjiide. Mii rohkadallat, ahte mii ge beassat oaidnit su hearvásvuoda dan čuovgasa bokte, vai odne dovddašeimmet

su oskkus ja oktii oainnášeimmet su muodus muhtui, su guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *Sotnabeaivi ovdal fásttu (Fástoláskkáš sotnabeaivi)*

Herrá Jesus Kristus, guhte guddet buot min sudduid, mii giitit du du ráhkisvuoda ovddas mii lea gievrrat go jápmin. Veahket min čuovvut du gillámušat geainnu mielde. Atte midjiide oasi dan bestojumis man vuitet jápmimiinnát ja bajásčuožžilemiinat, ja doalvvo min fámolaš giedainat eallima ja jápmima ja duomu čada agálaš illui, don guhte ealát ja ráddet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

#### *Gutnagaskavahkku*

Herrá, Ipmileamet, suova min váldit min ruossa ja čuovvut Kristusa, vai mii doalašeimmet rivttes fásttu du dáhtu mielde. Daga min gierdavažžan rohkadallamis ja oskkáldassan ráhkisvuodas, vai mii váimmusteamet soadašeimmet vanhurskkisvuoda ovddas, du Bártni Jesus Kristusa, Hearrámet bokte, guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *1. fástosotnabeaivi*

Herrá Jesus Kristus, don ledjet bissovaš buot geahččalusain ja vuitet bahá badjel. Oahpat min dán fástoáiggi eallit du sánis, amas bahá vašálaš oažžut fámu min badjel. Láide min, vai mii čuvošeimmet du biehttaleamis ja oskkus, ja atte midjiide fámu bálvalit du oppa váimmuin, don guhte ealát ja ráddet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

#### *2. fástosotnabeaivi*

Buotveagalaš Ipmil, almmálaš Áhčči, guhte gulat min go mii átnut dus veahki, mii rohkadallat: Nanne min oskku du árbmui ja váibmoláđisvuhtii, vai mii doalašeimmet gitta du sánis vaikko mii leat dohkkemeahtumat. Divtte min gávdnat veahki ja gáddjojumi du luhtte buot vuostegiedageavadiin, heđiin ja geahččalusain, du Bártni Jesus Kristusa, Hearrámet bokte, guhte eallá ja rádde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *3. fástosotnabeaivi*

Herrá Jesus, fámolaš beasti, mii máidnut du bassi nama, don guhte leat vuoitán beargalaga badjel ja suodjalat min bahá vašálačča vuostái. Mii rohkadallat: Leage min luhtte buot geahččalusain, várjal min čevláivuodas, ja doala min gitta sániinat, don guhte ealát ja ráddet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

#### *4. fástosotnabeaivi (gaskafástu)*

Váibmoládis Ipmil, guhte Bártnát bokte leat buressivdnidan min nu valljugasat attáldagaidatguin, suova min vuostáiváldit su rivttes eallima láibin, ja juogadit su rikkisvuoda buot álbmogiiguin, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *5. fástosotnabeaivi*

Almmálaš Áhčči, mii giitit du go don leat diktán Bártnát Jesus Kristusa jápmit min ovddas ja šaddat ođđa lihtu gaskaolmmájin. Mii rohkadallat: Buhtis min, vai mii oskkodettiin sutnje beasašimmet bálvalit du, ealli Ipmila, ja oččošeimmet agálaš árbbi man don leat lohpidan midjiide, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *Márjjábeaivi*

Buotveagalaš Ipmil, almmálaš Áhčči, mii máidnut du go don diktet Bassi Vuoiŋna boahtit Márjjá badjelii, vai son šattašii su eadnin guhte duođaid gohčoduvvo du Bárdnin, ja maiddá lei olmmoš nugo mii. Atte midjiide dan oskku mii Márjjás lei, vai mii ge rohkadalašeimmet du vuollegašvuodas ja illudivččiimet du bestojumi dihtii masa don leat mearridan min ovdal go máilbmi sivdniduvvui, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

#### *Pálbmasotnabeaivi*

Hearrá Jesus Kristus, don ledjet gulolaš jápmima rádjái, ruossa jápmima rádjái, ja ožžot dan nama mii lea buot namaid badjel. Mii rohkadallat: Atte midjiide oskku bokte oasi dan bestojumis man don buktet gillámušainat ja jápmimiinnát, vai mii čuvošeimmet du vuollegašvuodas ja gulolašvuodas ja dovddastivččiimet du min beastin ja gonagassan, don guhte ealát ja ráđdet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

#### *Skilleduorastat*

Hearrá Jesus Kristus, mii giitit du go don leat ásahan bassi eahkedismállásiid, maiguin attát midjiide iežat rupmaša ja vara sudduid ándagassii addojupmin ja ovttastahtát min duinna ja girkuinat almmis ja eatnama alde. Suova min vuostáiváldit dáid attáldagaid rievttuid ja ovdánit beaivválaččat oskui, doivvui ja ráhkisvuhtii, dassáži go mii čoagganit du lusa du almmálaš riikii, don guhte ealát ja ráđdet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

### *Beassášbeaivi*

Buotveagalaš Ipmil, almmálaš Áhčči, mii máidnut du bassi nama ja giitit du stuorra árpmu ja váibmoládisvuoda ovddas ahte don addet Bártnát min suttuid dihtii ja bajásčuoččáldahttet su, vai mii dahkkojuvvošeimmet vanhurskkisin du muođuid ovddas. Mii rohkadallat: Atte midjiide Bassi Vuoiŋnat, vai mii ealášeimmet su bajásčuožžileami fámus ja dán eallima maŋŋil boktojuvvošeimmet agálaš eallimii, du Bártni, Jesus Kristus, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *Nubbi beassášbeaivi*

Hearrá Jesus Kristus, guhte bajásčuožžilit jábmiid luhte ja almmustahttet iežat máhttájeddjiidasat, mii rohkadallat, ahte don Sáni ja sakramenttaid bokte almmustahtášit du vuoiŋtu maiddá midjiide, vai mii ealášeimmet du searvevuodas ja duođaštivččiimmet du bajásčuožžileami, don guhte ealát ja ráđdet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

### *1. sotnabeaivi beassáziid maŋŋil*

Hearrá Jesus Kristus, mii giitit du du bassi evangeliuma ja mávssolaš sakramenttaid ovddas, maiguin don bajásčuožžilan Beastin ja Hearrán gávnnadit minguin. Mii rohkadallat: Láide girkot Bassi Vuoiŋnainat, vai dat oskkáldasvuodas dutnje sárdnidivččii du jápmima ja bajásčuožžileami, don guhte ealát ja ráđdet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

### *2. sotnabeaivi beassáziid maŋŋil*

Váibmoládis Ipmil, guhte leat bidjan Bártnát min čadjádallan olbmuid báimmanin, vai son biepmášii min sániinis ja suodjalivččii min bahá vašálačča vuostái. Mii giitit du go dat báimman dovdá min ja atná mis fuola headis, ja mii rohkadallat ahte maiddá mii ge beasašeimmet dovdat su ja oppa váimmusteamet čuvošeimmet su jiena, su guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *3. sotnabeaivi beassáziid maŋŋil*

Hearrá Jesus Kristus, guhte leat geaidnu, duohtavuolta ja eallin, don leat rávkan álbmogat čuovvut du vuosteháguid ja átestusaid čađa hearvásvuhtasat. Atte midjiide oadjebas dorvvu lohpadusasat ahte átestusat bistet dušše oanehassii ja dasto čuovvu agálaš illu, don guhte ealát ja ráđdet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

#### *4. sotnabeaivi beassážiid maŋŋil*

Herrá Ipmil, almmálaš Áhčči, guhte Bártnát Jesus Kristusa bokte leat lohpidan midjiide Bassi Vuoiŋŋa, vai son livččii min bealušteaddji ja oahpistivččii min olles duohtavuhtii. Mii rohkadallat: Nanne min oskku Jesusii, ja atte midjiide rivttes ráhkisvuoda, vai mii fuolalaččat veahkehivččiimet guhtet guimmiideamet agálaš eallima guvlui, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

#### *5. sotnabeaivi beassážiid maŋŋil*

Herrá Ipmil, almmálaš Áhčči, mii giitit du go don leat lohpidan addit midjiide buot dan maid mii rohkadallat Jesusa nammii. Oahpat min Bassi Vuoiŋŋat bokte rohkadallat rievttuid, vai mii dorvvasdettiin du lohpadussii ealášeimmet rohkadallama searvevuodas duinna ja buot du álbmogiin, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

#### *Helloduorastat*

Bassi Ipmil, almmálaš Áhčči, don leat bajidan Bártnát Jesus Kristusa vuolidumis ja gillámušas ja addán sutnje agálaš ráđdejumi. Mii rohkadallat: Suova min su nammii sárdnidit jorgalusa ja sudduid ándagassii addojumi buot álbmogiidda, dassáži go son máhccá ja hukse fas riikkas hearvásvuodas, son guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

#### *6. sotnabeaivi beassážiid maŋŋil*

Herrá Ipmil, almmálaš Áhčči, guhte Bassi Vuoiŋŋat bokte leat rávkan min duodaštit Bártnát Jesus Kristusa birra. Go máilbmi ii gierdda dán duodaštusa, muhto álelassii vuostálastá dan, de mii rohkadallat, ahte attášit midjiide roahkkatvuoda leat oskkáldasat dan rávkojupmái, maiddái ruossa ja átestusaid vuolde, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

#### *Hellodatruohtta*

Herrá Jesus Kristus, don leat lohpidan deavdit girkot allagasa fámuin. Mii rohkadallat: Deavdde min ge Bassi Vuoiŋŋainat, vai mii oččošeimmet odđa fámu, bálvalivččiimet du iluin ja livččiimet ealli čázi ájan dáppe máilmmis, don guhte ealát ja ráđdet Áhčiin ja Bassi Vuoiŋŋain, okta duohta Ipmil agálašvuodas agálašvuhtii.

### *Hellodatbeaivi*

Agálaš Ipmil, almmálaš Áhčči, mii máidnut ja rámidit du bassi nama, don guhte diktet Vuoiŋŋa dola gahččat apoastaliid ala ja ráhkadit alcesat álbmoga buot sohkaŋgottiin ja gielain. Mii rohkadallat: Ođasmahte ja várjal girkot Sáni ja sakramenttaid bokte. Oahpis min Vuoiŋŋat bokte olles duohtavuhtii, vai mii bisošeimmet nanusin oskkus, buollin ráhkisvuodas ja roahkkadin agálaš eallima doaivvus, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

### *Nubbi hellodatbeaivi*

Hearrá Ipmil, almmálaš Áhčči, don leat addán midjiide Bártnáat, amas oktage lámppot guhte osku sutnje, muhto vai son oažžu agálaš eallima. Mii rohkadallat: Vuolggat Bassi Vuoiŋŋat min lusa, vai sátni Jesusa birra eallášii min váimmuin ja mii oččošeimmet dan oskku mii beastá min duomus ja dahká min agálaččat ávdugassan, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

### *Golmmaoktavuoda sotnabeaivi (Trinitatis sotnabeaivi)*

Golmmaoktalaš Ipmil, Áhčči, Bárdni ja Bassi Vuoiŋŋa, mii giitit du gástta ovddas du bassi nammii, mas mii riegádit ođđasis čázis ja Vuoiŋŋas. Nanne min oskku dutnje, vai mii juohke beaivvi ealášeimmet gástta árpmus ja buvttášeimmet evangeliuma buot álbmogiidda, don guhte ealát ja ráđđet, okta duohta Ipmil agálašvuodas agálašvuhtii.

### *2. sotnabeaivi hellodagaid maŋŋil*

Váibmoládis Ipmil, don leat oskkildan midjiide hálddašit eatnama riggodagaid vuoigatlaččat. Mii rohkadallat: Suova min gullat sánat rievttuid, amamet giddanit áiggálaš omiide ja vajáldahttit du ja agálaš mihttomeari man don leat bidjan min ovdii. Oahpat min čájehit váibmoládisvuoda, vai mii fuobmášeimmet lagamužžamet heađi ja juogadivččiimet du attáldagaid guhtet guimmiideametguin. Veahket min soahat vuoigatvuoda ja ráfi ovddas máilmmis, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

### *3. sotnabeaivi hellodagaid maŋŋil*

Váibmoládis Ipmil, mii giitit du go don bovdet min suddolaš olbmuid du ja kristtalaš searvegotti searvevuhtii. Veahket min, amamet diktit maidege hehttet min čuovvumis du rávkajumi, muhto vai mii vuostáiválddášeimmet dan iluin ja čoagganivččiimet giitosiin ja oskkuin deike eatnama ala ja oktii du riikii ge, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋŋain, okta duohta Ipmil agálašvuodas agálašvuhtii.

*4. sotnabeaivi hellodagaid maŋŋil*

Almmálaš Áhčči, don it goassige vajáldahte čádjidan mánáidat, muhto ozat ollis ráhkisvuodain sin gudet leat láhppon. Atte midjiide Bassi Vuoiŋŋat, vai mii gáđašeimmet sudduideamet ja jorgalivččiimet dutnje oskkodettiin du lohpadussii ahte don attát midjiide ándagassii, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*5. sotnabeaivi hellodagaid maŋŋil*

Agálaš, buotveagalaš Ipmil, guhte leat vánhurskkis ja váibmoládis duopmár, čoavdde min dubmenhálus ja gáđašvuodas, vai mii ráhkisvuodas livččiimet guhtet guoibmáseamet gierdavaččat. Čájjet baicca midjiide mo mii sáhttit veahkehit guhtet guimmiideamet ovddosguvlui gitta dan beaivvi rádjái go mii buohkat galgat logu dahkat, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*6. sotnabeaivi hellodagaid maŋŋil*

Agálaš Ipmil, guhte geavahat heajos ja suddolaš olbmuid bálvalusastat, mii giitit du go don rávket apoastaliid ja vuodđudit girkot eatnama ala. Veahket min buohkaid bálvalit du min árpmuattáldagaiguin ja návccaiguin, vai mii searválagaid huksešeimmet searvegoddámet áidna duohta vuodu ala mii lea Jesus Kristus, du Bárdni, min Hearrá, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*7. sotnabeaivi hellodagaid maŋŋil*

Bassi Ipmil, mii giitit du bestojumi ovddas Jesus Kristusis ja odđa eallima ovddas man don leat addán midjiide su siste. Oahpat min dus ballat ja du ráhkistit, vai mii vuostáiválddášeimmet du bagadusa ja báhkkomiid, biehttalivččiimet iežamet ja čuvošeimmet Hearrámet Jesus Kristusa oskkus ja gulolašvuodas, su guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*8. sotnabeaivi hellodagaid maŋŋil*

Váibmoládis Ipmil, mii giitit du go don leat atnán mis fuola sihke rupmaša ja sielu bealis, ja Jesus Kristusis leat almmustahtán midjiide ahte du bestojupmi fátmasta oppa min eallima. Čoavdde min buot áiggálaš morrašiin, vai mii livččiimet oadjebasat go oskut du fápmui. Oahpat min juogadit attáldagaidat min lagamuččain dáppe ja buot álbmogiiguin, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.



*9. sotnabeaivi hellodagaid maŋŋil*

Bassi Ipmil, guhte gozihat girkot, mii giitit du buohkaid ovddas guđet sárdnidit du sáni oskkáldasvuodain. Suova min gullat Sáni ja dahkat dan mielde ja čuožžut nanusin buot vearríoahpaheddjiid vuostái. Divtte evangeliuma sárdniduvvot čielgasit ja buhttásit dáppe min luhtte ja gitta máilmmi loahpa rádjái, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*10. sotnabeaivi hellodagaid maŋŋil*

Agálaš Ipmil, almmálaš Áhčči, buot buorit ja olles attáldagat bohtet dus. Suova min bálvalit du oskkáldasvuodain ja geavahit attáldagaidat min lagamužžii ávkin, vai don dovddašit min rivttes dálloallin go mii oktii dahkat logu buot dan ovddas maid mii leat ožžon, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*11. sotnabeaivi hellodagaid maŋŋil*

Agálaš Ipmil, almmálaš Áhčči, mii giitit du du Bártni, Jesus Kristusa ovddas, geas lea agálaš eallima sátni Israela sohki ja buot álbmogiidda bestojupmin. Suova min dus ballat ja du ráhkistit, amamet buoššudit iežamet ja hilgut du árpmolaš rávkajumi, muhto vai mii gulašeimmet du jiena juohke gearddi go don sártnut midjiide, Bártnát, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*12. sotnabeaivi hellodagaid maŋŋil*

Bassi Ipmil, guhte árpmihat suddolaččaid, várjal min goargatvuodas ja behtolaš oadjebasvuodas. Cuvke min čeavláivuoda ja goargatvuoda ja atte midjiide rivttes gáhtamuša ja beaivválaš jorgalusa, vai mii dorvvastivččiimet du árbmui ahte mii ánsšáškeahhtái dahkkojuvvot vánhurskkisin go oskut Jesus Kristusii, du Bárdnái, Hearráseamet, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*13. sotnabeaivi hellodagaid maŋŋil*

Buotveagalaš Ipmil, guhte leat sivdnidan buot, mii giitit du heakka ja miela ja dáidduid ovddas maid don leat addán midjiide. Mii máidnut du eatnama čáppisvuoda, heakka ja dearvvašvuoda dihtii, buot dan dihtii mii diktá min dovdat du buorre vuoda. Mii rohkadallat dus guldaleaddji beljiid ja čovdojuvvon njuokčamiid, vai mii gulašeimmet du sáni, rámidivččiimet du giitevaš váimmuiguin ja duođaštivččiimet sániiguin ja daguiguin du stuorra daguid, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*14. sotnabeaivi hellodagaid maŋŋil*

Váibmoládis Ipmil, guhte leat ráhkistan min nu ahte vuolggahit Bártnat min sudduid lonástussan, mii rohkadallat: Oahpat min ráhkistit du buot eanemusat ja min lagamučča nugo iežamet, vai mii daguiguin čájehivččiimet ráhkisvuohtamet buohkaide geaiguin don divttát min deaivvadit ja geat dárbbasit min veahki ja fuola, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

*15. sotnabeaivi hellodagaid maŋŋil*

Agálaš Ipmil, geas lea fápmu čuoččáldahttit buhcciid ja addit midjiide heajos olbmuide ođđa fámu ja návccaid, mii rohkadallat: Divtte Bassi Vuoiŋnat muittuhit midjiide buriid daguidat, vai mii álelassii giittášeimmet du du attáldagaid ovddas ja máinnošeimmet ja rámidivččiimet du nama, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

*16. sotnabeaivi hellodagaid maŋŋil*

Áhččámet ja Ipmileamet, mii giitit du máilmmi ovddas man don leat sivdnidan, ja heakka ovddas man don leat addán midjiide. Mii rohkadallat: Suova min eallit dorvvasdettiin du ovddasmorrašii, amamet giddanit áiggálaš morrašiidda, ruhtaváibmilvuhtii, opmodagaide ja eará nohkavaš diŋgaide. Oahpat min ovddimustá ohcat riikkat ja vanhurskkisvuođat ja dorvvolaččat bidjat buot min boahhte áiggi du háldui, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

*17. sotnabeaivi hellodagaid maŋŋil*

Hearrámet ja Ipmileamet, mii giitit du go du Bárdni lea vuoitán jápmima badjel, ja du lohpadusa ovddas ge ahte son áigu boktit min ođđa eallimii maŋimuš beaivvi. Atte girkosat fámu sárdnidit eallima sáni jápmima máilmmis, vai buohkat oskugoadášedje sutnje guhte lea bajásčuožžileapmi ja eallin, Jesus Kristus, min Hearrá, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

*18. sotnabeaivi hellodagaid maŋŋil*

Bassi Áhčči, mii giitit du go leat ásahan Jesus Kristusa Hearrán min badjel ja čohkket min du friddja mánnán geat rohkadallat ja giitalit du. Mii rohkadallat: Veahket min, amamet šaddat olbmuid oaiviliid ja báhkomiid vuložin ja amamet viggat dohkket sidjiide eanet go bálvalit du. Daga min du ja min lagamuččaid ilolaš bálvaleddjín, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

*19. sotnabeaivi hellodagaid maŋŋil*

Herrá Ipmil, almmálaš Áhčči, mii giitit du go don Jesus Kristusa bokte leat almmustahtán midjiide dáhtot ja čájehan midjiide ráhkisvuoda geainnu. Mii dovddastit ahte mii iešalddámet leat suddolaččat guđet dávjá beahttit ja jorralit. Mii rohkadallat: Várjal min dorvvuhisvuodas ja fuollameahttunvuodas, ja veahket min soahtat buori soađi oskkodettiin Jesus Kristusii, du Bárdnái, Hearráseamet, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*20. sotnabeaivi hellodagaid maŋŋil*

Váibmoládis Ipmil, guhte Jesusa dihtii attát midjiide min sudduid ándagassii ja veahkehat min rupmaša ja sielu bealis, mii rohkadallat: Cuvke buot dan mii hehte min ohcamis du, ja divtte min álo eallit dan oskkus mii addá vissisvuoda dasa mii doivojuvvo, nana dorvvu dasa mii ii oidnojuvvo, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*21. sotnabeaivi hellodagaid maŋŋil*

Herrá Ipmil, almmálaš Áhčči, guhte leat sivdnidan min nissonin ja olmmájin ja addán midjiide náittosdili du buorin áсахussan. Veahket min hukset ruovttuideamet árvvus anedettiin ja ráhkisdettiin guhtet guimmiideamet ja addit mánáide kristtalaš bagadusa ja áimmahuššama. Veahket min buohkaid, jogo eležit ovttaskassan dahje náittosdilis, addit guhtet guoibmáseamet searvevuoda ja liekkusvuoda, vai mii bálvalivččiimet du oskkáldasvuodain, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*22. sotnabeaivi hellodagaid maŋŋil*

Agálaš Áhčči, almmi ja eatnama Herrá, mii máidnut du go it leat mis guhkkin eret ja čihkosis, muhto boađat min lahka Jesus Kristusis. Čájet midjiide hearvásvuodas ja stuorra daguidat. Čuvge min sániinat ja oaapat buot olbmuid dovdat du, áidna duohta Ipmila, ja su gean don leat vuolggahan, Jesus Kristusa, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

*Gáhtamuš- ja rohkosbeaivi*

Váibmoládis Ipmil, almmálaš Áhčči, guhte gulat buohkaid guđet čurvot du gáhtavaš váimmuin, mii rohkadallat: Atte midjiide buot min sudduid ja fuollameahttunvuodaid ándagassii ja atte midjiide árpmot, vai mii oppa váimmusteamet jorgalivččiimet dutnje ja oppa eallingearddisteamet šaddadivččiimet jorgalusa dohkálaš šattuid, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋŋain, okta duohta Ipmil agálašvuodas agálašvuhtii.

### *Hállemasbeaivi*

Buotveagalaš, agálaš Ipmil, guhte dagat bassin buohkaid guđet oskot Bárdnásat, Jesus Kristusii, buot giitalus ja gudni, fápmu ja viissisvuohta gullá dutnje agálašvuhtii. Mii rohkadallat: Atte midjiide Bassi Vuoiŋnat ja fámot, vai mii čuvošeimmet sin guđet leat soahtan buori soađi, ollašuhttán mátkkiset ja sealluhan oskku. Suova min eallit Hearrás ja jápmit Hearrás, vai mii maiddá joavddašeimmet singuin eallima bajásčuožžileapmái, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

### *23. sotnabeaivi hellodagaid maŋŋil*

Váibmoláđis Ipmil, mii giitit du go don Jesus Kristusa bokte leat sihkkon min suddovealggi, ja su siste attát midjiide áddemeahttun árpmot. Mii rohkadallat: Deavdde min ráhkisvuođainat, amas váibmoláđismeahttunvuohta dahje vašši oazžut saji min luhtte. Oahpat min addit ándagassii guhtet guoibmáseamet nugo don leat addán midjiide ge ándagassii, vai mii searválagaid illudivččiimet du stuorra buorre vuođa dihtii, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

### *24. sotnabeaivi hellodagaid maŋŋil*

Buotveagalaš Ipmil, guhte leat bidjan olbmuid hukset vuoigatlaš ja ráfálaš servodaga, ja juogadit guhtet guimmiideasetguin dego vieljažat ja oappážat. Suova min oaidnit min ovddasvástádusa oppa du sivdnádusa ovddas, ja ovddidit du buori dáhtu máilmmi álbmogiid gaskii, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

### *25. sotnabeaivi hellodagaid maŋŋil*

Hearrá Jesus Kristus, guhte máhcat dubmet elliid ja jábmiid, mii giitit du bajásčuožžileami ja agálaš eallima doaivvu ovddas. Mii rohkadallat: Sártno midjiide eallima sáni mii addá doaivvu jápmima vuostái, ja beastte min duomu diimmu. Bovtte min ođđa eallimii odne, ja agálaš eallimii dan beaivvi go bajásčuoččáldahtát buohkaid hávddiin, don guhte ealát ja ráđdet Áhčiin ja Bassi Vuoiŋnain, okta duohta Ipmil agálašvuođas agálašvuhtii.

### *26. sotnabeaivi hellodagaid maŋŋil*

Bassi Ipmil, gean hálddus leat áiggít ja diimmut, mii giitit du du agálaš riikka ovddas man don leat vuođđudan min gaskii. Suova min eallit mánnánat ja leat gárvásat deaivvadit Bártniinat, Jesus Kristusiin, dan beaivvi go son máhccá, son guhte eallá ja ráđde duinna ja Bassi Vuoiŋnain, okta duohta Ipmil agálašvuođas agálašvuhtii.

### *27. sotnabeaivi hellodagaid maŋŋil*

Herrá Ipmil, almmálaš Áhčči, guhte leat vuodđudan agálaš riikkat ja ollašuhát buot. Mii rohkadallat: Nanne min oskku du fápmui, ja doala min gitta doaivagis ja ráhkisvuodas, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *Girkojagi maŋimuš sotnabeaivi (Duopmosotnabeaivi)*

Herrá Jesus Kristus, don leat gonagasaid gonagas ja hearráid hearrá. Duopmobeavvi don gáibidat min dahkat logu bestojupmin dahje láhppojujupmin. Veahket min gohcit ja rohkadallat, vai mii sealluhivččiimet oskku dutnje, ráhkistivččiimet du ja bálvalivččiimet du uhcimus vieljažiid ja oappážiid, don guhte ealát ja ráđdet Áhčiin ja Bassi Vuoiŋnain, okta duohta Ipmil agálašvuodas agálašvuhtii.

### *Sámi álbmotbeaivi I*

Herrá, Ipmileamet, mii giitit du min álbmoga ja máddariid guovlluid ovddas, máddariid vieruid ja buot buriid árvvuid ovddas mat leat addojuvvon midjiide hálddašit. Mii rohkadallat: Várjal min suddus ja billašumis, ja basuhuvvos du namma álelassii min gaskkas. Gozit min álbmoga ja láide buot máilmmi álgoálbmogiid olmmošárvosas eallimii friddjavuodain ja vuoigatvuodain. Ja suova min buohkaid maŋimustá čoagganit du lusa buot álbmogiiguin du hearvásvuodas. Dán mii rohkadallat, du Bártni, Jesus Kristusa, Hearrámet bokte, guhte eallá ja ráđde duinna ja Bassi Vuoiŋnain, okta duohta Ipmil agálašvuodas agálašvuhtii.

### *Samefolkets dag I / Samenes nasjonaldag*

Herre, vår Gud, vi takker deg for vårt folk og våre forfedres land, deres skikker og alle gode verdier som vi har fått å forvalte. Vi ber: Bevar oss fra synd og forfall, og la ditt navn alltid være hellig blant oss. Våk du over vårt folk og led alle jordens urfolk til et menneskeverdige liv i frihet og rettferd. Og la oss alle til sist samles hos deg med alle folk i din herlighet. Det ber vi om, ved din Sønn, Jesus Kristus, vår Herre, som med deg og Den Hellige Ånd lever og råder, én sann Gud fra evighet til evighet.

### *Sámi álbmotbeaivi II*

Herrá Ipmil, almmálaš Áhčči, don guhte guottát ja bisuhat almmi ja leat sivdnidan máilmmi olmmošcearddaid ja addán sidjiide sin ássanguovluid. Mii giitit du min álbmoga ovddas. Veahket min nu ahte mii vurket daid vieruid maid máddarat leat addán midjiide, buot divrras árvvuid mat leat dohkálaččat dutnje.

Jesus Kristus, don guhte vuolggahit apoastaliiddát buot olbmuide, mii giitit du evangeliuma čuovgasa ovddas. Atte midjiide min sudduid ándagassii ja veahket min dahkat earáide dan maid mii ge dáhttut earáid dahkat midjiide.

Bassi Vuoignja, min jeddejeaddji eallimis ja jápmimis, láide min bajás seavdnjadasas allatvuhtii nu ahte mii oaidnit máilmmi du bassi čuovgasis. Láide min boahhte áiggi sisa nu ahte mii beassat vádjolit odđa Jerusalemii buot álbmogiiguin, don guhte ealát ja ráddet Áhčiin ja Bártiin, okta duohta Ipmil agálašvuodas agálašvuhtii.

## Samefolkets dag II / Samenes nasjonaldag II

Herre Gud, himmelske Far, du som bærer og holder oppe himmelen og jorden og har skapt alle jordens folk og gitt dem deres bosteder. Vi takker deg for vårt folk. Hjelp oss å ta vare på forfedrenes skikker som vi har fått, alle dyrebare verdier som vi har fått å forvalte.

Jesus Kristus, du som sendte dine apostler til alle mennesker, vi takker deg for evangeliets lys. Tilgi oss våre synder og hjelp oss å gjøre mot andre det vi vil at andre skal gjøre mot oss.

Hellige Ånd, vår trøster i liv og død, før oss ut av mørket, så vi ser verden i ditt hellige lys. Led oss inn i fremtiden, slik at vi får vandre til det nye Jerusalem med alle folk, du som med Faderen og Sønnen lever og råder, én sann Gud fra evighet til evighet.

### *Miessemánu 1. beaivi*

Herrá Ipmil, almmálaš Áhčči, don leat sivdnidan min ja addán midjiide min eallinagi ja návccaid. Suova min geavahit min eallima nu ahte mii bálvalit du ja min lagamuččaid, vai mii searválagaid huksešeimmet vuoigatlaš ja ráfálaš servodaga. Buressivdnit min barggu ja nanne min bargosajiid. Veahket girkot bealuštit sániiguin ja daguiguin sin guđet leat heajut ja doarrádallojuvvojit. Dán mii rohkadallat, du Bártni, Jesus Kristusa, Herrámet bokte, guhte eallá ja rádde duinna ja Bassi Vuoiñjain, okta duohta Ipmil agálašvuodas agálašvuhtii.

### *Miessemánu 17. beaivi (Vuodđolága beaivi)*

Herrá, Ipmileamet, mii giitit du min álbmoga ja vánheneatnama, min vuodđolága ja friddjavuoda ovddas. Mii rohkadallat: Várjal min suddus ja billašumis, ja basuhuvvos álelassii du namma min gaskkas. Gozit min riikka boahhte áiggi ja láide buot máilmmi álbmogiid olmmošárvosas eallimii friddjavuodain ja vánhurskkisvuodain. Dán mii rohkadallat du, du Bártni, Jesus Kristusa, Herrámet bokte, guhte eallá ja rádde duinna ja Bassi Vuoiñjain, okta duohta Ipmil agálašvuodas agálašvuhtii.

### *Mihcamárat (Jonssot)*

Herrá Ipmil, almmálaš Áhčči, don vuolggahit gásttašeaddji Johanasa, vai son ráhkadivččii du Bártni geainnu ja rávkkašii olbmuid jorgalusa dahkat. Suova min vuostáiváldit dan duođaštusa, amamet bissut seavdnjadasas, muhto vai mii oskkošeimmet sutnje guhte lea máilmmi čuovggas, Jesus Kristusii, du Bárdnái, guhte eallá ja rádde duinna ja Bassi Vuoiñjain, okta duohta Ipmil agálašvuodas agálašvuhtii.

*Bassi Ovllá beaivi (Olssotbeaivi)*

Buotveagalaš Ipmil, mii giitit du du áirasiid ovddas geaid don leat vuolggahan min lusa, sin guđet gilve Sáni, ceggejedje ruossa mearkka ja vuodđudedje girku min eatnamii. Dan rávkajumi bisuhehkos du girku eallin vai mii oskkáldasvuodain ja fámuin sárdnidivččiimet evangeliuma čielgasit ja buhtásit. Oahpat min hukset min eatnama lágain, dutnje gudnin ja álbmogii buressivdnádussan, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋnain, okta duohta Ipmil agálašvuodas agálašvuhtii.

*Čakčagiittusbasit*

Hearrá, Ipmileamet, guhte leat sivdnidan almmi ja eatnama, mii giitit du heaggamet ja bargomet ovddas ja go don fasttain leat diktán eatnama šaddadit šattuid. Oahpat min vuostáiváldit buot attáldagaidat giitalusaiguin ja geavahit daid buorrin guhtet guoibmáseamet ja daidda olbmuide guđet gillájit headi máilmmis, du Bártni, Jesus Kristusa, Hearrámet bokte, guhte eallá ja ráđđe duinna ja Bassi Vuoiŋnain, okta duohta Ipmil agálašvuodas agálašvuhtii.

*Konfirmašunbeaivi*

Almmálaš Áhčči, mii giitit du go váldet min mánnánat gásttas ja addet midjiide ruovttu du girkus. Mii rohkallat: nanne min oskku, vai ealášeimmet du dáhtu mielde ja vai livččiimet du mielbargit eatnama alde. Atte midjiide fámu soahat buori soadi, ja veahket min ollet agálaš mihttomearrái man don leat bidjan min ovdii, Jesus Kristusa, du Bártni, min Hearrá bokte, guhte duinna ja bassi Vuoiŋnain eallá ja ráđđe, okta duohta Ipmil agálašvuodas agálašvuhtii.

# BEARAŠIPMILBÁLVALUS

1 Bearašipmilbálvalus sáhtta leat

a) go ii leat dábálaš ipmilbálvalus,

b) allameassuid dahje eahkedisipmilbálvalusaid sajis dábálaš sotnabeivviid gustojeaddji mearrádusaid mielde.

2 Sáhtta leat čuojaheapmi, koarralávlun dahje eará heivvolaš lávlun go ipmilbálvalus álggahuvvo dahje ovdal "II Sárndieapmi ja dovddastus".

3 Biibbalaš sálbma sáhtta geavahuvvot ovtta čuoovovaš sajiin ipmilbálvalusas: 1. lađasin **Álggahansálbma**, 8. lađasin **Sálbma sártni maŋŋil** dahje 14. lađasin **Olggosmannanlávlla**.

4 Maiddái eará sálmmat mat eai leat dohkkehuvvon, sáhttet geavahuvvot. Liturga dohkkeha teavstta, ja ipmilbálvalusa liturga ja orgelčuojaheaddji dohkkeheaba nuohta.

5 Sártni oktavuodas, dahje eará lađđasiid oktavuodas, go nu heive, sáhtta geavahit áigeguovdilis, dramáhtalaš dahje earálágán oassálastimiid mat leat čadnojuvvon sártni sisdollui.

6 Go **II Ovddasrohkos** geavahuvvo, de rohkosáššit välljejuvvojit áiggi ja dili mielde, ja rohkosat čállojuvvojit ovddalgihtii oanehis ja álkes cealkagiiguin.



# I ROHKOS JA MÁIDNUNLÁVLLA

## 1 Álggaheapmi

### Álggahansálbma

Máidnunlávlla dahje sálbma mii heive girkojahkáí.

Álggahansálbman sáhtta lávlut biibballaš sálmma.

### Álggahansátni

*Jogo A*

*L lohkanbulppis dahje eará sajis koaras, searvegoddái čalmmiid*

Ráhkis searvegoddi. Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

*Dahje B*

*L lohkanbulppis dahje eará sajis koaras, searvegoddái čalmmiid*

Áhči ja Bártni ja Bassi Vuoiŋŋa nammii.

## 2 Vuorrolohkan

Buohkat sáhttet ovtta lohkat vuorrolohkama, dahje liturga okto, dahje liturga ja searvegoddi vurrolagaid.

*L searvegoddái čalmmiid*

Máidnot Hearrá Ipmileamet.

*Jogo A*

*L Ipmil lea min Áhčči,*

*S* dás viesustis váldá son min  
lieggasii ja čuovgasii.

*L* Son lea min lahka.

*S* Su sátni dál láide min rievttuid  
ja nanne min oskku.

*L* Ipmil lea min Áhčči,

*S* mii leat su mánát.

Mii áigut dál máidnut su,  
son lea dál dás.

*Dahje B*

*L* Mun alidan du, mu Ipmil ja gonagas,

*S* ja buressivdnidan du nama agálaš áigái.

*L* Buolvvas bulvii máidnot du daguid

*S* ja mitalit du veagalaš daguid.

*L* Hearrá lea buorre buohkaide,

*S* váibmoláđis buot sivdnádusaide.

*L* Oppa du sivdnádus giitá du, Hearrá,

*S* buot ipmilbalolaččat máidnot du.

*Sál 145,1.4.9-10*

### 3 Máidnunlávlla

*Jogo A*

*L / O*

Lávlot Hearrái, máidnot su nama.

Gulahehket beivvis beivái su bestojumi!

**S** Beivvi ja mánu, násttiid ja bálvvoid,  
biekkaid ja báruid, misiid ja mánáid,  
buot son lea sivdnidan, almmi ja eatnama.  
Ipmilii giitu!

*Geardun:*

Giitot mii Ipmila! Máidnot mii Ipmila! Su bassi nama rámidеhкот!

Ipmila Bárdni, heakkas son attii.  
Jápmima badjel vuittii. Son eallá.  
Son lea min gaskkas. Oskot mii sutnje!  
Ipmilii giitu!

*Geardun*

Su Bassi Vuoigna, min jeddejeaddji,  
lea eallindahkki, fámolaš veahkki.  
Cahkkeha oskku, Guoddá min álo.  
Ipmilii giitu!

*Geardun*

*Sálbma Sálbmagirji II nr 766.*

*Dahje B*

Rámit Hearrá, beaivi, mánnu,  
násttit maid son cahkkehii.

Rámit Hearrá, alla albmi,  
man son lebbii bajil min.

Rámit Hearrá šávvi mearra,  
mierká, arvi, borga maid.  
Rámit Hearrá, muorra, geađgi,  
lieđđi, lasta, siepmanaš.

Rámit Hearrá, várri, čohkka,  
johka, ája, goržžážat.  
Rámit Hearrá, vievssis, loddi,  
visot eallit eatnamis.

Rámit Hearrá, iežat girkus,  
son gii orru gaskkaimet,  
son gii sivdnidan lea visot,  
buressivdnit eatnamiid.

*Sálbmagirji II nr. 500*

*Dahje C*

*L / O*

Gudni lehkos Ipmilii allagasas.

S Ja ráfi eatnama alde  
olbmuide geaid Ipmil árpmiha.  
Mii máidnut du,  
mii rámidit du,  
mii bajidit du. Amen.

*Dahje D*

Muhtun eará vuogas máidnunlávlla, muhto dalle ii lávlojuvvo "Gudni lehkos Ipmilii allagasas". Fástoáiggi sáhtta dan sajis lávlojuvvot sálbma mii heive dán áigái.

## II SÁRDNIDEAPMI JA DOVDDASTUS

*L* Gullot Ipmila sáni.

*S* Čuožžila ja lávlu

Máidnojuvvon lehkos Ipmil.  
Halleluja, halleluja, halleluja.

### 4 Teakstalohkan

Liturga dahje muhtun eará lohká sárdneteavstta lohkanbulppis.

Teakstalohkan loahpahuvo ná:

Nu čuodjá Hearrá sátni.

Searvegoddi čohkkeda.

### 5 Sálbma sártni ovdal

### 6 Sárdni

Sárdnideaddji sáhtta vuos rohkadallat oanehis, friddja rohkosa.

Sárdnideaddji sárdnida mearriduvvon teavstta vuodul dahje eará teavsttaid vuodul mat leat mearriduvvon dan beaivái. Muhtun dilálašvuodas sáhtta sárdniduvvot eará biibbalteavstta vuodul mii lea válljejuvvon friddja.

Muhtun sárdneteakstaoasit sáhttet lohkkujuvvot oktii vel.

Sárdni loahpahunvo dáinna máidnojumiin:

Gudni lehkos Áhččái ja Bárdnái ja Bassi Vuigŋii, guhte lei ja lea ja bissu oktan duohta Ipmilin agálašvuodas agálašvuhtii.

## 7 Oskkudovddastus

Oskkudovddastus gahččá eret go lea gásta ipmilbálvalusas. Dalle sáhtta 8. lađas leat oskkudovddastussálbma.

*L* Dovddastehkot bassi oskomet.

Searvegoddi čuožžila.

*Jogo*

*Buo* Mun oskkun Ipmil Áhččái, buotveagalažžii, almmi ja eatnama sivdnideaddjái.

Mun oskkun Jesus Kristusii,  
Ipmila áidnoriegádan Bárdnái, min Hearnái,  
guhte sahkanii Bassi Vuoiŋgas,  
riegádii nieiddas Márjjás,  
givssiduvvui Pontius Pilatusa áiggi,  
russiinávlejuvvui, jámii ja hávdáduvvui,  
njejai jábmiid riikii,  
bajásčuožžilii jábmiid luhtte goalmát beaivvi,  
manai bajás albmái,  
čohkká Ipmila, buotveagalaš Áhči, olgeš gieđa bealde,  
máhccá doppe dubmet elliid ja jábmiid.

Mun oskkun Bassi Vuigŋii,  
bassi oktasaš girku,  
bassi olbmuid searvevuoda,

suttuid ándagassii addojumi,  
oačči bajásčuožžileami  
ja agálaš eallima.

Amen.

*Apoastallaš oskkudovddastus*

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,  
guhte sahkanii Bassi Vuoiŋŋa bokte,  
riegádii nieida Marias,  
givssiduvvui Pontius Pilatusa vuolde,  
russiinávlejuvvui, jámii ja hávdáduvvui,  
vuolás manai jábmiid riikii,  
bajásčuožžilii jábmiid luhtte goalmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieda bealde,  
galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.  
Amen.

*Apoastallaš oskkudovddastus*

Searvegoddi čohkkeda.

## 8 Sálbma

# III SEARVEGOTTI OVDDASROHKOS

## 9 Diedáhusat

## 10 Ovddasrohkos

*Jogo A*

*I Ovddasrohkos*

*L searvegoddái čalmmiid*

Rohkadallot.

*L áltárii čalmmiid*

Herrá, Ipmileamet, don dovddat min ja ráhkistat min buhkaid. Don dieđát ahte mii leat rihkkon du vuostái. Mii leat vajáldahtán du ja dan maid don dáhtut min dahkat. Mii leat jurddašan eambo iežamet go earáid. Atte midjiide ándagassii Jesusa dihtii.

*S* Herrá, gula min rohkosa.

*L* Várjal min ruovttuid ja bearrašiid. Leage buot buhcciid, ovttaskasaid ja sin luhtte geat leat balus. Atte ráfi ja vuoigatvuođa máilmmis. Veahket min juogadit guhtet guimmiideametguin, vai buhkain livččii biebmu, biktasat, ruoktu ja bargu.

*Ipmil Áhčči, mii rohkadallat dus.*

*S* Herrá, gula min rohkosa.



*L* Boađe sin lusa geat eai dovdda du. Oahpat min muitalit earáide du birra ja divtte evangeliuma sárdniduvvot buot olbmuide. Nanne min searvegotti ja girku buot eatnamiin. Divtte du čuovgasa báitit máilmmi seavdnjadasas. Láide min dan geainnu mielde mii doalvu eallimii.  
Ipmil Áhčči, dán mii rohkadallat dus.

Š Herra, gula min rohkosa. Amen.

*Dahje B*

*II Ovddasrohkos*

Rohkos ráhkaduvvo áiggi ja dili mielde, čálalaččat ja ná:

*L searvegoddái čalmmiid*

Rohkadallot.

*Jogo AA*

*L áltárii čalmmiid*

Herra, Ipmileamet, don dovddat min ja ráhkistat min buohkaid. Don diedát ahte mii leat dahkan du vuostái. Mii leat vajáldahtán du ja dan maid don dáhtut min dahkat. Mii leat jurddašan eambo iežamet go earáid.

Š Herra, gula min rohkosa.

*Dahje BB*

Eará ráhkaduvvon suddovddastus.

Dasto čuvvot guokte rohkosláđđasa, gos sáhtá rohkadallat ruovttu, bearraša, lagas birra, min eatnama, min máilmmi, friddjavuođa, vanhurskkisvuođa, gillájeddjiiid, searvegotti, girku, miššuvnna, Ipmila riikka barggu ovddas.

Dat guokte rohkosláđđasa loahpahunvojit ná:

Ipmil Áhčči, dan mii rohkadallat dus.

Searvegoddi lávlu juohke rohkosláđđasa manjil:

Š Hearná, gula min rohkosa.

Go ii leat gásta, de čuovvu

## Heárná rohkos

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## 11 Searvegotti giittusoaffar

### Gásta

Go lea gásta bearašipmilbálvalusas, de dat doaimmahuvvo dás. Geahča ortnega Mánáidgásta allameassus, s. 123.

## IV BURESSIVDNÁDUS BÁLVALUSSII

### 12 Loahpahansálbma

### 13 Buressivdnáduš

*L dahje O* searvegoddái čalmmiid

*L* Máidnot Hearrá.

Searvegoddi čuožžila ja lávlu.

*S* Máidnojuvvon lehkos Ipmil.

Halleluja. Halleluja. Halleluja.

*L* Hearrá buressivdnidivččii du ja várjalivččii du.

Hearrá divttášii muođuidis čuovgat du badjelii

ja livččii dutnje árbmugas.

Hearrá bajidivččii čalmmiidis du ala

ja attášii dutnje ráfi.

Š Amen. Amen. Amen.

Čuovvovaš jaskes bottu áiggi čuodjalahttojuvvo girkobielluin golmma geardde golbmii.

Liturga sáhtta dás joatkit:

L Mannet ráfái. Bálvolehket Hearrá iluin.

## **14 Loahpaheapmi**

Liturga manná eret áltáris.

*Jogo A*

### **Olggosmannanlávlla**

Máidnunlávlla dahje sálbma mii vástida girkojagi áiggi.

Olggosmannanlávllan sáhtta lávlut biibbalaš sálmma.

Searvegoddi manná lávllu girkus olggos.

*Dahje B*

### **Postludia**

# RIHPPADOVDDASTUS -IPMILBÁLVALUS

1 Ipmilbálvalusortnet Rihppadovddastusipmilbálvalus heive bures adveanta- ja fástoáigái.

2 Rihppadovddastusipmilbálvalus sáhtá maiddái geavahuvvot oktan eará

ipmilbálvalusortnegiiguin, nugo omd. Sierra eahkedismálisipmilbálvalus, Iddedisrohkos,

Eahkedisipmilbálvalus, Eahkedisrohkos, Ovddasrohkosisipmilbálvalus ja Allameassu.

Rihppadovddastusipmilbálvalus bohtá dalle dáid ipmilbálvalusortnegiid ovdal ja

loahpahunvvo vuohkkasepmosit 9. laddásiin, **Suttuid ándagassii addojupmi**, dahje 10.

laddásiin, **Giittusrohkos**.

Jos Rihppadovddastusipmilbálvalus geavahunvvo eará ipmilbálvalusortnegiiguin, de berre

váldit mielde daid laddásiid mat leat merkejuvvon +:in.

3 Berre leat bísticaš ja diedihuvvon sártnodan- ja siellodikšunvejolašvuolta

rihppadovddastusipmilbálvalusa ovdal.

4 Lea mávssolaš addit searvegoddái ovddalgihtii dárbašlaš dieđuid

rihppadovddastusdoaimma ja dan mearkkašumi birra.

5 Jos rihppadovddastus dollojuvvo allameassus dan sadjái go 2. lađas, **Suttudovddastus**, de

heive geavahit 2, 4 ja 7 - 9 laddásiid Rihppadovddastusipmilbálvalusortnega mielde.

6 Go lea sierra rihppadovddastusipmilbálvalus, de lea liturggas fioleahhta stola badjelis. Go

allameassus lea rihppadovddastus, de geavahunvvo girkojagi ivdni.

## +1 Álggahansálbma

## +2 Álggahandearvvuođat

*Jogo A*

*L lohkanbulppis dahje eará báikkis koaras, searvegoddái čalmmiid*

Herrá lehkos dinguin buohkaiguin.

Herrámet Jesus Kristus cealká: Eai dearvvaš olbmot dárbbas dálkkasteaddji, muhto buohccit. Mun in leat bohtán rávkat vanhurskásiid, muhto suddolaččaid.

*Mark 2,17*

*Dahje B*

*L lohkanbulppis dahje eará báikkis koaras, searvegoddái čalmmiid*

Ipmila ráfi lehkos dinguin buohkaiguin.

Herrá apoastal cealká: Mánážiiddán, dán mun čálán didjiide amadet suddudit. Muhto jos muhtun sudduda, de mis lea Áhči luhtte bealušteaddji, Jesus Kristus, guhte lea vanhurskkis. Son lea min sudduid soabahus, ii ge dušše min, muhto oppa máilmmi.

*1 Joh 2,1-2*

*Dás sáhhtá liturga muitalit oanehaččat ipmilbálvalusa birra ja loahpahit rohkosiin, omd.*

*dáinna:*

*L Bassi Ipmil, almmálaš Áhčči, mii giitit du go geaidnu du lusa álo lea rabas Jesus Kristusis. Veahket min oskut du sátnái ándagassii addojumi birra. Nanne min oskku ja doaivvu, ja daga min ráhkisvuoda eallin, dutnje gudnin ja min lagamuččaide veahkin, Jesus Kristus, du Bártni, Herrámet, bokte.*

*S Amen.*

### 3 Teakstalohkan

Dás lohkkovuođit okta dahje guokte teavstta, omd. okta čieža gáhtamušsálmmain (Sálbma 6, 32, 38, 51, 102, 130, 143). Sáhtta maidái lávlut sálmma lohkamiid gaskkas.

Teakstalohkan álggahuvvo ná:

Lea čállojuvvo...

Searvegoddii čuožžila.

Teakstalohkan loahpahuvvo ná:

Nu čuodjá Hearrá sátni.

Searvegoddii čohkkeda.

### +4 Rihppadovddastussárdni

Rihppadovddastussárdni dollojuvvo dábbalaččat lohkanbulppis dahje sárdnestuolus.

### 5 Sálbma

### 6 Iešsuokkardeapmi

*L* searvegoddái čalmmiid

Suokkardehket eallimeamet Ipmila bassi dáhtu mielde.

Logi báhkoma čudjet ná:

Liturga lohka báhkomiid:

- 1 Eai dus galgga leat eará ipmilat go mun.
- 2 It galgga geavahit Ipmila nama duššálažžan.
- 3 Don galggat basuhit vuoiŋŋastanbeaivvi.
- 4 Don galggat gudnejahttit áhčát ja eatnát.
- 5 It galgga goddit.
- 6 It galgga rihkkut náittosdili.

- 7 It galgga suoládit.
- 8 It galgga cealkit vearriduodaštusa lagamuččat vuostái.
- 9 It galgga anistuvvat lagamuččat dálloi.
- 10 It galgga anistuvvat lagamuččat áhkkái, bálvleaddjái, biigái, omiide dahje masage earái mii gullá sutnje.

Dás čuovvu jaskes boddu vai juohkehaš beassá iešiežas suokkardit. Dasa sáhtta geavahit rihppadovddastusspeadjala jna. veahkin.

## +7 Suttudovddastus

Liturga manná áltárii.

*L* searvegoddái čalmmiid

Gopmirdehkot Ipmila ovdii ja dovddastehkot suttuideamet.

Liturga čipposta, áltárii čalmmiid.

Searvegoddi sáhtta čippostit beaŋkkaid gurrii, gos lea vejolaš.

*Jogo A*

Liturga sáhtta lohkat olles čuovvovaš rohkosa dahje liturga ja searvegoddi sáhtta lohkat vurrolagaid.

*L* Leage munnje árbmugas, Ipmil, oskkáldasvuodastat,

*S* sihko eret mu rihkkumiid stuorra árbmugasvuodastat.

*L* Basa mu buhtisin ja sivaheapmin,

*S* ja buhtis mu suttus!

*L* Dasgo rihkkumiiddán mun dovddan,

*S* mu suddu lea álelassii mu ovddas.



*L* Aivve du vuostái mun lean suddudan,  
*S* mun lean dahkan dan mii lea bahá du čálmmiin.

*L* De don leat vánhurskkis go sártnut munnje,  
*S* ja vuoiggalaš go dubmet.

*L* Geahča, mun bohten máilbmái suddolašvuodas.  
*S* suddus mu eadni lea sahkanahtán mu.

*L* Geahča, don hálidat duohtavuoda mu váibmui,  
*S* de oahpat munnje viisodaga mu siskkimussii.

*L* Buhtis mu suddus isopiin,  
*S* basa mu, vai mun šattan vielgadeabbon go muohta.

*L* Divtte mu dovdat ávu ja ilu,  
*S* divtte daid dávtiid ávvudit maid don cuvkejit!

*L* Čiega muođuidat mu sudduid ovddas,  
*S* ja sihko eret buot mu sudduvealggi!

**Sál 51,3-11**

***Dahje B***

*L* Hearrá, bassi Ipmil. Du sátni cealká ahte mun lean suddolaš guhte lean láhpon du árpmu haga. Dávjá mun in olat in ge árvit du duohtavuoda. Hearrá, atte munnje dáhtu ja roahkkatvuoda, vai duosttašin diktit du sáni čájehit gii mun duodaid lean.

Don leat sivdnidan mu, ja mus lea ovddasvástádus dutnje oppa mu eallimiin. Du dáhttu stivrešii mu jurdagiid ja vadjolusa, muhto mu iežan sávaldagat duvdet dávjá eret du dáhtu.

Don leat cealkán ahte mun galgган ráhkistit lagamuččaidan, muhto fuollameahttunvuolta, galmmasvuolta ja moaitámuš báidná dávjá mu eallima.

Don gáibidat mus duohtavuoda ja vuoigatvuoda, muhto mun báhtaran logu dahkamis. Almmatge diedán ahte dušše dalle go mu eallin rabastuvvo dutnje, de sáhtán vuostáiváldit du bestojumi.

Herrá, váldde mus eret vearri oadjebasvuoda. Atte munnje mu sudduid ándagassii Jesus Kristusa dihtii. Atte munnje bassi ráfehivvuoda mii álo jodiha mu du lusa, vai mun beasašin eallit duohta oadjebasvuodas ja dorvvus.

S Amen

### *Dahje C*

*L* Bassi Ipmil, váibmoládis Áhčči. Mun váivván, suddolaš olmmoš, dovddastan dutnje, vanhurskkis Ipmil, ahte mun mángga láhkái lean rihkkon du vuostái.

In leat ráhkistan du buot eará badjel, in ge lagamužžan nugo iešiežan. Mun lean suddudan du ja du bassi báhkkomiid vuostái jurdagiiguin, sániiguin ja daguiguin. Jos don dubmešit mu mu daguid mielde, de ánsšášivččen ahte don hilggut mu.

Muhto dál leat don, ráhkis almmálaš Áhčči, árpmustat lohpidan vuostáiváldit juohkehačča guhte jorgala dutnje, ja luohtidettiin Beastámet Jesus Kristusa ánsšášeapmái dorvvasta du stuorra árkkálmastinvuhtii.

Don attát sidjiide buot sin rihkkumiid ándagassii, it ge logahala sidjiide sin sudduid. Dasa mun dorvvastan ja rohkadalan ándagassii addojumi buot sudduidan ovddas, Jesus Kristusa dihtii.

S Amen.

*L* Jaskatvuodas mii bidjat dál Ipmila ovdii dan mis gudesge lea váimmu alde.

**Oanehis jaskatvuoda mañnil rohkadallet liturga ja searvegoddi ovttas dán rohkosa:**

*Buo* Ráhkis Herrá Ipmil.

Mun lean mángga gearddi suddudan du vuostái jurdagiiguin, sániiguin ja daguiguin ja lean bealuštusa haga.

Muhto mun oskkun du áidnoriegádan Bárdnái, Jesus Kristusii,  
guhte lea gillán jápmima beastin dihtii mu,  
ja mun rohkadalan su dihtii:  
Atte ándagassii, atte munnje buot mu suttuid ándagassii.  
Atte munnje Bassi Vuoiŋat,  
vai mun oskkošin du sátnái ahte buot mu suttut leat munnje ándagassii addojuvvon,  
jorgalivččen eret suttus  
ja divttášin du bassi ja buori dáhtu ráđđet mu eallimis.  
Hearrá, árpmi mu.  
Amen.

## **+8 Sátni čatnan- ja čoavdinfámu birra**

*L* searvegoddái čalmmiid

Gullot maid bajásčuožžilan Hearrá cealká máhttájeddjiidasas:

Vuostáiváldet Bassi Vuoiŋa. Geaidda dii addibehtet sin suttuid ándagassii, de sidjiide leat dat ándagassii addojuvvon. Geaidda dii čatnabehtet sin suttuid, de dat leat čadnojuvvon.

*Joh 20,22-23*

## **+9 Suttuid ándagassii addin ABSOLUŠUVDNA**

*L* De bohtet ovdan Hearrá áltára lusa, ja vuostáiváldet buot suttuideattet ándagassii celkojumi.

*Searvegoddi manná áltára lusa ja čipposta.*

*Juohke rihppavurrui cealká liturga:*

*L* Hearrámet Jesus Kristusa sáni ja gohččuma mielde

*ja bidjá gieđa juohkehačča oaivvi ala*

cealkkán mun dutnje buot du suttuid ándagassii addojumi, Áhči ja Bártne ja Bassi Vuoiŋa nammii.

*Dasto juohke rihppavuoru maŋgil:*

Son guhte álggahii buori dagu din siste, ollašuhthášii dan gitta Jesus Kristusa beaivvi rádjái. **Fil 1,6**

Ráfi lehkos dinguin.

**Dákko sáhtá liturga joatkit:**

Addot guhtet guoibmáseamet gieđaid mearkan dasa ahte mii addit guhtet guoibmáseamet ándagassii nugo Ipmil ge lea midjiide ándagassii addán.

## **10 Giittusrohkos**

**Go buohkat leat mannan sadjáseaset, de liturga rohkadallá okto, dahje ovttas searvegottiin dahje vurrolagaid searvegottiin**

*L* Giitot ja rohkadallot.

**Jogo A**

*L* Mu siellu, máinno Hearrá!

*S* Buot mii lea mu siste, máinno su bassi nama.

*L* Mu siellu, máinno Hearrá,

*S* ale vajáldahte su buorredaguid!

*L* Son addá ándagassii buot du sudduid

*S* ja dálkkasta buot du vigiid.

*L* Son lonista du heakka hávddis

*S* ja kruvnnida du árbmugasvuodain ja váibmoláđisvuodain.

*L* Váibmoláđis ja árbmugas lea Hearrá,

*S* guhkesmielalaš ja rikkis árbmugasvuhtii.

*L* Ii son guoddal min agibeaivái

*S* ii ge ane moari agálaččat.

*L* Ii son daga minguin min sudduid mielde,

*S* ii ge mávssat midjiide min veardaguid mielde.

*L* Nu allat go albmi lea allat eatnama bajábealde,

*S* nu stuoris lea Hearrá árbmu sidjiide geat ballet sus.

*L* Nu guhkin go nuorti lea oarjjis

*S* nu guhkás lea son dolvon min sudduid mis eret.

*Sál 103,1-4.8-12*

*Dahje B*

*L* Ávdugas son gean rihkkumat leat ándagassii addojuvvon

*S* ja gean suddut leat čihkkojuvvon.

*L* Ávdugas dat olmmoš geasa Hearrá ii logahala suddu,

*S* ja gean vuoiŋgas ii leat behtolašvuohta.

*L* Nu guhká go orron jávohaga, de mu dávttit sotne,

*S* mun luibmen gežos beaivvi.

*L* Dasgo du giehta dettii mu lossadit ijatbeaivvi.

*S* Mu eallinvuoibmi jávkkai dego lávttadas.

*L* Mun dovddastin suddon dutnje

*S* in ge čiehkan rihkkumiiddán.

*L* Mun dadjen: "Dál áiggun dovddastit sudduidan Hearrái."

*S* Ja don váldet eret mu sudduvealggi.

*L* Danne rohkadalloset buot ipmilbalolaččat dutnje átestusa áiggi.

*S* Vaikko stuorra čáhcedulvvit badjánivčče, de eai olat sin.

*L* Don leat mu suodji,

*S* don suodjalat mu átestusas ja birastahtát mu bestojumi ávuin.

*Sál 32,1-7*

## **+11 Hearrá roHKos**

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min sudduid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!  
Basuhuvvos du namma.  
Bohtos du riika.  
Šaddos du dáhttu  
mo almmis nu maiddái eatnama alde.  
Atte midjiide odne min beaivválaš láibámet.  
Ja atte midjiide min suttuideamet ándagassii,  
nugo maiddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beaste min bahás eret.  
Dasgo du lea riika ja fápmu ja gudni agálašvuhtii.  
Amen.

## 12 Loahpahansálbma

### 13 Hearrá buressivdnádus

*L* searvegoddái čalmmiid

Vuostáiváldet Hearrá buressivdnádusa.

*Searvegoddi čuožžila ja čuožžu dassáži go postludia álggahuvvo.*

*L* Hearrá buressivdnidivččii du ja várjalivččii du.

Hearrá divttášii muođuidis čuovgat du badjeli ja livččii dutnje árbmugas.

Hearrá bajidivččii čalmmiidis du ala ja attášii dutnje ráfi. †

*S* Amen.

*Čuovvovaš jaskes rohkosa áiggi časkojuvvo golmma gearde golbmii girkubielluin.*

*L* sáhtá joatkit

Mannet ráfái. Bálvalehket Hearrá iluin.

## **14 Postludia**

Go postludia čuojahuvvo, de liturga manná eret áltáris.



# OVDDASROHKOS - IPMILBÁLVALUS

1 Jos dáhttu doallat ovddasrohkospmilbálvalusa, de berre dan dahkat jeavddalaččat, erenoamážit jos maddái bidjá gieda oaivvi ala go rohkadallá.

2 Lea dehálaš ahte searvegoddi ovddalgihtii oazžu dieđu ipmilbálvalusa birra, ja ahte dat ráhkkanahittojuvvo bures.

3 Ovddasrohkospmilbálvalusa oktavuodas berre dáhpin dieđihuvvot sártnodan- ja siellodikšunvejolašvuohta.

4 Ovddasrohkosa sávaldat dieđihuvvo liturgii ovddalgihtii, čálalaččat dahje njálmmálaččat.

5 Ovddasrohkosis galgá namma namuhuvvot dušše dalle go guoskevaš olmmoš ieš lea dan sihtan dahje čielgasit lea dasa mieđihan.

6 **Ovddasrohkospmilbálvalusa** ortnet sáhtta geavahuvvot okto dahje oktan eará ipmilbálvalusortnegiiguin, nugo omd. **Sierra eahkedismálisipmilbálvalus**. Jos šaddá nu, de berre álggahit ovddasrohkosiin, ja dat loahpahuvvo dábálaččat 8. lađđasiin, **Giittusrohkos**.

7 Erenoamáš diliin sáhtta Ovddasrohkospmilbálvalusa 7.-8. lađas molsojuvvot

**Ovddasrohkos** lađđasiin mii lea eará ipmilbálvalusortnegiin.

# 1 Álggaheapmi

## Álggahansálbma

### Álggahansánit

*L lohkanbulppis*

Herrá ráfi lehkos dinguin buohkaiguin.

Dasto liturga sáhtta cealkit muhtun álggaheaddji sániid dáid čálabáikkiid vuodul:

Matt 11,28(-30), 18,19-20 dahje Fil 4,6-7, omd. ná:

Ipmil rávve min ahte eat galgga moraštit maidege, ja bovde min bidjat buot min dárbbuid ovdan Ipmilii rohkadallamiin ja ánuđettiin giitevašvuodain. Dán mii beassat dahkat dainna vissisvuodain ahte Ipmil álo gullá min rohkosiid. Son vástida iežas áiggis ja iežas láhkái.

[Čuovvovaš sánit lasihuvvojit go liturga diehtá ahte lea áigejuovdil:

*L* Rohkosis namuhit mii odne muhtumiid nama mielde, sin iežaset dáhtu mielde.]

Liturga sáhtta dasto rohkadallat, omd. dán rohkosa:

*L* Herrá, don leat lohpidan ahte don leat min gaskkas go mii čoagganit du nammii. Jesus, boađe min lusa, leage min lahka bestojumiinat ja dearvvašmahttojumiinat. Ipmil, vuolggat min lusa Bassi Vuoiŋat, ja rabas min váimmuid, vai mii vuostáiválddášeimmet du veahki ja buressivdnádusa.

*S* Amen.

## 2 Teakstalohkan

Dás lohkkjuvvo okta dahje guokte teavstta; sáhtta leat sálbma lohkamiid gaskkas. Vuogas teavsttat sáhttet leat:

Sál 23; Sál 103,1-4; Matt 9,1-8; Rom 8,22-28; 2 Kor 12,7-10; Ef 3,14-21; Kol 1,24-27(-29); 1

Tim 2,1-4; Hebr 4,14-16

Teakstalohkan álggahuvvo ná:

Lea čállojuvvon ...

Searvegoddi čuožžila.

Tekstalohkan loahpahunvvo ná:

Nu čuodjá Hearrá sátni.

Searvegoddi čohkkeda.

### 3 Sárdni

Sárdnestuolus dahje lohkanbulppis

### 4 Oskkudovddastus

L Dovddastehkot bassi oskomet.

Searvegoddi čuožžila.

*Jogo*

*Buo* Mun oskkun Ipmil Áhččái, buotveagalažžii,  
almmi ja eatnama sivdnideaddjái.

Mun oskkun Jesus Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoiŋas,  
riegádii nieiddas Márjjás,  
givssiduvvui Pontius Pilatusa áiggi,  
russiinávlejuvvui, jámii ja hávdáduvvui,  
njejai jábmiid riikii,  
bajásčuožžilii jábmiid luhtte goalmát beivvi,  
manai bajás albmái,  
čohkká Ipmila, buotveagalaš Áhči, olgeš gieda bealde,

máhccá doppe dubmet elliid ja jábmiid.

Mun oskkun Bassi Vuignii,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

**Apoastallaš oskkudovddastus**

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,  
guhte sahkanii Bassi Vuoiŋŋa bokte,  
riegádii nieida Marias,  
givssiduvvui Pontius Pilatusa vuolde,  
russiinávlejuvvui, jámii ja hávdáduvvui,  
vuolás manai jábmiid riikii,  
bajásčuožžilii jábmiid luhtte goalmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieda bealde,  
galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

Apoastallaš oskkudovddastus

Searvegoddi čohkkeda.

## 5 Rohkossálbma

## 6 Suttudovddastus

*L* áltáris, searvegoddái čalmmiid

Gopmirdehkot Ipmila ovdii ja dovddastehkot suttuideamet.

Liturga čippusta áltárii čalmmiid.

Searvegoddi sáhtá čippustit beaŋkkaid gurrii jos lea vejolaš.

*Jogo A*

*Buo* Ipmil, leage munnje árbmugas!

Mun lean suddudan du vuostái ja beahtán lagamužžan

- jurdagiiguin ja sániiguin,

daguiguin ja dagakeahttaivuodaiguin.

Atte munnje mu suttuid ándagassii Jesus Kristusa dihtii.

Sivdnit munnje buhtes váimmu,

ja atte munnje fámu odđa eallimii Bassi Vuoiŋŋat bokte.

*Dahje B*

Liturga sáhtá lohkat čuovvovaš sálmma dahje liturga ja searvegoddi sáhtá lohkat dan

vurrolagaid.

*L* Hearrá, ale ráŋggáš mu moaristat, ale ge bagat mu suhtustat!

*S* Leage munnje árbmugas, Hearrá, dasgo mun lea voimmeheapmi.

*L* Dearvvašmahte mu, Hearrá, dasgo mu siskkáldas lea suorganan.

*S* Mu siellu lea sakka suorganan.

*L* Muhto man guhká, Hearrá?

*Buo* Hearrá, jorggit ja lonis mu, beastte mu árbmugasvuodainat.

*Sál 6,2-5*

*Dahje C*

*Rohkos sáhhtá lohkkobjuvvot vurrolagaid.*

*L* Doama vástidit munnje, Hearrá,

*S* mu vuoignja roahpána.

*L* Ale čiega mus muođuidat,

*S* aman šaddat sin láhkásažžan guđet leat mannan hávdái.

*L* Divtte mu muosáhit du árbmugasvuoda juohke iđida.

*S* dasgo dutnje mun dorvvastan!

*L* Oahpat mu dovdat geainnu man vádjolit,

*S* dasgo mun bajidan sillon du guvlui.

*L* Hearrá, beastte mu mu vašálaččain,

*S* mun ozan suoji du luhtte!

*L* Oahpat mu dahkat du dáhtu,

*S* dasgo don leat mu Ipmil!

*Buo* Du buorre Vuoigŋa láidejehkos mu dássidis eatnamis.

Sál 143,7-10

## **7 Ovddasrohkosat**

Ipmilbálvalusas sáhtta geavahit ovttaháje eanet rohkosiid dán njealji čoakkáldagas I-IV.

*L* searvegoddái čalmmiid

Jorgalehkot Ipmilii rohkadusain.

Liturga jorgala áltárii go rohkadallá.

## **I Oktasaš ovddasrohkosat**

*Jogo A*  
Litaniija

*Dahje B*

IV Ovddasrohkos Allameassu ipmilbálvalusortnega mielde

## **II Erenoamáš ovddasrohkosat**

Áigeovdilis ovddasrohkosat mat leat ráhkaduvvon ovddalgihtii.

## **III Ovddasrohkosat ovttaidolbmuid ovddas**

Eaŋkilolbmot sáhttet namuhuvvot namaset mielde, maiddá konkretalaččat vuoigŋalaš ja rumašlaš diliset mielde, omd. ná:

ahte *son* nannejuvvošii/veahkehuvošii/buoriduvvošii ... jna.

ahte *don* geahpidahtášit/veahkehivččet/dearvvašmahtášit ... jna.

Sáhhtá gaskkohagaid bisánit, vai searvegoddi oazžu vejolašvuoda rohkadallat jaska iežas sániiguin.

Čuovvovaš ovddasrohkosat leat ovdamearkkat mo sáhhtá rohkadallat.

*L áltárii čalmmiid*

Hearrá, buotveagalaš Áhčči, don leat sivdnidan min; don bisuhat min ja attát midjiide dan maid mii dárbbášit vai eallit. Gásttain ja oskkuin don leat ovttastahttán min Bártniinat, Jesus Kristusiin, guhte rohkadallá min ovddas almmálaš truvnnu guoras. Su siste beassat mii čuožžut du muođuid ovddas ja addit iežamet du háldui buot dainna mii mis lea. Mii rohkadallat iežamet ovddas ja buot olbmuid ovddas guđet leat headis. Gula min rohkosa ja vástit midjiide dáhtot mielde.

Ipmil Áhčči, dán mii rohkadallat dus.

S Hearrá, gula min rohkosa.

*L* Mii giitit du go don leat addán midjiide sielu ja rupmaša, buot min dáidduid, veajuid ja máhtuid. Mii rohkadallat, ahte mii ja buot olbmot geavahivččiimet du attáldagaid du ja buot lagamuččaideamet bálvalusas.

Ipmil Áhčči, dán mii rohkadallat dus.

S Hearrá, gula min rohkosa.

*L* Mii rohkadallat doaktáriid, buohccedikšuid ja dutkiid ovddas, buohkaid ovddas guđet barget buohcceviesuin ja ášahusain. Atte sidjiide áddejumi, fámu ja návccaid sin bálvalusas.

Ipmil Áhčči, dán mii rohkadallat dus.

S Hearrá, gula min rohkosa.

*L* Ipmil, don almmustahttet fámot ja hearvásvuodát Bártnistat, Jesus Kristusis, ja addet girkosat oasi su buorideaddji bálvalusas. Mii rohkadallat: divtte Bassi Vuoiŋŋa fámu duddjot min girkus, vai Kristusa buorideaddji dahku ovdánivččii min gaskkas du dáhtu mielde ja midjiide buoremus ávkin, nugo don oainnát.

Ipmil Áhčči, dán mii rohkadallat dus.



S Herra, gula min rohkosa.

L Mii giitit du buot buhcciid ovddas geaid don leat buoridan. Mii rohkadallat ahte sii álo dorvvastit dutnje ja giitalit du du buori dagu ovddas. Veahket sin guđet eai leat buoriduvvon, vai sii gávdnet vuoiŋnadusa ja dorvvastit dasa ahte don ain anát sis fuola. Veahket min buohkaid bálvalit ja gudnejahttit du nama.

Ipmil Áhčči, dán mii rohkadallat dus.

S Herra, gula min rohkosa.

L Mii giitit du Bassi Vuoiŋŋa ovddas gii duddjo searvegottis, buot oskkolaččaid searvevuoda ovddas, ovddasmorraša ja veahki ovddas ja guhtet guimmiideamet ovddasrohkadusa ovddas.

[Mii rohkadallat dus erenoamážit ... ovddas (Dás namuhuvvojit namat mat leat

sáddejuvvon sisa.)]

Ipmil Áhčči, dán mii rohkadallat dus.

S Herra, gula min rohkosa. Amen.

## IV Ovddasrohkos gieđa bidjamiin

L searvegoddái čalmmiid

Sii guđet háliidit ovddasrohkosa gieđa bidjamiin, besset dál bohtit áltárrindái.

Go sii guđet háliidit ovddasrohkosa, leat bohtán áltárrindái:

L Rohkadallot.

L áltárii čalmmiid

Herra Jesus Kristus, guhte váldet min buozalvasaid badjelasat ja guđet min givssiid, buorit min háviidat bokte. Don guhte geigejit gieđaidat ja buoridit buhcciid, boade

dáid olbmuid lahka guđet ohcet du veahki, ja daga singuin iežat bassi ja buori dáhtot mielde.

Liturga bidjá dasto gieđa juohkehačča oaivvi ala ain hávil ja cealká:

*Jogo A*

*L* Vare bajásčuožžilan Hearrá Jesus Kristus attášii dutnje, (**namma namuhuvvo**), ráfi, fámu ja dearvvašvuoda rupmaša ja sielu bealis.

*Dahje B*

*L* Vare Ipmil Bassi Vuoigna, guhte lea Hearrá ja heaggaaddi, attášii dutnje, (**namma namuhuvvo**), dearvvašvuoda rupmaša ja sielu bealis ja ođasmahtášii du oskku bokte nohkameahttun eallimii.

Dan botta go dát dáhpuhuvvá, de sáhtta lávlut sálmmaid dahje orrut jávohaga.

*L* cealká juohke gearddi olbmuide guđet čippustit:

Ráfi lehkos dinguin.

## 8 Giittusrohkos

Go buohkat leat čohkkedan:

*L* searvegoddái čalmmiid  
Giitot ja rohkadallot.

*Jogo A*

*L* áltárii čalmmiid

Hearrá, Ipmileamet, mii giitit du go don Jesus Kristusis leat vuoitán buot bahá badjel, ja ahte don su siste lonistat sivdnádušat áiggi loahpas. Mii rohkadallat, ahte mii šattašeimmet agálaš eallima oasálažžan, bestojuvvon suddus ja buozalvasas. Atte midjiide fámu gierdat buot átestusaid ja gillámušaid go mii eallit dáppe máilmmis, vai mii álelassii giittášeimmet ja rámidivččiimet du, Jesus Kristusa, du Bártni, Hearrámet, bokte.

S Amen.

*Dahje B*

*L áltáarii čalmmiid*

Agálaš, váibmoládis Ipmil, mii giitit du go don Bassi Vuoiŋŋat bokte ealát ja duddjot min gaskkas maiddáid odne. Du háldui mii addit iežamet ja sin buohkaid geaid mii dál leat guoddán du ovdii rohkosis. Don guhte duddjot min siste fámuinat ja sáhtát dahkat ollu eambo go buot dan maid mii rohkadallat ja áddet, dutnje lehkos gudni searvegottis ja Kristus Jesusis buot sogaid čađa ja agálaččat!

S Amen.

## **9 Hearrá roHKos**

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddáid eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalusii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddáid eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddáid mii ándagassii addit min velggolaččaidasamet.

Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

## 10 Loahpahansálbma

### 11 Buressivdnádus

*L* searvegoddái čalmmiid  
Vuostáiváldet Hearrá buressivdnádusa.

*Searvegoddi čuožžila ja čuožžu gitta postludia rádjái.*

*L* Hearrá buressivdnidivččii du ja várjalivččii du.  
Hearrá divttášii muođuidis čuovgat du badjelii  
ja livččii dutnje árbmugas.  
Hearrá bajidivččii čalmmiidis du ala  
ja attášii dutnje ráfi. †  
*S* Amen.

*Čuovvovaš jaska botta čuodjalahttojuvvo girkobielluin golmma geardde golbmii.*

*L* sáhtá dás joatkit:  
Mannet ráfái. Bálvalehket Hearrá iluin.

### 12 Postludia

*Postludia botta manná báhppa eret áltáris.*

# IÐEDISLÁVLUMAT

1 Dát ortnet sáhtta geavahuvvot sihke árgabeivviid ja sotnabeivviid, ja maiddái dábálaš iditguovssolávlumis.

2 Ortnet sáhtta geavahuvvot oktan eará ortnegiiguin, omd. **Sierra eahkedismálisipmilbálvalusas.**

3 Jos báhppa jodiha ipmilbálvalusa, de sus leat liturgalaš biktasat badjelis. Jos dábálaš kristtalaš jodiha ipmilbálvalusa, de sus lea vilges oalgebivttas badjelis.

4 Son guhte jodiha ipmilbálvalusa, čuožžu lohkanbulppi guoras dahje eará vuogas báikkis koaras.

5 Ipmilbálvalus sáhtta čađahuvvot orgela haga. Orgelčuojaheaddji, luhkkár dahje muhtun eará jodiha dalle lávluma. Álggahan- ja/dahje loahpahansálbma sáhtta váldojuvvot eret.

6 Sáhtta lohkat biibballaš sálmmaid vurrolagaid, omd. liturga ja searvegoddi, dahje sáhtta lávlut daid oktan. Jos liturga/ovdalávlut dahje koarra lávlut olles teavstta, de searvegoddi sáhtta lávlut gearduma. Dát geardun sáhtta lávlojuvvot olles sálmma ovdal dahje mañnil, dahje sáhtta lávlut dan juohke njealját gurgadasa mañnil, dahje sáhtta lávlut oanehis gearduma (omd. Halleluja) juohke nuppi dahje juohke gurgadasa mañnil.

7 Sotnabeivviid dahje eará bassebeivviid geavahuvvo okta beavvi teavsttain, árgabeivviid (earret lávvordaga) okta ovddit sotnabeavvi teavsttain, dahje sáhtta lohkat ovttá biibballohkanplána teavsttain. Lávvordagaid geavahuvvo okta čuovvovaš sotnabeavvi teavsttain. Dát ii guoskka daidda beivviide mat bohtet ovdal erenoamáš beivviid girkojagis.

8 7./8. **Rohkos** laddasis sáhtta geavahit dán ortnega rohkosa. Sotnabeivviid ja eará bassebeivviid sáhtta dan sadjái válljet beavvi kolleaktarohkosa. Árgabeivviid (earret lávvordagaid) sáhtta geavahit ovddit sotnabeavvi kolleaktarohkosa. Lávvordagaid

geavahuvvo čuovvovaš sotnabeaivvi kolleaktarohkos. Dát ii guoskka daidda beivviide mat bohtet ovdal girkojagi erenoamáš beivviid.

## 1 Álggaheapmi

*Jogo A*

*L* Áhči ja Bártni ja Bassi Vuoiŋŋa nammii.

*S* Amen.

*Dahje B*

*Jos dát lea beaivvi vuosttaš ipmilbálvalus:*

*L* Hearrá, rabas mu baksamiid,

*S* vai mu njálbmi máinnošii du.

*L* Ipmil, boađe gádjut mu,

*S* Hearrá, doama beastit mu.

*Buo* Gudni lehkos Áhččái ja Bárdnái ja Bassi Vuigŋii,  
nugo lei álggus, nu dál ge ja álelassii  
ja agálašvuhtii. Amen.

## 2 Iđedissálbma

*Dahje sálbma mii heive dán beaivái dahje girkojagi áigái.*

## 3 Biibballaš sálmmat

*Jogo A*

*L* Bohtet, ávvudehkot Hearrá gudnin

ja rámiddehkot min bestojumi bávtti.

*S* Loaiddastehkot su muođuid ovdii giitosiin,

rámiddehkot su lávlumiin ja čuojahemiin!

*L* Dasgo Hearrá lea stuorra Ipmil,

buot ipmiliid alla gonagas.

*S* Sus lea eatnama čiekŋalas giedas  
ja váriid čohkat opmodahkan.

*L* Mearra lea su, dasgo son lea sivdnidan dan,  
nannáma leat su giedat hábmen.

*S* Bohtet, gopmirdehкот ja rohkadallot,  
sodjalahttot čippiideamet Hearrá, min sivdnideaddji, muođuid ovddas.

*L* Dasgo son lea min Ipmil,

*S* mii leat su álbmot, eallu man son geahččá.

*Sál 95,1-7*

*Buo* Gudni lehkos Áhččái ja Bárdnái ja Bassi Vuignii,  
nugo lei álggus, nu dál ge ja álelassii  
ja agálašvuhtii. Amen.

*Dahje B*

*L* Ipmil, leage midjiide árbmugas ja buressivdnit min.

Divtte muođuidat čuovgat min badjelii,

*S* vai du geaidnu šaddá dovddusin eatnama alde,  
ja du bestojupmi buot álbmogiid gaskkas.

*L* Álbmogat rámidit du, Ipmil,

buot álbmogat rámidit du.

*S* Olmmošcearddat illudit ja ávvudit,  
dasgo don dubmet álbmogiid vuoigatlaččat.  
Don láidet olmmošcearddaid eatnama alde.



*L* Álbmogat rámidit du, Ipmil,  
buot álbmogat rámidit du.

*S* Eanan lea addán šattus,  
Ipmil, min Ipmil buressivdnida min.

*L* Ipmil buressivdnidivččii min,  
*S* ballos sus olles eanan.

*Sálbma 67, 2-8*

*Buo* Gudni lehkos Áhččái ja Bárdnái ja Bassi Vuignji,  
nugo lei álggus, nu dál ge ja álelassii  
ja agálašvuhtii. Amen.

*Dahje C*

*L* Rámidehket Hearrá, oppa eanan.  
Bálvalehket Hearrá ilus,  
bohtet su muođuid ovdii ávuin!

*S* Dovdet ahte Hearrá lea Ipmil!  
Son lea sivdnidan min, ja mii leat su,  
su olbmot ja su sávzzat maid son geahččá.

*L* Mannet su poarttaid čađa giittuslávlagiin,  
mannet su ovdašiljuide máidnunlávlagiin.  
Giitet su ja máidnot su nama!

*S* Dasgo Hearrá lea buorre,  
su árbmugasvuohta bistá agálaš áigái,  
su oskkáldasvuohta sogas sohki.

*Sálbma 100,1-5*

*Buo* Gudni lehkos Áhččái ja Bárdnái ja Bassi Vuignii,  
nugo lei álggus, nu dál ge ja álelassii  
ja agálašvuhtii. Amen.

## **4 Teakstalohkan**

Teakstalohkan álgá ná:

Lea čállojuvvon ...

Teakstalohkan loahpahuvo ná:

Nu čuodjá Hearrá sátni.

Dasto sáhttet searvegoddi ja liturga cealkit dahje lávlut apoastallaš dahje nikealaš  
oskkudovddastusa, geahča s. 13-16.

Dás sáhtá čuovvut

## **5 Sárdni dahje teakstameditašuvdna**

### **6 Sakarja máidnunlávlla      BENEDICTUS**

*L* Máidnojuvvon lehkos Hearrá, Israela Ipmil,  
dasgo son oahppaladdá álbmogis ja lonista dan.

*S* Son čuoččáldahtá midjiide bestojumi čoarvvi  
bálvaleddjis Dávveda sogas,

*L* nugo son lohpidii dološ áiggi rájes  
bassi profehťaidis bokte,

*S* ahte mii bestojuvvošeimmet min vašálaččain,  
buohkain geat vašuhit min.

*L* Nu son árpmiha min máddariid  
ja atná muittus bassi lihtus,  
dan váli maid son vuortnui min áhččái Abrahamii,  
*S* ahte son gádju min eret min vašálaččain,  
vai mii balakeahtta beasašeimmet bálvalit su  
buhtisvuodas ja vanhurskkisvuodas su muođuid ovddas buot beivviideamet.

*L* Ja don, mánážan, gohčoduvvot Alimusa profehtan,  
dasgo don manat Hearrá ovddas ja válmmaštahtát su geainnuid  
*S* ja oahpásmahtát su álbmogii bestojumi  
suttuid ándagassii addojumiin,

*L* dasgo min Ipmil lea árbmugas ja váibmoládis.  
Son oahppaladdá min allagasas dego beaivváža badjáneapmi  
*S* báitin dihtii sidjiide geat orrot seavdnjadasas ja jápmima suoivanis,  
ja láiden dihtii min julggiid ráfi geidnui.

*Luk 1,68-79*

*Buo* Gudni lehkos Áhččái ja Bárdnái ja Bassi Vuignji,  
nugo lei álggus, nu dál ge ja álelassii ja agálaččat. Amen.

## **7 Rohkos**

*Jogo A*

*L* Rohkadallot mii buohkat.

*Kolleaktarohkos*

S Amen

*Dahje B*

*L* Giitot ja rohkadallot.

Herrá Ipmileamet ja Áhččámet, mii giitit du go don leat diktán min morihit dán beaivái, ja go odđasis divttát min gullat sága Jesus Kristusa birra, gean don bajásčuoččáldahttet jábmiid luhtte ja dahket girkot Hearrán. Mii rohkadallat: Rabas min váimmuid, vai mii vuostáiválddášeimmet bestojumi evangeliuma ja du dáhtu mielde vádjolivččiimet buhtes eallimis, du Bártni, Jesus Kristusa, Hearrámet, bokte.

S Amen

*Dahje C*

*L* Rohkadallot.

Herrá, buotveagalaš Ipmil, guhte leat addán midjiide odđa beaivvi, mii rohkadallat: Nanne min fámuinat, amamet jorralit suddui. Láide min jurdagiid, sániid ja daguid, vai mii dagašeimmet rievttuid, dutnje gudnin ja min lagamuččaide ávkin, du Bártni, Jesus Kristusa, Hearrámet, bokte.

S Amen.

*Dahje D*

*Litaniija, geahča omd. Sálbmagirjjis.*

*Dahje E*

*L* Rohkadallot.

*Eará rohkos, ráhkaduvvon ovddalgihtii.*

*Dasto sáhtta joatkit ná:*

*L* Rohkadallot ain, jitnosit dahje jaska.

*Son guhte rohkadallá jitnosit, loahpaha ná:*

*Ipmil, mii rohkadallat dus dan.*

S Hearrá, gula min rohkosa.

## 8 Hearrá rohkos

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## 9 Loahpahansálbma

### 10 Loahpaheapmi

*Jogo A*

*L searvegoddái čalmmiid*

Máidnot Hearrá.

*S* Máidnojuvvon lehkos Ipmil.

Halleluja, halleluja, halleluja.

*Dahje B*

*L searvegoddái čalmmiid*

Hearrá lehkos dinguin.

*Searvegoddi čuožžila.*

*S* Ja du vuoigŋain.

*L* Hearrámet Jesus Kristusa árbmu,

Ipmila ráhkisvuohta ja Bassi Vuoigŋa servvolašvuohta  
lehkos dinguin (minguin) buohkaiguin.

*S* Amen.

*Dás sáhhtá čuovvut*

### Postludia

# EAHKEDISLÁVLUMAT

Dát ortnet sáhtá geavahuvvot sihke árgabeivviid ja sotnabeivviid, maiddái dábalaš eahkedislávlumin.

## 1 Álggaheapmi

*Jogo A*

*L* Áhči ja Bártni ja Bassi Vuoiŋŋa nammii.

*S* Amen.

*Dahje B*

*L* Ipmil, boađe gádjut mu,

*S* Hearrá, doama beastit mu.

*L* Gudni lehkos Áhččái ja Bárdnái ja Bassi Vuignji,

*Buo* nugo lei álggus, nu dál ge ja álelassii ja agálašvuhtii. Amen. Halleluja.

## 2 Eahkedissálbma

Sálbma mii vástida beivvi iešvuoda dahje girkojagi áiggi.

## 3 Biibballaš sálmmat

Dás čuvvot okta, guokte dahje golbma biibballaš sálmma. Okta dain sáhtá leat Ođđa testamentta máidnunlávlagiin.

## 4 Teakstalohkan

Teakstalohkan álggahuvvo ná:

Lea čállojuvvon ...

Teakstalohkan loahppahuvvo ná:

Nu čuodjá Hearrá sátni.

Dás sáhtá čuovvut vástádussálbma, geahča Sálbmagirjji nr. legg inn salmenr

Teakstalohkama ja maddái vástádussálmma maŋŋil, jos geavahuvvo, sáhtá leat jaskatvuhta.

Dasto searvegoddi ja liturga sáhtá cealkit apoastallaš dahje nikealaš oskkudovddastusa,  
geahča siidduin 13-16.

Dás sáhtá čuovvut:

## 5 Sárdni dahje teakstameditašuvdna

### 6 Márjjá máidnunlávlla MAGNIFICAT

*L* Mu siellu rávida Hearrá,

ja mu vuoigŋa ávvuda Ipmila, mu beasti, dihtii.

*S* Dasgo son lea geahččan vuollegis bálvaleaddjásis.

Dás duohko buot sogat rámidit mu ávdugassan,

*L* dasgo buotveagalaš Ipmil dahká munnje stuorra daguid,

bassi lea su namma.

*S* Sogas sohkkii son árkkálmastá sin geat ballet sus.

*L* Su gievrras gieđat dahket fámoláš daguid;

son biđe sin gain leat čeavlás jurdagat sin váimmuin,

*S* ja nordada ráđdejeddjiid eret truvnnuin

ja bajida smávvaíd.



*L* Son biebma nealguid buriid attáldagaiguin,  
muhto riggáid son vuolggaha eret iežas luhtte guoros giedaid.

*S* Son veahkeha bálvleaddjis Israela  
ii ge vajáldahte árpmiheames su

*L* nugo lohpidii min máddariidda,  
Abrahamii ja su sohki agálaš áigái.

*Luk 1, 46-55*

*Buo* Gudni lehkos Áhčái ja Bárdnái ja Bassi Vuigñii,  
nugo lei álggus, nu dál ge ja álelassii  
ja agálašvuhtii. Amen.

## **7 Rohkos**

*Jogo A*

*L* Rohkadallot.

*Kolleaktarohkos*

*S* Amen

*Dahje B*

*L* Rohkadallot.

Herrá Ipmil, almmálaš Áhčči. Mii giitit du go don stuorra árpmustat ja váibmoládisvuodastat leat addán midjiide bassi sánát, ja dan bokte čohkket kristtalaš girkot maiddá dáppe min luhtte. Mii rohkadallat: Atte midjiide Bassi Vuoiñjat, vai mii giitevaš váimmuiguin vuostáiválddášeimmet du sáni ja ealášeimmet dan mielde, ja álelassii ovdánivččiimet kristtalaš oskui, doivui ja ráhkisvuhtii, ja de šattašeimmet ávdugassan, du ráhkis Bártni, Jesus Kristusa, Heerrámet, bokte, guhte eallá ja rádde du ja Bassi Vuoiñja searvevuodas, oktan duohta Ipmilin agálašvuodas agálašvuhtii.

S Amen.

*Dahje C*

Herrá, Ipmileamet ja Áhčči, mii giitit du go don leat sivdnidan čuovgga ja beivvi. Mii rohkadallat: Oro min luhtte go beivi luoitáda, ja várjal min seavdnjadasa ja bahá vašálačča vuostái. Suova min dáppe eatnama alde orrut du árbmugasvuodas ja oktii manjimus beivvi mannat agálaš vuoiŋŋadussii ja ráfái. Du Bártni, Jesus Kristusa, Herrámet, bokte.

S Amen.

*Dahje F*

L Rohkadallot.

Okta Allameassu lágadusa ovddasrohkosiin.

Sáhtta dasto joatkit ná:

L Rohkadallot ain, jitnosit dahje jaska.

Son guhte rohkadallá jitnosit, loahpaha ná:

Ipmil, dan mii rohkadallat dus.

S Herrá, gula min rohkosa.

## **Herrá rohkos**

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.  
Ale ge doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

*Dahje*

*Buo* Áhčči min, don guhte leat almmis!  
Basuhuvvos du namma.  
Bohtos du riika.  
Šaddos du dáhttu  
mo almmis nu maiddái eatnama alde.  
Atte midjiide odne min beaivválaš láibámet.  
Ja atte midjiide min suttuideamet ándagassii,  
nugo maiddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

## 9 Loahpahansálbma

## 10 Loahpaheapmi

*Jogo A*

*L* searvegoddái čalmmiid

Máidnot Hearrá.

S Máidnojuvvon lehkos Ipmil. Halleluja, halleluja, halleluja.

*Dahje B*

*L* searvegoddái čalmmiid

Hearrá lehkos dinguin.

Searvegoddi čuožžila.

S Ja du vuoijñain.

L Hearrámet Jesus Kristusa árbmu,  
Ipmila ráhkisvuohta ja Bassi Vuoijña servvolašvuohta  
lehkos dinguin (minguin) buohkaiguin.

S Amen.

Dás sáhtta čuovvut

**Postludia**

# EAHKETROHKOS

Dát ortnet sáhhtá geavahuvvot sihke árgabeivviid ja sotnabeivviid, maiddáí mearriduvvon eahkedislávlumiin.

Muđuid, geahča rávvaga s. 101.

## 1 Álggaheapmi

*Jogo A*

L Áhči ja Bártni ja Bassi Vuoiŋŋa nammii.

S Amen.

*Dahje B*

L Ipmil, boađe gádjut mu,

S Hearrá, doama beastit mu.

L Gudni lehkos Áhččái ja Bárdnái ja Bassi Vuignji,

*Buo* nugo lei álggus, nu dál ge ja álelassii  
ja agálašvuhtii. Amen. Halleluja.

## 2 Eahketsálbma

*Dás sáhhtá čuovvut:*

## 3 Suttudovddastus

L Gopmirdehкот Ipmila ovdii ja dovddastehкот suttuideamet.

*Jogo A*

*Buo* Mii dovddastit dutnje, bassi Ipmil,  
ahte mii dávjá ja mángga láhkái leat suddudan du vuostái  
jurdagiiguin, sániiguin ja daguiguin  
ja ánsásáit duomu ja ránggáštusa.  
Geahča midjiide váibmoládisvuodastat  
ja atte midjiide min rihkkumiid ándagassii Jesus Kristusa dihtii.

### *Dahje B*

*Buo* Ipmil, leage munnje árbmugas!  
Mun lean rihkkon du vuostái ja beahtán lagamužžan  
jurdagiiguin ja sániiguin, daguidanguin ja berošmeahtunvuodainan.  
Atte munnje mu sudduid ándagassii Jesus Kristusa dihtii.  
Sivdnit munnje buhtes váimmu,  
ja atte munnje fámu odđa eallimii Bassi Vuoiŋŋat bokte.

## **4 Biibbalaš sálbma**

*Dorvosálbma Sálmmaid girjjis.*

## **5 Teakstalohkan**

*Teakstalohkan álggahuvvo ná:*

Lea čállojuvvon ...

*Teakstalohkan loahpahunvuo ná:*

Nu čuodjá Hearrá sátni.

*Dás sáhtá čuovvut vástádussálbma.*

*Teakstalohkama ja vástádussálbma manjil sáhtá leat jaska.*

*Dasto sáhtá čuovvut:*

## 6 Teakstameditašuvdna

## 7 Simmona máidnunlávlla NUNC DIMITTIS

*L* Hearrá, dál divttát bálvaleddját vuolgit dáppe ráfis,  
nugo don leat cealkán.

*S* Dasgo mu čalmmat leat oaidnán du bestojumi  
man don leat ráhkadan buot álbmogiid oidnosis,

*L* čuovgasa mii šaddá almmustussan báhkiniidda

*S* ja gudnin du álbmogii Israelii.

*Luk 2:29-31*

*Buo* Gudni lehkos Áhččái ja Bárdnái ja Bassi Vuignji,  
nugo lei álggus, nu dál ge ja álelassii  
ja agálašvuhtii. Amen.

## 8 Rohkos

*Jogo A*

*L* Rohkadallot.

*Kolleaktarohkos.*

*S* Amen.

*Dahje B*

*L* Rohkadallot.

Herrá, Ipmileamet ja Áhčči, mii giitit du go don leat sivdnidan čuovgga ja beaivvi. Mii rohkadallat: Oro min luhtte go beaivi luoitáda, ja várjal min seavdnjadasa ja bahá vašálačča vuostái. Suova min dáppe eatnama alde orrut du árbmugasvuoda vuolde ja oktii mañimuš beaivvi mannat agálaš vuoiñjadussii ja ráfái. Du Bártni, Jesus Kristusa, Herrámet, bokte.

S Amen.

*Das mañnil sáhtta joatkit ná:*

*L* Rohkadallot ain, jitnosit dahje jaska.

*Son guhte rohkallá jitnosit, loahpaha ná:*

Ipmil, mii rohkadallat dus dan.

S Herrá, gula min rohkosa.

## **9 Herrá roHKos**

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maddái eatnama alde.

Atte midjiide odne min beaivválaš láibbi.

Atte midjiide min suddid ándagassii,

nugo mii ge ándagassii addit velggolaččaidasamet.

Ale ge doalvvo min geahččalusii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!



Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## 10 Ipmila háldui addin

*L* Du gihtii mun attán vuoigŋan, HERRÁ Ipmil.

*S* Du gihtii mun attán vuoigŋan, HERRÁ Ipmil.

*L* Don lonistat mu, HERRÁ, don oskkáldas Ipmil.

*S* Du gihtii mun bijan vuoigŋan.

*Sál 31,6*

*L* Gudni lehkos Áhččái ja Bárdnái ja Bassi Vuignii.

*S* Du gihtii mun attán vuoigŋan.

## 11 Loahpaheapmi

*Jogo A*

*L* searvegoddái čalmmiid

Máidnot HERRÁ.

*S* Máidnojuvvon lehkos Ipmil. Halleluja, halleluja, halleluja.

*Dahje B*

*L* searvegoddái čalmmiid

Herrá lehkos dinguin.

*Searvegoddi čuožžila.*

*S* Ja du vuoijñain.

*L* Herrámet Jesus Kristusa árbmu,

Ipmila ráhkisvuohta ja Bassi Vuoijña servvolašvuohta  
lehkos dinguin (minguin) buohkaiguin.

*S* Amen.

*Dás sáhhtá čuovvut*

**Postludia**

# MÁNÁIDGÁSTA

## ALLAMEASSUS DAHJE EARÁ IPMILBÁLVALUSAIN

1 Risváhnemat galget leat unnimusat guokte.

2 Ovdal go ipmilbálvalus álggahuvvo, de váhnemat ja risváhnemat čohkkedit girkui - earret son guhte doallá máná.

3 Go máná guddojuvvo girkui, de okta sáhtá mieđuštit su guhte guoddá máná.

4 Luhkkár dahje eará searvegotti áirras sáhtá čuovvut gástajoavkku girku sisa, ja sáhtá maddái guoddit gástagátno ja bidjat dan gástalihtái.

5 Gástajoavku manná čohkkedit báikkálaš searvegotti vieru mielde.

6 Čuojahuvvo dahje lávlojuvvo go máná guddojuvvo sisa.

7 Gástasálbma, 2. lađas, sáhtá lávlojuvvot ovdal 1. lađđasa, go máná lea guddojuvvon sisa.

8 Gástagahpir váldojuvvo eret ovdal go máná guddojuvvo gástalihti lusa.

9 Gásttašeamis namuhuvvo dušše máná ovdanamma (gaskanama dahje goarggu haga), muhto olles namma namuhuvvo ipmilbálvalusa diedáhusain.

10 Liturggas lea badjelis stola girkojagi ivnni mielde.

11 Dát mánáidgástaortnet geavahuvvo maddái go gásta doaimmahuvvo dalán ipmilbálvalusa maŋŋil.

12 Gástta maŋŋil berre leiket gástačázi heivvolaš báikái, omd. olggobeallái viessošeainni gurii gos ii dulbmojuvvo.



# 1 Álggaheapmi

*Jogo A*

*L lohkanbulppis dahje eará sajis koaras, searvegoddái čalmmiid*

Áhči ja Bártni ja Bassi Vuoiŋŋa nammii.

*Dahje B*

*L lohkanbulppis dahje eará sajis koaras, searvegoddái čalmmiid*

Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

*Dás välljejuvvo dat molssaeaktu mii ii geavahuvvon go ipmilbálvalus álggahuvvui.*

*L Searvegoddi vuostáiváldá odne Ipmila viesus dán máná (dáid mánáid) gean (geaid) Ipmil lea addán didjiide. Mii giitit Ipmila máná (mánáid) ja ođđa heakka ovddas ja addit dan (daid) dál Ipmila háldui. Gásttas Ipmil addá sutnje (sudnuide/sidjiide) bestojumis ja váldá su (sudno, sin) kristtalaš girkosis.*

*Liturga sáhtta dasto doallat oanehis sártni, mii loahpahuvvo Joh 3,16:in dahje Sál 118,24:in.*

*Sáhtta maiddá geavahit dušše dán čálasáni:*

*Jogo A*

*L Dasgo nu Ipmil lea ráhkistan máilmmi, ahte son attii áidnoriegádan Bártnis, vai dat geat oskot sutnje eai lámppo, muhto ožžot agálaš eallima.*

*Joh 3,16*

*Dahje B*

*L Dát lea beaivi man Hearrá lea dahkan; ávvudehкот ja illudehкот mii dán beaivvi.*

*Sál 118,24*

## 2 Gástasálbma

### 3 Gástagohččun

L Gullot Hearrámet Jesus Kristusa gohččuma bassi gástta birra:

Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoigŋa nammii ja oahpahettiin sin doallat buot dan maid mun lean gohččon din doallat. Ja geahča, mun lean dinguin buot beivviid gitta máilmmi loahpa rádjái.

Matt 28,18-20

Gullot dasto man ustitlaččat Jesus váldá uhca mánáziid vuostái ja rabasta sidjiide Ipmila riikka:

Sii gudde uhca mánáziid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: "Diktet uhca mánáziid boahit mu lusa, allet ge hehte sin! Dasgo Ipmila riika gullá dakkáraččaide. Duodaid, mun cealkkán didjiide: Dat guhte ii vuostáiváldde Ipmila riikka nugo uhca mánáš ii eisege beasa dan sisa." Ja son válddii sin sallasis, bijai gieđaidis sin ala ja buressivdnidii sin.

Mark 10,13-16

De mii ge guoddit giitosiin ja oskkuin mánáideamet Hearrá lusa bassi gásttas. Sii leat riegádan suddolaš olmmošohkagottis, muhto sii šaddet Ipmila mánnán gásttas mas Bassi Vuoigŋa riegádahtá sin odđasis.

### 4 Gástta geatnegasvuohta

L Čuožžilehkuset váhnemat ja risváhnemat.

Jogo A

L Dii guđet odne lehpēt *dán máná* (dáid mánáid) risváhnemat, galgabehtet duodašit ahte *son* (soai, sii) lea (leaba, leat) gásttašuvvon Áhči ja Bártni ja Bassi Vuoigŋa nammii. Oktan dáinna searvegottiin ja oppa min girkuin oazžubehtet dán bassi ovddasvástádusa: rohkadallat *máná* (mánáid) ovddas, oahpahit *su* (sudno, sin) rohkadallat ja veahkehit *su* (sudno, sin) geavahit Ipmila sáni ja Hearrá bassi eahkedismállásiid, vai *son* (soai, sii) bissu (bissuba, bissot) Kristusa luhte go bajásšaddá (bajásšaddaba, bajásšaddet), nugo *son* (soai, sii) gásttas lea (leaba, leat) ovttahttojuvvon suinna.

Dahje B

Okta risváhnemiin boahtá ovdan ja lohká jitnosit, searvegoddái čalmmiid:

Mii leat dál odne *dán máná* (dáid mánáid) risváhnemat ja duodaštit ahte *son* (soai, sii) lea (leaba, leat) gásttašuvvon Áhči ja Bártni ja Bassi Vuoiŋŋa nammii. Oktan dáinna searvegottiin ja oppa min girkuin mii oažžut dán bassi ovddasvástádusa: rohkadallat *máná* (mánáid) ovddas, oahpahit *su* (sudno, sin) rohkadallat ja veahkehit *su* (sudno, sin) geavahit Ipmila sáni ja Herra bassi eahkedismállásiid, vai *son* (soai, sii) bissu (bissuba, bissot) Kristusa luhtte go bajásšaddá (bajásšaddaba, bajásšaddet), nugo *son* (soai, sii) gásttas lea (leaba, leat) ovttastahttojuvvon sinna.

Váhnemat ja risváhnemat čužžot ain.

## 5 Biehttaleapmi ja osku

*L* Dovddastehkot biehttaleami ja osku masa mii gásttašit mánáideamet.

Searvegoddi čuožžila.

*Buo* Mun biehttan beargalagas  
ja buot su daguin  
ja buot su meanuin.

*Jogo*  
Mun oskkun Ipmil Áhččái, buotveagalažžii,  
almmi ja eatnama sivdnideaddjái.

Mun oskkun Jesus Kristusii,  
Ipmila áidnoriegádan Bárdnái, min Herraí,  
guhte sahkanii Bassi Vuoiŋŋas,  
riegádii nieiddas Márjjás,  
givssiduvvui Pontius Pilatusa áiggi,  
russiinávlejuvvui, jámii ja hávdáduvvui,  
njejai jábmiid riikii,  
bajásčuožžilii jábmiid luhtte goalmát beivvi,  
manai bajás albmái,

čohkká Ipmila, buotveagalaš Áhči, olgeš gieđa bealde,  
máhccá doppe dubmet elliid ja jábmiid.

Mun oskkun Bassi Vuigŋii,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

*Apoastallaš oskkudovddastus*

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,  
guhte sahkanii Bassi Vuoiŋŋa bokte,  
riegádii nieida Marias,  
givssiduvvui Pontius Pilatusa vuolde,  
russiinávlejuvvui, jámii ja hávdáduvvui,  
vuolás manai jábmiid riikii,  
bajásčuožžilii jábmiid luhtte goalmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieđa bealde,  
galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami



ja agálaš eallima.

Amen.

Apoastallaš oskkudovddastus

Buohkat čohkkedit.

## 6 Gásta

Čáhci leikejuvvo gástalihtái.

*L gástalihti guoras*

Rohkadallot.

Hearrá Jesus Kristus, don rávkkat min Ipmila riikii gástta bokte. Mii giitit du go gástta čáhci oktan du sániin lea árpmu ája, mas don ovttastahtát min duinna ja dagat min dan vuoittu oasálaš man don vuitet jápmimiinnát ja bajásčuožžilemiinat. Dál mii boahtit du sáni mielde ja rohkadallat, Hearrá, ahte ođđa riegádeapmi šattašii du sivdnideaddji Vuoiŋŋa bokte.

Máná (jos ležžet eanebut, de okta hávil) buktojuvvo gástalihti lusa. Váhnemat ja risváhnemat čuožžilit. Go lea lunddolaš, de váhnemat ja risváhnemat sáhttet mannat gástalihti lusa.

*L Mii lea máná namma?*

Son guhte guoddá máná, namuha máná ovdanama.

*L Dáhttubehtet go (máná ovdanamma namuhuvvo) gásttašuvvot Áhči ja Bártni ja Bassi Vuoiŋŋa nammii ja bajásgešsojuvvot kristtalaš biehttaleami ja oskku siste?*

Son guhte guoddá máná, vástida: De dáhttut.

*L Ipmil várjalivččii du olggosmannama ja du sisamannama dálážis ja agálaš áigái.*

Mun merken du bassi ruossa mearkkain, † duođaštussan ahte don dál gulat russiinárvlejuvvon ja bajásčuožžilan Jesus Kristusii ja oskkut sutnje.

Ruossa merkejuvvo gállus raddái, ja dasto oalggis oalgái.

*L* Hearrámet Jesus Kristusa sáni ja gohččuma mielde mun gásttašan du Áhči ja Bártni ja Bassi Vuoiŋŋa nammii.

*Cealkkedettiin dán liturga goive gieđain čázi golmma geardde máná oaivvi ala.*

*L bidjá gieđa máná oaivvi ala ja cealká:*

Buotveagalaš Ipmil lea dál addán dutnje Bassi Vuoiŋŋas, dahkan du mánnánis ja váldán du oskkolaš searvegoddásis. Son nannešii du árpmuinis agálaš eallimii.

Ráfi lehkos duinna.

## **7 Máidnun ja rohkos**

*Go buohkat leat gásttašuvvon, de liturga cealká lohkanbulppis dahje eará sajis koaras:*

*L* Máidnojuvvon lehkos Ipmil, Hearrámet Jesus Kristusa Áhčči, guhte stuorra váibmoláđisvuodastis lea riegádahtán min odđasis ja addán midjiide ealli doaivvu go bajásčuoččáldahtii Jesus Kristusa jábmiid luhtte!

*1 Biet 1,3*

*L* Rohkadallot Hearrá rohkosa.

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## 8 Sálbma

Go leat eahkedismállásat, de dát lea **Sálbma eahkedismállásiid ovdal**. Go eai leat eahkedismállásat, de dát lea **Loahpahansálbma**.

Go gásta lea dalán ipmilbálvalusa maŋŋil, de liturga sáhhtá rohkadallat čuovvovaš kolleaktarohkosa "Máidnojuvvon lehkos Ipmil" maŋŋil:

*L* Giitot ja rohkadallot.

Herrá Ipmil, almmálaš Áhčči, don leat lohpidan midjiide ahte áiggut leat min Ipmil ja min mánáid Ipmil ja čájehit árkkálmastinvuođat sogas sohkkii. Mii giitit du go don válddát min vuostái bassi gásttas mánnán juo, ja das attát midjiide suttuid ándagassii addojumi, eallima ja ávdugasvuođa. Mii rohkadallat, veahket min soahat buori soadi, ollašuhhtit min mátkki ja doallat gitta oskkus, ja doalvvo min agálaš eallimii, Bárnát, Jesus Kristusa, Hearrámet, bokte.

*L* Rohkadallot Herrá rohkosa:

### *Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

### *Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Gásttašeapmi loahpahunvvo ná:*

## **8 Sálbma**

# GÁSTA RUOVTTUS

- 1 Dát vuohki geavahuvvo go mánná gásttašuvvo ruovttus.
- 2 Gásta ruovttus gáibida ahte unnimusat nubbi váhnen miehtá dasa. Váhnemat berreba leat mielde. Galget leat unnimusat guokte duođašteaddji mielde gásttašeaddji lassin.
- 3 Duođašteaddjit eai leat risváhnemat, muhto duođaštit gástta. Muđui sis eai leat geatnegasvuodát. Váhnemat sáhttet maŋŋil mearridit geaid dáhttot máná risváhnemin go mánná risttašuvvo.
- 4 Gástta maŋŋil gástačázi berre leiket heivvolaš báikái, omd. olggobeallái, viessošeainni gurrii gos ii dulbmojuvvo.
- 5 Gásta dieđihuvvo suohkanbáhppii nu fargga go vejolaš.

# 1 Álggahansálbma

## 2 Álggaheapmi

Gásttašeaddji cealká:

*Jogo A*

Áhči ja Bártni ja Bassi Vuoiŋŋa nammii.

*Dahje B*

Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

Dasto joatká:

Mii leat čoagganan dása gásttašit *dán máná* (dáid mánáid) gean (geaid) Ipmil lea addán didjiide. Gásttas Ipmil addá *sutnje* (sudnuide, sidjiide) bestojumis ja váldá *su* (sudno, sin) kristtalaš girkosis.

Gásttašeaddji sáhtta dasto doallat sártni.

## 3 Sálbma

## 4 Gástagohččun

Gásttašeaddji:

Gullot Hearrámet Jesus Kristusá gohččuma bassi gástta birra:

Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttajeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja geahča, mun lean dinguin buot beivviid gitta máilmmi loahpa rádjái.

*Matt 28,18-20*

Gullot dasto man ustitlaččat Jesus váldá uhca mánáziid vuostái ja rabasta sidjiide Ipmila riikka:

Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: "Diktet uhca mánážiid boahit mu lusa, allet ge hehte sin! Dasgo Ipmila riika gullá dakkáraččaide. Duodaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa." Ja son válddii sin sallas, bijai gieđaidis sin ala ja buressivdnidii sin. **Mark 10,13-16**

De mii ge guoddit giitosiin ja oskkuin bassi gástii mánáideamet Herra lusa bassi gásttas. Sii leat riegádan suddolaš olmmošohkagottis, muhto gásttas sii šaddet Ipmila mánnán ja riegádit oddasis Bassi Vuoiŋŋa bokte.

## 5 Biehttaleapmi ja osku

**Gásttašeaddji:**

Dovddastehkot biehttaleami ja oskku masa mii gásttašit mánáideamet.

**Buohkat čuožžilit.**

*Buo* Mun biehttan beargalagas  
ja buot su daguin  
ja buot su meanuin.

*Jogo*

Mun oskkun Ipmil Áhččái, buotveagalažžii,  
almmi ja eatnama sivdnideaddjái.

Mun oskkun Jesus Kristusii,  
Ipmila áidnoriegádan Bárdnái, min Herraí,  
guhte sahkanii Bassi Vuoiŋŋas,  
riegádii nieiddas Márjjás,  
givssiduvvui Pontius Pilatusa áiggi,  
russiinávljuvvui, jámii ja hávdáduvvui,  
njejai jábmiid riikii,  
bajásčuožžilii jábmiid luhtte goalmát beivvi,  
manai bajás albmái,  
čohkká Ipmila, buotveagalaš Áhči, olgeš gieđa bealde,

máhccá doppe dubmet elliid ja jábmiid.

Mun oskkun Bassi Vuignii,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

**Apoastallaš oskkudovddastus**

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,  
guhte sahkanii Bassi Vuoiŋŋa bokte,  
riegádii nieida Marias,  
givssiduvvui Pontius Pilatusa vuolde,  
russiinávlejuvvui, jámii ja hávdáduvvui,  
vuolás manai jábmiid riikii,  
bajásčuožžilii jábmiid luhtte goalmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieda bealde,  
galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.



Amen.

Apoastallaš oskkudovddastus

Buohkat čohkkedit.

## 6 Gásta

Čáhci leikejuvvo heivvolaš lihttái.

Gásttašeadji:

Rohkadallot.

Herrá Jesus Kristus, don leat cealkán ahte ii oktage beasa Ipmila riikii muđuid go riegáda odđasis čázis ja Vuoiŋnas. Mii giitit du go gástta čáhci du sáni bokte lea árpmu ája, mas don ovttahtát min duinna ja attát midjiide oasi dan vuottus man don vuitet jápmimiinnát ja bajásčuožžilemiinat. Dál mii boahtit du sáni mielde ja rohkadallat dus, Herrá, ahte odđa riegádeapmi šattašii du sivdnideaddji Vuoiŋna bokte.

Máná buktojuvvo gástalihti lusa. Váhnemat ja vihtanat čuožžilit.

Gásttašeadji:

Mii lea máná namma?

Son guhte guoddá máná, namuha máná ovdanama.

Gásttašeadji:

Dáhttubehtet go (máná ovdanamma namuhuvvo) gásttašuvvot Áhči ja Bártni ja Bassi Vuoiŋna nammii ja bajásgessojuvvo kristtalaš biehttaleami ja oskku siste?

Son guhte guoddá máná, vástida: De dáhttut.

Gásttašeadji:

Ipmil várjalehkos du olggosmannama ja du sisamannama dálážis ja agálaš áigái.

Mun merken du bassi ruossa mearkkain, † duodaštussan ahte don gulat russiinárvlejuvvon ja bajásčuožžilan Jesus Kristusii ja oskkut sutnje.

Ruossa merkejuvvo gállus raddái, ja dasto oalggis oalgái.

Herrámet Jesus Kristusa sáni ja gohččuma mielde mun gásttašan du Áhči ja Bártni ja Bassi Vuoiŋna nammii.

Cealkkedettiin dán gásttašeadji goive giedain čázi golmma geardde máná oaivvi ala.

**Gásttašeddji bidjá gieđa máná oaivvi ala ja cealká:**

Buotveagalaš Ipmil lea dál addán dutnje Bassi Vuoiŋas, dahkan du mánnanis ja váldán du oskkolaš searvegoddásis. Son nannešii du árpmuinis agálaš eallimii. Ráfi lehkos duinna.

## **7 Rohkos**

**Gásttašeddji:**

Rohkadallot Hearrá rohkosa.

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,  
nugo maddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

## **8 Sálbma**

# RÁVVÁSIIDGÁSTA

## ALLAMEASSUS DAHJE EARÁ IPMILBÁLVALUSAIN

1 Ovdal go gásttašeapmi álggahuvvo, de gástaolmmoš ja risváhnemat čohkkedit gástalihti lahka.

2 Gástasálbma, 2. lađas, sáhtta lávlojuvvot ovdal 1. lađđasa.

3 Gásttašeamis namuhuvvo dušše gástaolbmo ovdanamma (gaskanama dahje goarggu haga), muhto olles namma namuhuvvo ipmilbálvalusa dieđáhusain.

4 Liturggas lea badjelis stola girkojagi ivnni mielde.

5 Dát rávvásiidgástaortnet geavahuvvo maidđái go gásta doaimmahuvvo dalán ipmilbálvalusa maŋŋil.

## 1 Álggaheapmi

*Jogo A*

*L* lohkanbulppis dahje eará sajis koaras, searvegoddái čalmmiid

Áhči ja Bártni ja Bassi Vuoiŋŋa nammii.

*Dahje B*

*L* lohkanbulppis dahje eará sajis koaras, searvegoddái čalmmiid

Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

Dás välljejuvvo dat molssaeaktu mii ii geavahuvvon go ipmilbálvalus álggahuvvui.

L Searvegoddi váldá odne du vuostái Ipmila viesus. Gásttas Ipmil addá dutnje bestojumis ja váldá du kristtalaš girkosis.

Liturga sáhtta dasto doallat oanehis sártni, mii loahpahunvo teavsttain Joh 3,16.

Sáhtta maiddái geavahit dušše dán čálasáni:

### *Jogo A*

L Dasgo nu Ipmil lea ráhkistan máilmmi, ahte son attii áidnoriegádan Bártnis, vai dat geat oskot sutnje eai láhppo, muhto ožžot agálaš eallima. **Joh 3,16**

### *Dahje B*

L Dát lea beaivi man Hearrá lea dahkan; ávvudehkot ja illudehkot mii dán beaivvi.

Sál 118,24

## **2 Gástasálbma**

### **3 Gástagohččun**

L Gullot Hearrámet Jesus Kristusa gohččuma bassi gástta birra:

Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja geahča, mun lean dinguin buot beivviid gitta máilmmi loahpa rádjái.

**Matt 28,18-20**

Go Biehtár lei sárdnon olbmuide hellodatbeaivvi, de sii jerre sus ja eará apoastaliin: "Vieljat, maid mii galgat dahkat?" Biehtár vástidii sidjiide: "Jorgalehket, ja diktet buohkat iežadet gásttašuvvot Jesus Kristusa nammii, juohkehaš dis, vai oážžubehtet sudduid ándagassii addojumi ja Bassi Vuoiŋŋa attáldahkan. Dasgo lohpadus gullá didjiide ja din mánáide ja buohkaide geat leat guhkin eret, nu olusiidda go Hearrá Ipmileamet rávká." Ollu eará sániiguin ge son duodaštii sidjiide, ja rávvii sin: "Diktet iežadet bestojuvvot dán gázzáris sohkgottis." Sii geat vuostáiválde su sáni, gásttašuvvojedje, ja dan beaivvi lasihuvvojedje oskkolaččaid jovkui sullii golbma duhát olbmo. **Apd 2,37-41**

De mii ge boahit giitosiin ja oskkuin Hearrá lusa bassi gásttas. Mii leat riegádan suddolaš olmmožin, muhto gásttas mii šaddat Ipmila mánnán ja riegádit oddasis Bassi Vuoiŋŋa bokte.

## 4 Gástta geatnegasvuohta

*L* Čuožžilehkuset fáddarat.

### *Jogo A*

*L* Dii guđet lehpēt (**namma namuhuvvo**) risváhnemat, galgabehtet duodaštit ahte *son* lea gásttašuvvon Áhči ja Bártŋi ja Bassi Vuoiŋŋa nammii. Oktan dáinna searvegottiin ja oppa min girkuin oažžubehtet oasi bassi ovddasvástádusas: rohkadallat *su* ovddas, oahpahit *su* rohkadallat ja veahkehit *su* geavahit Ipmila sáni ja Hearrá bassi eahkedismállásiid, vai *son* bissu Kristusa luhtte, nugo *son* gásttas lea ovttahttojuvvon suinna.

### *Dahje B*

Okta risváhnemiin boahá ovdan ja lohka jitnosit, searvegoddái čalmmiid:

Mii leat dál (**namma namuhuvvo**) fáddarat ja duodaštit ahte *son* lea gásttašuvvon Áhči ja Bártŋi ja Bassi Vuoiŋŋa nammii. Oktan dáinna searvegottiin ja oppa min girkuin mii oažžut oasi bassi ovddasvástádusas: rohkadallat *su* ovddas, oahpahit *su* rohkadallat ja veahkehit *su* geavahit Ipmila sáni ja Hearrá bassi eahkedismállásiid, vai *son* bissu Kristusa luhtte, nugo *son* gásttas lea ovttahttojuvvon suinna.

**Risváhnemat čuožžot ain.**

## 5 Biehttaleapmi ja osku

**Gástaolmmoš čuožžila.**

*L* (**Namma namuhuvvo**), dáhtut go oktan dáinna searvegottiin dovddastit biehttaleami ja oskku masa don gásttašuvvot?

**Gástaolmmoš:** De dáhtun.

*L* Dovddastehkot biehttaleami ja oskku.

**Searvegoddi čuožžila.**

*Buo* Mun biehttan beargalagas

ja buot su daguin

ja buot su meanuin.

*Jogo*

Mun oskkun Ipmil Áhččái, buotveagalažžii,  
almmi ja eatnama sivdnideaddjái.

Mun oskkun Jesus Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoiŋgas,  
riegádii nieiddas Márjjás,  
givssiduvvui Pontius Pilatusa áiggi,  
russiinávlejuvvui, jámii ja hávdáduvvui,  
njejai jábmiid riikii,  
bajásčuožžilii jábmiid luhtte goalmmát beivvi,  
manai bajás albmái,  
čohkká Ipmila, buotveagalaš Áhči, olgeš gieda bealde,  
máhccá doppe dubmet elliid ja jábmiid.

Mun oskkun Bassi Vuigŋii,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

*Apoastallaš oskkudovddastus*

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,

guhte sahkanii Bassi Vuoiŋŋa bokte,  
riegádii nieida Marias,  
givssiduvvui Pontius Pilatusa vuolde,  
russiinávlejuvvui, jámii ja hávdáduvvui,  
vuolás manai jábmiid riikii,  
bajásčuožžilii jábmiid luhtte goalmmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieda bealde,  
galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.  
Amen.

**Apoastallaš oskkudovddastus**

**Buohkat čohkkedit.**

## **6 Gásta**

**Čáhci leikeyuvvo gástalihtái.**

**L gástalihti guoras**

Rohkadallot.

Herrá Jesus Kristus, don rávkkat min Ipmila riikii gástta bokte. Mii giitit du go gástta čáhci oktan du sániin lea árpmu ája, mas don ovttastahtát min duinna ja dagat min dan vuoitto oasálašžan man don vuitet jápmimiinnát ja bajásčuožžilemiinat. Dál mii boahit du sáni mielde ja rohkadallat, Herrá, ahte odđa riegádeapmi šattašii du sivdnideaddji Vuoiŋŋa bokte.

**Gástaolmmoš manná gástalihti lusa oktan risváhnemiiguin.**



*L* (Namma namuhuvvo), dáhtut go gásttašuvvot Áhči ja Bártni ja Bassi Vuoiŋŋa nammii?

*Gástaolmmoš:* De dáhtun.

*L* Ipmil várjalehkos du olggosmannama ja du sisamannama dálážiis ja agálaš áigái.

Mun merken du bassi ruossa mearkkain, † duođastussan ahte don gulat russiinávlejuvvon ja bajásčuožžilan Jesus Kristusii ja oskkut sutnje.

*Ruossa merkejuvvo gállus raddái, ja dasto oalggis oalgái.*

*L* Hearrámet Jesus Kristusa sáni ja gohččuma mielde mun gásttašan du Áhči ja Bártni ja Bassi Vuoiŋŋa nammii.

*Cealkkedettiin dán liturga goive gieđain čázi golmma geardde gástaolbmo oaivvi ala.*

*L* bidjá gieđa gástaolbmo oaivvi ala ja cealká:

Buotveagalaš Ipmil lea dál addán dutnje Bassi Vuoiŋŋas, dahkan du mánnánis ja váldán du oskkolaš searvegoddásis. Son nannešii du árpmuinis agálaš eallimii.

Ráfi lehkos duinna.

## **7 Máidnun ja rohkos**

*Go buohkat leat gásttašuvvon, de liturga cealká lohkanbulppis dahje eará sajis koaras:*

*L* Máidnojuvvon lehkos Ipmil, Hearrámet Jesus Kristusa Áhčči, guhte stuora váibmoládisvuođastis lea riegádahtán min ođđasis ja addán midjiide ealli doaivvu go bajásčuoččáldahtii Jesus Kristusa jábmiid luhtte! **1 Biet 1,3**

*L* Rohkadallot Hearrá rohkosa.

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,  
nugo mii ge ándagassii addit velggolaččaidasamet.  
Ale ge doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,  
nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,  
muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## 8 Sálbma

Go leat eahkedismállásat, de dát lea **Sálbma eahkedismállásiid ovdal**. Go eai leat eahkedismállásat, dahje go gásta doaimmahuvvo ipmilbálvalusa manjil, de dát lea

**Loahpahansálbma**.

# HEAHTEGÁSTA

1 Dát guhkit ortnet geavahuvvo jos lea dilli. Muđuid geavahuvvo **Heahtegástta oanehis ortnet**, geahča s. 147.

2 Heahtegásta gáibida ahte unnimusat okta vanhemiin miediha dasa. Váhnemat berrejit leat mielde. Gos lea vejolaš, de galget leat unnimustá guokte vihtana mielde, earret gásttašeadji. Váhnemat sáhttet leat vihtanat.

3 Vihtanat eai leat risváhnemat, muhto duodaštit gástta. Muđuid sis eai leat geatnegasvuodat. Váhnemat sáhttet maŋŋil mearridit geaid dáhttot máná risváhnemin.

4 Dohkkehuvvon gásta gáibida unnimusat ahte dát sánit čudjet: "Mun gásttašan du Áhči ja Bártni ja Bassi Vuoiŋŋa nammii."

5 Mánáid heahtegásttas ii leat dárbbalaš namuhit nama jos mánná ii leat ožžon nama.

6 Gástta maŋŋil berre leiket gástačázi heivvolaš báikái, omd. olggobeallái viessoseainni gurrii gos ii dulbmojuvvo.

7 Gásta dieđihuvvo suohkanbáhppii nu fargga go vejolaš.

## A Go mánát gásttašuvvojit

Go lea lunddolaš, de gásttašeapmi sáhtta álggahuvvot sálmmain.

Gásttašeadji cealká:

Áhči ja Bártni ja Bassi Vuoiŋŋa nammii.

Herrá Jesus Kristus, mii buktit dán máná du lusa iežat sáni mielde, ja rohkadallat ahte vuostáiválddášit su, vai son šattašii du mánnán ja livččii du hálldus. Amen.

(Namma namuhuvvo jos dat leat mearriduvvon). Mun merken du bassi ruossa mearkkain, † duodaštussan ahte don gulat russiinávlejuvvon ja bajásčuožžilan Jesus Kristusii ja oskkut sutnje.

Ruossa merkejuvvo gállus raddái, ja dasto oalggis oalgái.

Herrámet Jesus Kristusa sáni ja gohččuma mielde mun gásttašan du Áhči ja Bártni ja Bassi Vuoiŋŋa nammii.

Cealkkedettiin dán gásttašeddji goive čázi golmma geardde máná oaivvi ala.

Jos mánná lea veallamin heahtegeatus, de sáhtta dan sádjái njávkat suorbmagežiiguin

čáhcegoaikanasa golmma geardde máná oaivvi ala.

Gásttašeddji cealká giehta máná oaivvi alde:

Buotveagalaš Ipmil lea dál addán dutnje Bassi Vuoiŋŋas, dahkan du mánnánis ja váldán du oskkolaš searvegoddásis. Son nannešii du árpmuinis agálaš eallimii.

Ráfi lehkos duinna.

Gásttašeddji rohkadallá Herrá rohkosa, go lea vejolaš oktan máná vanhemiiguin:

*Jogo*

Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddá eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Go lea lunddolaš, de gásttašeapmi loahpahunvo sálmmain.*

## **B Go rávis olbmot gásttašuvvojit**

*Go lea lunddolaš, de gásttašeapmi álggahunvo sálmmain.*

*Gásttašeaddji cealká:*

Áhči ja Bárti ja Bassi Vuoiŋŋa nammii.

Herrá Jesus Kristus, mii buktit (*namma namuhuvvo*) du lusa iežat sáni mielde, ja rohkadallat ahte vuostáiválddášit su, vai son šattašii du mánnán ja livččii du hálddus. Amen.

*Gásttašeaddji cealká:*

(*Namma namuhuvvo*), dáhtut go gásttašuvvot Áhči ja Bárti ja Bassi Vuoiŋŋa nammii?

*Gástaolmmoš:* De dáhtun.

*Gásttašeaddji cealká:*

Mun merken du bassi ruossa mearkkain, † duođastussan ahte don gulat russiináivlejuvvon ja bajásčuožžilan Jesus Kristusii ja oskkut sutnje.

*Ruossa merkejuvvo gállus raddái, ja dasto oalggis oalgái.*

Herrámet Jesus Kristusa sáni ja gohččuma mielde mun gásttašan du Áhči ja Bárti ja Bassi Vuoiŋŋa nammii.

Cealkkedettiin dán gásttašeddji goive čázi golmma geardde gástaolbmo oaiivvi ala.

Gásttašeddji cealká giehta gástaolbmo oaiivvi alde:

Buotveagalaš Ipmil lea dál addán dutnje Bassi Vuoiŋgas, dahkan du mánnánis ja váldán du oskkolaš searvegoddásis. Son nannešii du árpmuinis agálaš eallimii. Ráfi lehkos duinna.

Gásttašeddji rohkadallá Hearná rohkosa oktan gástaolbmui, go lea vejolaš oktan earáiguin guđet leat das:

*Jogo*

Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalusii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maddái mii ándagassii addit min velggolaččaidasamet.

Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

Go lea lunddolaš, de gásttašeapmi loahpahunvvo sálmmain.

# RISTTAŠEAPMI

1 Risttašeapmi doaimmahuvvo allameassus dahje eará dábálaš ipmilbálvalusain.

2 Jos maddái lea gásta ipmilbálvalusas, de risttašeapmi doaimmahuvvo maŋŋil go buohkat leat gásttašuvvon (6. lađas **Gásta**). Doaibma doaimmahuvvo dalle 6. lađđasa rajes,

**Risttašeapmi.** Jos risttašeapmi doaimmahuvvo sierra gástaipmilbálvalusas, de dat čuovvu 14. lađđasa, **Gásta**, maŋŋil.

3 Mánná guddojuvvo girkui. Okta sáhtta mieđuštit su guhte guoddá máná.

4 Čuojahuvvo dahje lávlojuvvo go mánná guddojuvvo sisa.

5 **Gástasálbma**, 2. lađas, sáhtta lávlojuvvot ovdal 1. lađđasa, go mánná lea guddojuvvon sisa.

6 Go mánná risttašuvvo, de dušše máná ovdanamma namuhuvvo (gaskanama dahje goarggu haga), muhte olles namma namuhuvvo ipmilbálvalusa diedáhusain.

7 Go rávis olmmoš risttašuvvo, de son čohkkeda gástalihti lahka ovdal go risttašeapmi álggahuvvo. Go risttašuvvo, de geavahuvvo olles namma.



# A Go mánát risttašuvvojit

## 1 Álggaheapmi

*Jogo A*

*L lohkanbulppis dahje eará sajis koaras, searvegoddái čalmmiid*

Áhči ja Bártni ja Bassi Vuoiŋŋa nammii.

*Dahje B*

*L lohkanbulppis dahje eará sajis koaras, searvegoddái čalmmiid*

Árbmu lehkos dinguin ja ráfi Ipmilis, Áhčisteamet, ja Hearnás Jesus Kristusis.

*Dás välljejuvvo dat vejolašvuohta mii ii geavahuvvon go ipmilbálvalus álggahuvvui.*

*L Dát mánná (mánát) buktojuvvo (buktojuvvojit) odne searvegotti ovdii Ipmila viesus. Dat lea (leaba, leat) juo gásttašuvvon. Mii giitit Ipmila guhte gásttas lea addán sutnje (sudnuide, sidjiide) bestojumis ja váldán su (sudno, sin) kristtalaš girkosis. Váldot su (sudno, sin) vuostái ráhkisvuodas ja fátmastehkot su (sudno, sin) rohkosiiddámetguin.*

*Liturga sáhtta dasto doallat oanehis sártni, mii loahpahuvvo teavsttain Joh 3,16. Sáhtta*

*maiddá geavahit dušše dán čálasáni:*

*Jogo A*

*L Dasgo nu Ipmil lea ráhkistan máilmmi, ahte son attii áidnoriegádan Bártnis, vai dat geat oskot sutnje eai láhppo, muhto ožžot agálaš eallima. Joh 3,16*

*Dahje B*

*L Dát lea beaivi man Hearná lea dahkan; ávvudehkot ja illudehkot mii dán beaivvi.*

*Sál 118,24*

## 2 Gástasálbma

### 3 Gástagohččun

*L* Gullot Hearrámet Jesus Kristusa gohččuma bassi gástta birra:

Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja geahča, mun lean dinguin buot beivviid gitta máilmmi loahpa rádjái.

**Matt 28,18-20**

Gullot dasto man ustitlaččat Jesus váldá uhca mánáziid vuostái ja rabasta sidjiide Ipmila riikka:

Sii gudde uhca mánáziid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: "Diktet uhca mánáziid boahit mu lusa, allet ge hehte sin! Dasgo Ipmila riika gullá dakkáraččaide. Duođaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa. "Ja son válddii sin sallasis, bijai gieđaidis sin ala ja buressivdnidii sin. **Mark 10,13-16**

### 4 Gástta geatnegasvuohta

*L* Čuožžilehkoset váhnemat ja risváhnemat.

**Jogo A**

*L* Dii gudet odne lehpit dán máná (dáid mánáid) risváhnemat, galgabehtet duođástit ahte son (soai, sii) lea (leaba, leat) gásttašuvvon Áhči ja Bártni ja Bassi Vuoiŋŋa nammii. Oktan dáinna searvegottiin ja oppa min girkuin oažžubehtet dán bassi ovddasvástádusa: rohkadallat máná (mánáid) ovddas, oahpahit su (sudno, sin) rohkadallat ja veahkehit su (sudno, sin) geavahit Ipmila sáni ja Hearrá bassi eahkedismállásiid, vai son (soai, sii) bissu (bissuba, bissot) Kristusa luhte go bajásšaddá (bajásšaddaba, bajásšaddet), nugo son (soai, sii) gásttas lea (leaba, leat) ovttahttojuvvon suinna.

**Dahje B**

**Okta risváhnemiin boahit ovdan ja lohká jitnosit, searvegoddái čalmmiid:**

Mii leat odne dán máná (dáid mánáid) risváhnemat ja duođástit ahte son (soai, sii) lea (leaba, leat) gásttašuvvon Áhči ja Bártni ja Bassi Vuoiŋŋa nammii. Oktan dáinna searvegottiin ja oppa min girkuin mii oažžut oasi bassi ovddasvástádusas: rohkadallat máná (mánáid) ovddas, oahpahit su (sudno, sin) rohkadallat ja veahkehit su (sudno,

sin) geavahit Ipmila sáni ja Hearrá bassi eahkedismállásiid, vai son (soai, sii) bissu (bissuba, bissot) Kristusa luhtte go bajásšaddá (bajásšaddaba, bajásšaddet), nugo son (soai, sii) gásttas lea (leaba, leat) ovttastahttojuvvon suinna.

Váhnemat ja risváhnemat čužžot ain.

## 5 Biehttaleapmi ja osku

*L* Dovddastehkot biehttaleami ja oskku masa mii gásttašit mánáideamet.

Searvegoddi čuožžila.

*Buo* Mun biehttalan beargalagas

ja buot su daguin

ja buot su meanuin.

*Jogo*

Mun oskkun Ipmil Áhččái, buotveagalažžii,  
almmi ja eatnama sivdnideaddjái.

Mun oskkun Jesus Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoiñnas,  
riegádii nieiddas Márjjás,  
givssiduvvui Pontius Pilatusa áiggi,  
russiinávlejuvvui, jámii ja hávdáduvvui,  
njejai jábmiid riiki,  
bajásčuožžilii jábmiid luhtte goalmát beaivvi,  
manai bajás albmái,  
čohkká Ipmila, buotveagalaš Áhči, olgeš gieđa bealde,  
máhccá doppe dubmet elliid ja jábmiid.

Mun oskkun Bassi Vuigñii,  
bassi oktasaš girku,  
bassi olbmuid searvevuoda,

suttuid ándagassii addojumi,  
oačči bajásčuožžileami  
ja agálaš eallima.

Amen.

*Apoastallaš oskkudovddastus*

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,  
guhte sahkanii Bassi Vuoiŋŋa bokte,  
riegádii nieida Marias,  
givssiduvvui Pontius Pilatusa vuolde,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieda bealde,  
galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.  
Amen.

*Apoastallaš oskkudovddastus*

*Buohkat čohkkedit.*

## 6 Risttašepmi

Máná (jos ležžet eanebut, de okta hávil) buktojuvvo gástalihti lusa. Váhnemat ja fáddarat čuožžilit.

Go lea lunddolaš, de váhnemat ja fáddarat sáhttet mannat gástalihti lusa.

*L* Mii lea máná namma?

Son guhte guoddá máná, namuha máná ovdanama.

*L* Lea go (máná ovdanamma namuhuvvo) gásttašuvvon Áhči ja Bártni ja Bassi Vuoiŋŋa nammii?

Son guhte guoddá máná, vástida: De lea.

*L* Dáhttubehtet go (máná ovdanamma namuhuvvo) bajásgessojuvvot kristtalaš biehttaleamis ja oskkus?

Son guhte guoddá máná, vástida: De dáhttut.

*L* bidjá gieda máná oaivvi ala ja cealká:

Buotveagalaš Ipmil lea gásttas addán dutnje Bassi Vuoiŋŋas, dahkan du mánnánis ja váldán du oskkolaš searvegoddásis. Son nannešii du árpmuinis agálaš eallimii.

Ráfi lehkos duinna.

## 7 Máidnun ja rohkos

Go buohkat leat risttašuvvon, de liturga cealká lohkanbulppis dahje eará sajis koaras:

*L* Máidnojuvvon lehkos Ipmil, Hearrámet Jesus Kristusa Áhčči, guhte stuorra váibmoládisvuodastis lea riegádahttán min odđasis ja addán midjiide ealli doaivvu go bajásčuoččáldahtii Jesus Kristusa jábmiid luhtte! **1 Biet 1,3**

*L* Rohkadallot Hearrá rohkosa.

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,  
mo almmis nu maiddái eatnama alde.  
Atte midjiide odne min beaivválaš láibbi.  
Atte midjiide min sudduid ándagassii,  
nugo mii ge ándagassii addit velggolaččaidasamet.  
Ale ge doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

### *Dahje*

*Buo* Áhčči min, don guhte leat almmis!  
Basuhuvvos du namma.  
Bohtos du riika.  
Šaddos du dáhttu  
mo almmis nu maiddái eatnama alde.  
Atte midjiide odne min beaivválaš láibámet.  
Ja atte midjiide min sudduideamet ándagassii,  
nugo maiddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

**Go risttašepmi lea dalán ipmilbálvalusa manjil, de liturga sáhtta rohkadallat čuovvovaš kollektarohkosa "Gudni lehkos Ipmilii" manjil:**

*L* Giitot ja rohkadallot.

Herrá Ipmil, almmálaš Áhčči, don leat lohpidan midjiide ahte áiggut leat min Ipmil ja min mánáid Ipmil ja čájehit árkkálmastinvuođat sogas sohkkii. Mii giitit du go don válddát min vuostái bassi gásttas mánnán juo, ja das attát midjiide sudduid ándagassii addojumi, eallima ja ávdugasvuođa. Mii rohkadallat: veahket min soahtat buori soadi,

ollašuhttit min mátkki ja doallat gitta oskkus, ja doalvvo min agálaš eallimii, Bátrnát, Jesus Kristusa, Hearrámet, bokte.

*L* Rohkadallot Hearrá rohkosa:

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Gásttašeapmi loahpahunvo ná:*

## 8 Sálbma

### B Go rávis olbmot risttašuvvojit

#### 1 Álggaheapmi

*Jogo A*

*L lohkanbulppis dahje eará sajis koaras, searvegoddái čalmmiid*

Áhči ja Bárti ja Bassi Vuoiŋŋa nammii.

*Dahje B*

*L lohkanbulppis dahje eará sajis koaras, searvegoddái čalmmiid*

Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

*Dás välljejuvvo dat vejolašvuohta mii ii geavahuvvon go ipmilbálvalus álggahuvvui.*

L Dát min oskkuguoibmi buktojuvvo odne searvegotti ovdii Ipmila viesus. Son lea juo gásttašuvvon. Mii giitit Ipmila guhte gásttas lea addán sutnje bestojumis ja váldán su kristtalaš girkosis. Váldot su vuostái ráhkisvuođas ja fátmastehkot su rohkosiiddámetguin.

*Liturga sáhtta dasto doallat oanehis sártni, mii loahpahuvvo Joh 3,16:in. Sáhtta maiddái*

*geavahit dušše dán čálasáni:*

*Jogo A*

*L Dasgo nu Ipmil lea ráhkistan máilmmi, ahte son attii áidnoriegádan Bártis, vai dat geat oskot sutnje eai láhppo, muhto ožžot agálaš eallima.*

*Joh 3,16*

*Dahje B*

*L Dát lea beaivi man Hearrá lea dahkan; ávvudehкот ja illudehкот mii dán beaivvi.*

*Sál 118,24*



## 2 Gástasálbma

### 3 Gástagohččun

L Gullot Hearrámet Jesus Kristusa gohččuma bassi gástta birra:

Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja geahča, mun lean dinguin buot beivviid gitta máilmmi loahpa rádjái. **Matt 28,18-20**

Go Biehtár lei sárdnon olbmuide hellodatbeivvi, de sii jerre sus ja eará apoastaliin:

"Vieljat, maid mii galgat dahkat?" Biehtár vástidii sidjiide: "Jorgalehket, ja diktet buohkat iežadet gásttašuvvot Jesus Kristusa nammii, juohkehaš dis, vai oažžubehtet sudduid ándagassii addojumi ja Bassi Vuoiŋŋa attáldahkan. Dasgo lohpadus gullá didjiide ja din mánáide ja buohkaide geat leat guhkin eret, nu olusiidda go Hearrá Ipmileamet rávká." Ollu eará sániiguin ge son duodaštii sidjiide, ja rávvii sin: "Diktet iežadet bestojuvvot dán gázzáris sohkašottis." Sii geat vuostáiválde su sáni, gásttašuvvojedje, ja dan beivvi lasihuvvojedje oskkolaččaid jovkui sullii golbma duhát olbmo. **Apd 2,37-41**

### 4 Gástta geatnegasvuohta

L Čuožžilehkuset risváhnemat.

**Jogo A**

L Dii gudet lehpēt (**namma namuhuvvo**) risváhnemat, galgabehtet duodaštēt ahte *son* (soai, sii) lea (leaba, leat) gásttašuvvon Áhči ja Bártni ja Bassi Vuoiŋŋa nammii. Oktan dáinna searvegottiin ja oppa min girkuin oažžubehtet oasi bassi ovddasvástádusas: rohkadallat *su* (sudno, sin) ovddas, oahpahit *su* (sudno, sin) rohkadallat ja veahkehit *su* (sudno, sin) geavahit Ipmila sáni ja Hearrá bassi eahkedismállásiid, vai *son* (soai, sii) bissu (bissuba, bissot) Kristusa luhtte, nugo *son* (soai, sii) gásttas lea (leaba, leat) ovttahttojuvvon suinna.

**Dahje B**

**Okta risváhnemiin boahdá ovdan ja lohka jitnosit, searvegoddái čalmmiid:**

Mii leat odne (**namma namuhuvvo**) risváhnemat ja duodaštēt ahte *son* (soai, sii) lea (leaba, leat) gásttašuvvon Áhči ja Bártni ja Bassi Vuoiŋŋa nammii. Oktan dáinna searvegottiin ja oppa min girkuin mii oažžut oasi bassi ovddasvástádusas: rohkadallat

*su* (sudno, sin) ovddas, oahpahit *su* (sudno, sin) rohkadallat ja veahkehit *su* (sudno, sin) geavahit Ipmila sáni ja Hearrá bassi eahkedismállásiid, vai *son* (soai, sii) bissu (bissuba, bissot) Kristusa luhtte, nugo *son* (soai, sii) gásttas lea (leaba, leat) ovttahttojuvvon suinna.

Risváhnemat čuožžot ain.

## 5 Biehttaleapmi ja osku

*L* (Namma namuhuvvo) , dáhtut go oktan dáinna searvegottiin dovddastit biehttaleami ja oskku?

*Son guhte lea gásttašuvvon:* De dáhtun.

*L* Dovddastehkot biehttaleami ja oskku masa mii gásttašuvvot.

*Searvegoddi čuožžila.*

*Buo* Mun biehttalan beargalagas

ja buot su daguin

ja buot su meanuin.

*Jogo*

Mun oskkun Ipmil Áhččái, buotveagalažžii,  
almmi ja eatnama sivdnideaddjái.

Mun oskkun Jesus Kristusii,

Ipmila áidnoriegádan Bárdnái, min Hearrái,

guhte sahkanii Bassi Vuoiñas,

riegádii nieiddas Márjjás,

givssiduvvui Pontius Pilatusa áiggi,

russiinávlejuvvui, jámii ja hávdáduvvui,

njiejai jábmiid riikii,

bajásčuožžilii jábmiid luhtte goalmát beaivvi,

manai bajás albmái,

čohkká Ipmila, buotveagalaš Áhči, olgeš gieda bealde,

máhccá doppe dubmet elliid ja jábmiid.

Mun oskkun Bassi Vuigŋii,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.

Amen.

*Apoastallaš oskkudovddastus*

*Dahje*

*Buo* Mun oskkun Ipmil Áhči ala, buotveagalačča,  
almmi ja eatnama sivdnideaddji.

Mun oskkun Jesus Kristusa ala,  
Ipmila áidnoriegádan Bártni, min Hearrá,  
guhte sahkanii Bassi Vuoiŋŋa bokte,  
riegádii nieida Marias,  
givssiduvvui Pontius Pilatusa vuolde,  
russiinávljuvvui, jámii ja hávdáduvvui,  
vuolás manai jábmiid riikii,  
bajásčuožžilii jábmiid luhtte goalmát beaivvi,  
bajás manai albmái,  
čohkká Ipmila, dan buotveagalaš Áhči, olgeš gieda bealde,  
galgá doppe fasttain boahit dubmet elliid ja jábmiid.

Mun oskkun Bassi Vuoiŋŋa ala,  
bassi oktasaš girku,  
bassi olbmuid searvevuoda,  
suttuid ándagassii addojumi,  
oačči bajásčuožžileami  
ja agálaš eallima.  
Amen.

Apoastallaš oskkudovddastus

Buohkat čohkkedit.

## 6 Risttašeapmi

Dat guhte lea gásttašuvvon (jos ležžet eanebut, de okta hávil), manná gástalihti lusa. Go lea lunddolaš, de vánhemat ja ristvánhemat sáhttet mannat gástalihti lusa.

*L* (Namma namuhuvvo), leat go gásttašuvvon Áhči ja Bártni ja Bassi Vuoiŋŋa nammii?

Dat guhte lea gásttašuvvon, vástida: De lean.

*L* bidjá gieđa su oaivvi ala ja cealká:

Buotveagalaš Ipmil lea gásttas addán dutnje Bassi Vuoiŋŋas, dahkan du mánnánis ja váldán du oskkolaš searvegoddásis. Son nannešii du árpmuinis agálaš eallimii.

Ráfi lehkos duinna.

## 7 Máidnun ja rohkos

Go buohkat leat risttašuvvon, de liturga cealká lohkanbulppis dahje eará sajis koaras:

*L* Máidnojuvvon lehkos Ipmil, Hearrámet Jesus Kristusa Áhčči, guhte stuorra váibmoládisvuodastis lea riegádahttán min ođđasis ealli doivui Jesus Kristusa bajásčuožžileami bokte jábmiid luhtte! **1 Bieht 1,3**

*L* Rohkadallot Hearrá rohkosa.

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,  
nugo mii ge ándagassii addit velggolaččaidasamet.  
Ale ge doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,  
nugo maddái mii ándagassii addit min velggolaččaidasamet.

Ja ale doalvvo min geahččalusa sisa,  
muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

# OVTTASKASAIÐ RIHPADOVDDASTUS

1 Ovdal rihppadovddastusa lea dábálaččat sielumorašteaddji sártnodeapmi, gos áinnas sáhtá čatnat dan rihppadovddastussii katekismusa mielde.

2 Suttudovddastusas ja suttuid ándagassii addimis sáhtá rihppadovddasteaddji čippostit.

## 1 Álggaheapmi

*B* Áhči ja Bártni ja Bassi Vuoiŋŋa nammii.

Rohkadallu ovttas.

Hearrá, don suokkardat mu ja dovddat mu.

Čohkkáŋan ba dahje čuččoŋan, de don dieđát dan,  
don árvidat mu jurdagiid guhkkín juo.

Váceŋan ba dahje vealláŋan, de don oainnát dan,  
don dovddat buot mu geainnuid.

Hearrá, ovdal go mus lea sátni njuokčama alde,  
de don dieđát dan ollásit.

Suokkar mu, Ipmil, ja dovdda mu váimmu,  
geahččal mu ja dovdda mu jurdagiid.

Geahča, lean go mun bahávuođa geainnu alde,  
ja láide mu agálašvuođa geainnu mielde.

## 2 Suttudovddastus

*B* Dovddas dal suttuidat Ipmilii.

Suttudovddasteaddji sáhtta geavahit ovttá dáin suttudovddastusain:

1 Mun dovddastan ... jnv.

Suttudovddasteaddji dovddasta iežas sániiguin.

2 Hearrá, bassi Ipmil. Du sátni cealká ahte mun lea suttolaš, guhte lean láhppon du árpmu haga. Dávjá mun in olat in ge árvit du duohtavuoda. Hearrá, atte munnje dáhtu ja roahkkatvuoda, vai duostašin diktit du sáni čájehit gii mun duodaid lean.

Don leat sivdnidan mu, ja mus lea ovddasvástádus dutnje oppa mu eallimiin. Du dáhttu stivrešii mu jurdagiid ja vádjolusa, muhto mu iežan sávaldagat dávjá hoigadit eret du dáhtu.

Don leat cealkán ahte mun galgган ráhkistit lagamuččaidan, muhto fuollameahttunvuolta, galmmasvuolta ja moaitámuš báidná dávjá mu eallima.

Don gáibidat mus duohtavuoda ja vuoiggalašvuoda, muhto mun báhtaran logu dahkamis. Almmatge diedán ahte dušše dalle go mu eallin rabastuvvo dutnje, de sáhtán vuostáiváldit du bestojumi.

Hearrá, váldde mus eret vearri oadjebasvuoda. Atte munnje mu suttuid ándagassii Jesus Kristusa dihtii. Atte munnje bassi ráfehivuoda mii álo jodiha mu du lusa, vai mun beasašin eallit duohta oadjebasvuodas ja dorvvus.

3 Bassi Ipmil, váibmoládis Áhčči. Mun váivván, suttolaš olmmoš dovddastan dutnje, vanhurskkis Ipmil, ahte lean mángga láhkái rihkkon du vuostái.

In leat ráhkistan du eanet go buot, in ge lagamužžan nugo iežan. Mun lean suddudan du ja du bassi báhkomiid vuostái jurdagiiguin, sániiguin ja daguiguin. Jos don dubmešit mu mu daguid mielde, de mun ánsšášivččen ahte don hilggut mu.

Muhto, ráhkis almmálaš Áhčči, don leat árpmustat lohpidan vuostáiváldit juohkehačča guhte jorgala dutnje, ja dorvvastettiin Beastámet Jesus Kristusa ánsšášepmái báhtara du stuorra árkkálmastinvuhtii.

Don attát sidjiide buot sin rihkkumiid ándagassii, it ge goassege logahala sidjiide sin suttuid. Dása mun dorvvastan ja rohkadalan buot suttuidan ándagassii addojumi ovddas, Jesus Kristusa dihtii.

4 Ráhkis Hearrá Ipmil. Mun lean mángga gearddi rihkkon du vuostái jurdagii-, sánii- ja daguiguin ja lean bealuštusa haga. Muhto mun oskkun du áidnoriegádan Bárdnái, Jesus Kristusii, guhte lea gillán jápmima beastin dihtii mu, ja rohkadalan su dihtii: Atte ándagassii, atte munnje buot mu sudduid ándagassii.

Atte munnje Bassi Vuoiŋŋat, vai mun oskkošin sudduidan ándagassii addojumi sáni ja divttášin du bassi ja buori dáhtu ráđđet eallimisttán. Hearrá, árpmit mu.

### 3 Sátne čatnan- ja čoavdinfámu birra

*B* Ipmil árpmihellos du ja nannejellos du oskku.

Bajásčuožžilan Hearrá cealká máhttájeddjiidasas:

Vuostáiváldet Bassi Vuoiŋŋa. Geaidda dii addibehtet sin sudduid ándagassii, de sidjiide leat dat ándagassii addojuvvon. Geaidda dii čatnabehtet sin sudduid, de dat leat čadnojuvvon.

*Joh 20,22-23*

### 4 Sudduid ándagassii cealkin ABSOLUŠUVDNA

*Báhppa bidjá gieđas rihppadovddasteaddji oaivvi ala.*

*B* Hearrámet Jesus Kristusa sáni ja gohččuma mielde cealkkán mun dutnje buot du sudduid ándagassii addojumi, Áhči ja Bártne ja Bassi Vuoiŋŋa nammii.

Son guhte álggahii buori dagu du siste, ollašuttášii dan gitta Jesus Kristusa beaivvi rádjái. *Fil 1,6*

Ráfi lehkos duinna.

### 5 Loahpaheapmi

*Dasto báhppa ja rihppadovddasteaddji sáhttiba rohkadallat dán rohkosa ovttas (dahje vurrolagaid):*

I Mu siellu, máinno Hearrá,

II buot mii lea mu siste, máinno su bassi nama!

I Mu siellu, máinno Hearrá,



II ale vajáldahte su buorredaguid!

I Son addá ándagassii buot du sudduid

II ja dálkkasta buot du vigiid.

I Son lonista du heakka hávddis

II ja kruvnnida du árbmugasvuodain ja váibmoládisvuodain.

I Váibmoládis ja árbmugas lea Hearrá,

II son lea guhkesmielalaš ja su árbmugasvuohta lea stuoris.

I Ii son guoddal min agibeivái

II iige ane moari agálaččat.

I Ii son daga midjiide min sudduid mielde,

II iige mávssat midjiide min vearddaguid mielde.

I Nu allat go albmi lea eatnama bajábealde,

II nu stuoris lea Hearrá árbmu sidjiide geat ballet sus.

I Nu guhkkín go nuorti lea oarjjis

II nu guhkkín son doalaha min sudduid mis eret.

*Sál 103,1-4.8-12*

*Dákko sáhttiba rohkadallat Hearrá rohkosa ovttas.*

*Jogo*

Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,  
nugo mii ge ándagassii addit velggolaččaidasamet.  
Ale ge doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

*Dahje*

Áhčči min, don guhte leat almmis!  
Basuhuvvos du namma.  
Bohtos du riika.  
Šaddos du dáhttu  
mo almmis nu maddái eatnama alde.  
Atte midjiide odne min beaivválaš láibámet.  
Ja atte midjiide min suttuideamet ándagassii,  
nugo maddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

# VIHAHAN

## JA OVDDASROHKOS BOARGÁRLAŠ NÁITALAN NÁITTUSDILI OVDDAS

### ortnegat

ja dasa gullelaš *Dábálaš mearrádušat* leat mearriduvvon 2003 Girkočoahkkimis  
ruvnaprinsaregentta resolušuvnna vuodul golggotmánu 26. beaivvi 1990.

Liturgiiat doaibmagohtet miessemánu 1. beaivvi 2004 rájes.

Dat doaibmagohtet dálá *Norgga girku Ipmilbálvalusgirji* vástideaddji ortnegiid sajis.

# VIHAHEAPMI

## Dábálaš mearrádusat

- 1 Náittusdilli nissona ja olmmáiolbmo gaskkas álggahuvvo go soai almmolaččat, vihtaniid ovddas ja dohkkehuvvon (boargárlaš dahje girkolaš) eiseválddi ovddas lohpidieaba goabbat guoibmáseaskka náittusdilis ovttas eallit, ja go dat gulahuvvo almmolaš lágalašvuohtan.
- 2 Girku ortnega mielde lea náittusdilis sihke juridihkalaš ja girkolaš bealli. Dat mii servodagas adnojuvvo lágalaš náittusdiliásaheapmin, doaimmahuvvo Ipmila muođuid ovddas, ja lea danin girkolaš doaimmaheapmi mas lea ipmilbálvalusvuohki. Musihkka, jitnositlohkamat ja eará oasit fertejit hábmejuvvot dan mielde.
- 3 Vihaheapmi čađahuvvo girkus dahje eará ipmilbálvalussajis mii bismma mearrádusa bokte dohkkehuvvo vihahansadjin.
- 4 Son gii galgá vihahit – dahje eará gii su ovddasta – galgá ságastallat náittusbárain ovdal vihaheami.
- 5 Sálmmat ja lávlagat galget dohkkehuvvot dan báhpas gii galgá vihahit, ja musihkka fas dohkkehuvvot kantoras / organisttas.
- 6 Vihaheapmi berre ovddalgihtii almmuhuvvot ipmilbálvalusas, ja náittusbárri namuhuvvot ovddasrohkosis.
- 7 Jus áigu **Náittusmeassu** ávvudit, de čuovvu juogo **Vihahan** ortnega gitta maŋemus sálmma lohppii. Dat šaddá sálbman ovdal rihpaid, ja dan maŋgil čuovvu allameassu rihppaortnet dahje okta dain eará vejolaš rihppaortnegiin Ipmilbálvalusgirjjis. Dahje sáhtá čuovvut **Allameassu** ortnega. Dalle geavahuvvojit Vihahanortnega Álggahansánit dan sajis go Allameassu.

**Náitaleapmi ja Suorbmasiid addin** lađđasat bohtet dieđáhusaid sajis, ja vihahanortnega lađas **Ovddasrohkos** bohtá allameassu vejolaš ovddasrohkosa sadjai.

Okta lohkosiin galgá evangeliumlogus.

Náittusmeassu ávvudeapmi dieđihuvvo Álggahansániin, ovdamearkkadihte ná:

**L** Ráhkis ([namma namuhuvvo](#)) ja ([namma namuhuvvo](#)). Doai leahppi bohtán deike ([girku namuhuvvo](#)) vihahuvvot. Mii leat čoahkkanan dása dudnuin illudit. Mii áigut gullat dudno lohpadusaid goabbat guoibmáseatte ja rohkadallat Ipmila buressivdnádusa dudno ja ruovttude badjelii. Doai leahppi maddái bivdán oažžut Hearrá eahkedismállásiid go dál álggaheahppi eallima ovttas náitalan olmmožin. Mii ávvudit danin dán doaimmaheami náittusmeassun, vai sii geat hálidit, ožžot vejolašvuoda dudnuin fárrolaga mannat Hearrá beavdái dán beivvi.

8 Náittusbárat geat leat boargárlaččat náitalan, sáhttet maŋŋil bivdit ovddasrohkosa girkus.

Geahča ortnega **Ovddasrohkos boargálaš náitalan náittusdili ovddas.**

9 Ovdal ja maŋŋil vihaheami sáhtta čuojahit bielluid sullii 5 minuvtta.

10 Liturgas lea vilges stola.

## VIHAHAN ORTNET

Vihahandilálašvuodas lea vejolaš čahkkehit saji iešguđetlágan oassálastimiidda. Muhtomat mielčuovvuin sáhttet searvat liturgalaš osiide čuojahit juogo lassi musihka dahje lohkat jítnosit ja / dahje cahkkehit gintala čuovgaglobas. Kultuvraosiin sáhtta maiddái náittusbára etnalaš duogáš deattuhuvvot.

Go nuppi beallelačas lea eará girkolaš gullevašvuolta go Norgga girkui, de sáhtta bismma dohkkeheami vuodul diktít su girkoservodaga searvat oassálastit. Sihke eará girkoservodagaid searvan ja kultuvrralaš oasit galget heivehuvvot vihahandoaimma ipmilbálvalusvuohkái ja eaige rihkkut Norgga girku oskovuodu.

Oasit mat lasihuvvojít liturgiijai, sáhttet biddjot maŋábeallái 9. lađđasa **Ovddasrohkos**.

Dakko gokko namma namuhuvvo, sáhtta atnit olles nama dahje ovdanama, dađimielde go lea lunddolaš. Gažaldagain 7. lađđasis **Náitaleapmi** galgá adnot olles namma.

### 1 Preludia / Sisaboahhtin

Orgel dahje eará heivvolaš musihka čuojahuvvo preludian / sisaboahhtimis. Náittusbárra sáhtta boahhtit fárrolaga korrii ja čohkkedit sadjásis.

Jus hálidit, de sáhttet náittusbárra; juogo nubbi dahje goappešagat, vihtanat, bearrašiid ovddasteaddji(t), liturga ja eará mielvázzit boahhtit girku sisa ráidun.

Dan maŋŋil lea vejolaš lávlut dahje čuojahit heivvolaš lávlaga dahje instrumentamusihka.

### 2 Álggahansánit

*Jogo A*

L Áhči ja Bártni ja Bassi Vuoiŋŋa nammii.

*Dahje B*

L Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

Dan maŋŋil sávvojuvvo náittusbárrii ja álbmogii bures boahdin dáiguin dahje sullasaš sániiguin:

L Ráhkis (*namma namuhuvvo*) ja (*namma namuhuvvo*). Doai leahppi boahán (*girku namma namuhuvvo*) vihahuvvot. Mii leat čoahkkanan dása illudit dudnuin. Mii áigut gullat dudno lohpadusaid goabbat guoibmáseatte ja rohkadallat Ipmila buressivdnádusa dudno ja ruovttude badjelii.

Dan maŋŋil sáhtta liturga cealkit:

*Jogo A:*

L Man divrras lea du árbmugasvuohta, Ipmil!

Olbmot ohcet suoji du soajáid suoivanis.

Sii gallehuvvojit du viesu buoremus borramušain,  
don attát sidjiide juhkat iluidat jogažis.

Dasgo du luhtte lea eallima ája,

du čuovgasis mii oaidnit čuovgasa.

Sál 36, 8-10

*Dahje B*

L Rámidehket Hearrá, dasgo son lea buorre, su árbmugasvuohta bistá agálaččat.

Dát lea dat beaivi man Hearrá lea dahkan, ávvudehкот ja illudehкот!

Sál 118, 1,24

*Dahje C*

L Ipmil lea ráhkisvuohta, ja dat guhte bissu ráhkisvuođas, bissu Ipmilis, ja Ipmil bissu su siste.

1 Joh 4, 16b

### 3 Sálbma

## 4 Čálalohkan

L Ipmil lea sivdnidan min eallit searvevuodas iežainis ja guhtet guimmiideametguin. Son lea ásahan olbmá ja nissona šaddat oktan ja nannen dan searvevuoda buressivdnádusainis.

Náittusdilli lea Ipmila buorre attáldat. Eallit ovttas olmmájin ja nissonin lea eallit luohttámušas ja ráhkisvuodas, juogadit iluid ja morrašiid ja eallenagi orrut bissovažžan goabbat guoimmiska luhtte.

Ipmila sátni duodašta ahte náittusdilli lea bassi ja vealtameahtun.

Vuosttaš Movssesgirjjis čuožžu čállojuvvon:

Ipmil sivdnidii olbmo iežas govvan, Ipmila govvan son sivdnidii su, olmmájin ja nissonin son sivdnidii sudno. Ipmil buressivdnidii sudno ja celkkii sudnuide: ”Leahkki šattolaččat ja lassáneahkki, deavdi eatnama ja dahkki dan iežade vuolibužžan!”

1. Mos 1, 27-28a

Ja min HERRÁMET Jesus Kristus cealká:

Ehpet go leat lohkan ahte Sivdnideaddji álggus sivdnidii sudno olmmájin ja nisun ja celkkii: ”Dan dihtii olmmái guođđá áhčis ja eatnis ja bissu áhkás luhtte, ja dat guovttis šaddaba oktan oážžin.” De eaba leat šat guovttis; sudno eallin lea okta. Dan maid Ipmil nappo lea ovttastahtán, dan olmmoš ii galgga earuhit. **Matt 19, 4-6**

L Gullot viidáseappot Ipmila sánis:

2 - 4 dain čuovvovaš teavsttain (geahča 192-201 siidduin) dahje eará heivvolaš čálalohkamiin, unnimus okta goappáge testamenttas.

Čálabihtáid sáhttet muhtimat mielčuovvuin lohkat.

Sii geat lohket, mannet fárrolaga lohkanstullui.

Náittusbárta ja searvegoddi čohkkájit lohkanbotta.

Manemus lohkamuš loahpahuvo sániiguin:

”Nu čuodjá HERRÁ sátni.”



Dákko sáhtta čuovvut

## 5 Sálbma

Sálmma sajis sáhtta lávlut dahje čuojahit heivvolaš lávlaga dahje instrumentamusihka.

## 6 Sárdni

Liturga sárdnida čálabihtáid vuodul mat leat lohkkuojuvvon 4. laddasis dahje eará heivvolaš teavstta vuodul.

## 7 Náitaleapmi

L Boahhti dál Hearrá áltára ovdii, vai sáhttit gullat dudno lohpadusaid goabbat guoibmáseatte ja rohkadallat Ipmila buressivdnádusa dudno ja ruovttude badjelii.

*Jogo A*

L Ipmila, min Sivdnideaddji muođuid ovddas ja daid vihtaniid lahka jearan mun dus, (irggi olles namma virgenamahusa haga): Áiggut go don váldit (moarsi olles namma virgenamahusa haga), guhte čuožžu dás du bálldas, alccesat áhkkán?

Irgi: Áiggun.

L Áiggut go ráhkistit ja gudnejahttit su ja orrut bissovažžan su luhtte buriid ja baháid beivviid dassáži go jápmin dudno earuha?

Irgi: Áiggun.

L Seammaládje jearan mun dus, (moarsi olles namma virgenamahusa haga): Áiggut go don váldit (irggi olles namma virgenamahusa haga), guhte čuožžu dás du bálldas, alccesat boadnján?

Moarsi: Áiggun.

L Áiggut go ráhkistit ja gudnejahttit su ja orrut bissovažžan su luhtte buriid ja baháid beivviid dassáži go jápmin dudno earuha?

Moarsi: Áiggun.

L De addi goabbat guoibmáseatte gieđa dan badjelii.

Náittusbárra jorgala goabbat guoibmáseaskka čalmmát ja addiba goabbat guoibmáseaskka olgeš gieda. Liturga bidjá giedas náittusbára giedaid ala.

*L* Ipmila muođuid ovddas ja daid vihtaniid lahka leahppi doai dál lohpidan ovttas eallit náittusdilis, ja addán goabbat guoibmáseatte gieda dan badjeli. Danin gulahan dudno dál leat rievttis náitalan olmmožin.

*Dahje B*

*L* Ipmila, min Sivdnideaddji muođuid ovddas ja daid vihtaniid lahka jearan mun dus, (irggi olles namma virgenamahusa haga): Áiggut go don váldit (moarsi olles namma virgenamahusa haga), guhte čuožžu dás du bálldas, alccesat áhkkán?

*Irgi:* Áiggun.

*L* Seammaládje jearan mun dus, (moarsi olles namma virgenamahusa haga): Áiggut go (irggi olles namma virgenamahusa haga), guhte čuožžu dás du bálldas, alccesat boadnján?

*Moarsi:* Áiggun.

*L* Gearddut mu mañis.

*Irgi* ja *moarsi* jorgaleaba goabbat guoibmáseaskka čalmmát. Addiba goabbat guoibmáseaskka giedaid ja čuožžuba nu dan botta go addiba lohpadusa. Liturga lohká lohpadusa lađđasa lađđasa mielde, ja dan mañjil geardduha náittusbárra dan, nubbi álggos.

*L* Mun válddán du (namma namuhuvvo) alccesan áhkkán / boadnján.

*I/M* Mun válddán du (namma namuhuvvo) alccesan áhkkán /boadnján.

*L* Mun áiggun du ráhkistit ja gudnejahttit.

*I/M* Mun áiggun du ráhkistit ja gudnejahttit.

*L* ja orrut bissovažžan du luhtte sihke buriid ja baháid beivviid

*I/M* ja orrut bissovažžan du luhtte sihke buriid ja baháid beivviid

*L* dassázii go jápmin munno earuha.

*I/M* dassázii go jápmin munno earuha.

Dasto geardduha moarsi lohpadusa seammaládje go irgi.

Liturga bidjá gieđas náittusbára gieđaid ala.

*L* Ipmila muođuid ovddas ja dáid vihtaniid lahka leahppi doai dál lohpidan goabbat guoibmáseatte eallit ovttas náittusdilis, ja addán goabbat guoibmáseatte gieđa dan badjelii. Danin gulahan mun dudno leat rievttis náitalan olmmožin.

Dákko sáhtta čuovvut

## 8 Suorbmasiid addin

*Jogo A*

*L* Addi dál suorbmasiid goabbat guoibmáseatte, maid galgabeahhti atnit oskkáldasvuoda lohpadusa mearkan.

Soai bidjaba goabbáge suorbmasa nuppi surbmii.

*Dahje B*

*L* Addi dál suorbmasiid goabbat guoibmáseatte, maid galgabeahhti atnit mearkan dan lohpadussii maid leahppi goabbat guoibmáseatte addán.

Gearddut mu maŋjis.

Liturga lohka sániid lađđasiid mielde, dan maŋgil lohka náittusbárra daid, nubbi álggos.

*L* (Namma), mun attán dutnje dán suorbmasa

*I/M* (Namma), mun attán dutnje dán suorbmasa

*L* mearkan iežan ráhkisvuoda ja oskkáldasvuoda lohpadussii.

*I/M* mearkan iežan ráhkisvuoda ja oskkáldasvuoda lohpadussii.

Suorpmas biddjo nuppi surbmii.

Dan maŋgil geardduha boadnjá / áhkká suorpmasaddima seammaládje.

## 9 Ovddasrohkos

*L* Rohkadallot mii buohkat.

Náittusbárri čippusta áltárii.

Liturga bidjá gieđa náittusbára ala ja rohkadallá sudno ovddas ovttá dáin čuovvovaš rohkosiin, mii loahpahuvo Hearrá rohkosiin.

Eará mielčuovvut sáhttet maiddái ovddasrohkosa vuolde bidjat gieđa sudno oaivvi ala.

*I*

*Jogo A*

*L* Buorre Ipmil, don gii leat náittusdili ásahan ja buressivdnidan olbmá ja nissona, mii rohkadallat du: Divttášit iežat buressivdnádusa bissut (**namma namuhuvvo**) ja (**namma namuhuvvo**) badjelis geat čippusteaba dás du muođuid ovddas. Deavddášit sudno ráhkisvuodainat, ja huksešit sudno ruovttu ráfiin. Geahčašit sudnuide árpmolašvuodain, ja nannešit sudno Vuoiŋŋainat, vai soai buriid ja baháid beivviid dorvvastivččiiga dutnje, bisošigga oskkáldasat ovttas ja veahkehivččiiga goabbat guoimmiska ovddos agálaš eallima guvlui.

*Dahje B*

*L* Buorre Ipmil, mii giitit du (**namma namuhuvvo**) ja (**namma namuhuvvo**) ovddas ja sudno ráhkisvuoda goabbat guoibmáseaskka. Buressivdnidivččet sudno náittusdili eallima.

Veahkehivččet sudno doallat daid lohpadusaid maid leaba goabbat guoibmáseaskka addán, vai sudno náittusdilli devdojuvvošii luohttámušain, fuolain ja iluin.

Attášit sudnuide návccaid ja dáhtu hukset iežaska ruovttu ráfiin, vai dat šattašii báikin gos (mánát sáhttet oadjebasvuodas bajáššaddat ja) bearaš ja ustibat sáhttet gávdat searvevuoda.

Don gii leat geaidnu, duohtavuohta ja eallin, divttášit sudno vádjolit du duohtavuođas. Don gii attát ándagassii ja buoridat, veahket sudno addit goabbat guoibmáseaskka ándagassii. Don gii leat ráhkisvuoda gáldu, veahkehivččet sudno ja buot náitalan olbmuid ovdánit ja láddat ráhkisvuhtii.

*II*

Dákko sáhtta lasihit iežas hábmejuvvon rohkosa, ja / dahje maiddái gintala cahkkehit.

Searvegoddi sáhhtá lávlut rohkossálmma (dan botta go náittusbárra čippusta). Geahča ovdamearkkadihte Sálbmagirji II nr. 673 dahje Salmer 1997 nr. 273.

*III*

*L* Rohkadallot ovttas Hearrá rohkosa.

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

Náittusbárra čohkkeda sadjásis.

Dákko sáhtta čuovvut

## 10 Musihkka / symboladagut

Muhtumat mielčuovvuin ja earát sáhttet čuojahit musihka, lohkat jitnosit dahje oassálastet earálágan kultuvrralaš ovdanbuktimiin.

## 11 Sálbma

### 12 Buressivdnádus

*Jogo A*

*L searvegoddái čalmmát*

Máidnot Hearrá.

*Searvegoddi čuočča.*

*S* Máidnojuvvon lehkos Ipmil. Halleluja. Halleluja. Halleluja.

*L* Hearrá buressivdnidivččii du ja várjalivččii du.

Hearrá divttášii muođuidis čuovgat du badjelii ja livččii dutnje árbmugas.

Hearrá bajdivččii čalmmiidis du ala ja attášii dutnje ráfi. †

*S* Amen. Amen. Amen.

*Dahje B*

*L searvegoddái čalmmát*

Vuostáiváldet buressivdnádusa.

Searvegoddi čuočča.

*L* Hearrá buressivdnidivččii du ja várjalivččii du.

Hearrá divttášii muođuidis čuovgat du badjelii ja livččii dutnje árbmugas.

Hearrá bajidivččii čalmmiidis du ala ja attášii dutnje ráfi. †

*S* Amen.

### **13 Olggosmannan**

Orgelmusihkka dahje eará heivvolaš musihkka. Náittusbárra manná olggos girkus.

# OVDDASROHKOS

## OVDDASROHKOS ORTNET

### boargárlaš náitalan náittusdili ovddas

Ovddasrohkosoaimmaheamis lea vejolaš čáhkehit saji iešgudetlágan oassálastimiidda. Mielčuovvut sáhttet searvat oassálastit muhtin liturgalaš osiin, ja doaimmaheami lassin lea vejolaš čuojahit musihka dahje lohkat jitnosit ja / dahje cahkkehit čuovgga čuovgaglobai. Kultuvraosiin sáhtta maiddá náittusbára etnalaš duogáža deattuhit. Go nuppi beallelaččas lea eará girkolaš gullevašvuohta go Norgga girkui, de sáhtta bismma dohkkeheami bokte diktit su girkoservodaga searvat oassálastit. Sihke eará girkoservodagaid searvan ja kultuvrralaš oasis galget heivehuvvot vihahandoaimma ipmilbálvalusvuohkái ja eaige rihkkut Norgga girku oskovuođu.

Oasit mat lasihuvvojit liturgiijai, sáhttet biddjot maŋábeallái 8. lađđasa **Ovddasrohkos**.

Dakko gokko namat namuhuvvojit, sáhtta atnit olles nama dahje ovdanama, dađimielde go lea lunddolaš. Gažaldagain 7. lađđasis, **Náittusbára ovdanbuktojupmi**, galgá olles namma adnojuvvot.

## 1 Preludia / Sisaboahhtin

Orgel dahje eará heivvolaš musihkka čuojahuvvo preludian / sisaboahhtimis.

Náittusbárra sáhtta ovddalgihtii čohkkedit korrii, dahje boahhtit fárrrolaga korrii ja čohkkedit sadjásis.



Jus hálidit, de sáhttet náittusbárra, vihtanat, liturga ja mielvázzit boahtit girku sisa ráidun.

Dan maŋŋil lea vejolaš lávlut dahje čuojahit heivvolaš lávlaga dahje instrumentamusihka.

## 2 Álggahansánit

*Jogo A*

L Áhči ja Bártne ja Bassi Vuoiŋŋa nammii.

*Dahje B*

L Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

Dasto sávvojuvvo náittusbárrii ja álbmogii bures boahtin dáiguin dahje sullasaš sániiguin:

L Ráhkis (olles namma namuhuvvo) ja (olles namma namuhuvvo), doai náitaleidde (dáhton namuhuvvo) (báikki namma namuhuvvo). Doai leahppi boahtán (girku namuhuvvo) go hálideahppi oazžut girku ovddasrohkosa iežade náittusdili ovddas. Mii leat čoahkkanan illudit dudnuin ja rohkadallat buressivdnádusa dudno ja ruovttude badjeli.

Dasto sáhtttá liturga oanehaččat dadjat dan vuogasvuoda ja ipmilbálvalusa birra mii galgá

dollojuvvo, ja loahpahit vaikko ná:

*Jogo A*

L Man divrras lea du árbmugasvuohta, Ipmil!

Olbmot ohcet suoji du soajáid suoivanis.

Sii gallehuvvojit du viesu buoremus borramušain,

don attát sidjiide juhkat iluidat jogažis.

Dasgo du luhtte lea eallima ája,

du čuovgasis mii oaidnit čuovgasa.

Sál 36, 8-10

*Dahje B*

L Rámidehket Hearrá, dasgo son lea buorre,

su árbmugasvuohta bistá agálaččat.

Dát lea dat beaivi man Hearrá lea dahkan,

ávvuidehkkot ja illudehkkot!

Sál 118, 1,24

*Dahje C*

L Ipmil lea ráhkisvuotta, ja dat guhte bissu ráhkisvuodas, bissu Ipmilis, ja Ipmil bissu su siste. **1 Joh 4,16 b**

### 3 Sálbma

### 4 Čálalohkan

L Ipmil lea sivdnidan min eallit searvevuodas suinna ja guhtet guimmiideametguin. Son lea ásahan olbmá ja nissona leat oktan ja nannen dan searvevuoda buressivdnádusainis.

Náittusdilli lea Ipmila buorre attáldat. Eallit ovttas olmmájin ja nissonin lea eallit luohttámušas ja ráhkisvuodas, juogadit iluid ja morrašiid ja orrut bissovažžan eallenagi goabbat guoimmiska luhtte.

Ipmila sátni duodašta ahte náittusdilli lea bassi ja vealtameahtun.

Vuosttaš Movssesgirjjis čállojuvvo:

Ipmil sivdnidii olbmo iežas govvan, Ipmila govvan son sivdnidii su, olmmájin ja nissonin son sivdnidii sudno. Ipmil buressivdnidii sudno ja celkkii sudnuide: ”Leahkki šattolaččat ja lassáneahkki, deavdi eatnama ja dahkki dan iežade vuolibužžan!”

**1 Mos 1, 27 – 28a**

Ja min Hearrá Jesus Kristus cealká :

Ehpet go leat lohkan ahte Sivdnideaddji álggus sivdnidii sudno olmmájin ja nisun ja celkkii: ”Dan dihtii olmmái guođđá áhčis ja eatnis ja bissu áhkás luhtte, ja dat guovttis šaddaba oktan oažžin”. De eaba leat šat guovttis, muhto okta. Maid Ipmil nappo lea ovttahtán, dan ii olmmoš galgga earuhit. **Matt 19, 4-6**

L Gullot viidáseappot Ipmila sánis.

**2 – 4 dain čuovvovaš teavsttain (geahča 192-201 siidduin) dahje eará heivvolaš**

**čálalohkamiin, unnimus okta goabbatge testamenttain.**

Čálabihtáid sáhttet muhtimat mielčuovvuin lohkat.

Sii geat galget lohkat, mannet fárrolaga lohkanstuolu lusa.

Náittusbárra ja searvegoddi čohkkájit lohkanbottu.

Manjemus lohkamuš loahpahunvo sániiguin:

”Nu čuodjá Hearrá sátni”.

Dákko sáhtta čuovvut

## 5 Sálbma

Sálmma sajis sáhtta lávlut lávlaga dahje čuojahit instrumentamusihka.

## 6 Sárdni

Liturga sárdnida daid čálabihtáid vuodul mat leat lohkkoujvovon 4. lađđasis dahje eará

heivvolaš teavstta vuodul.

## 7 Náittusbára ovdanbuktojuvpmi

Náittusbárra manná áltára ovdii.

### *Jogo A*

L Doai leahppi almmolaš eiseválddi ovddas lohpidan eallit ovtta náittusdilis. Dan lohpidusa mielde galgabeahtti doai leat oktan ja orrut bissovažžan ovtta buriid ja baháid beivviid dassáži go jápmin dudno earuha. Sávaldagade mielde áigut mii odne rohkadallat ja ovdandivvut dudno náittusdili ja ruovttu Ipmila buressivdnádusa vuollái.

### *Dahje B*

L (Olbmá ja nissona olles namma virgenamahusa haga), doai leahppi almmolaš eiseválddi ovddas lohpidan eallit ovtta náittusdilis. Áigubeahtti go joatkit ráhkistit ja

gudnejahttit goabbat guoimmáde ja orrut bissovažžan ovttas buriid ja baháid beivviid gitta dassáži go jápmin dudno earuha?

Náittusbárrá vástida, nubbi nuppi maŋŋil, dahje oktiinjálmmiid:

Áiggun / Áigo.

L Dáhtude mielde áigut mii dál rohkadallat dudno ovddas ja ovdandivvut dudno náittusdili ja ruovttu Ipmila buressivdnádusa vuollái.

## 8 Ovddasrohkos

Náittusbárra luoitáda áltárrieggái čippiid ala.

Liturga rohkadallá gieda ala bijadettiin ovtta čuovvovaš rohkosiin, mii loahpahuvo Hearrá rohkosiin.

Earát mielčuovvuin sáhttet maiddáid ovddasrohkosa vuolde bidjat gieda sudno oaivvi ala.

I

### Jogo A

Váibmoládis Ipmil, don gii leat ásahan náittusdili ja buressivdnidan nissona ja olbmá, mii rohkadallat du: Divttášit du buressivdnádusa bissut (**namma namuhuvo**) ja (**namma namuhuvvo**) badjelis geat dás čippusteaba du muođuid ovddas. Deavddášit sudno ráhkisvuodainat, ja huksešit sudno ruovttu ráfiin. Geahčašit sudnuide árbmugasvuodain, ja nannešit sudno Vuoiŋŋainat, vai soai buriid ja baháid beivviid bijašeigga luohttámušaska dutnje, orošeigga bissovaččat ovttas ja veahkehivččiiga goabbat guoimmiska olahit agálaš eallimii.

### Dahje B

L Buorre Ipmil, mii giitit du (**namma namuhuvvo**) ja (**namma namuhuvvo**) ovddas ja sudno ráhkisvuoda ovddas goabbat guoibmáseaskka. Buressivdnidivččet sudno eallima náitalan olmmožin.

Veahkehivččet sudno doallat daid lohpadusaid maid leaba lohpidan goabbat guoibmáseaskka, vai sudno náittusdilli devdojuvvošii luohttámušain, fuolain ja iluin.

Attášit sudnuide návccaid ja dáhtu hukset ruovttuska ráfiin, vai dat šattašii báikin gos (mánát sáhttet oadjebasvuodas bajásšaddat ja) bearaš ja ustibat sáhttet gávdnat searvevuoda.

Don gii leat geaidnu, duohtavuohta ja eallin, divttášit sudno vádjolit du duohtavuodas. Don gii ándagassii attát ja buoridat, veahkehivččet sudno ándagassii addit goabbat guoibmáseaskka. Don guhte leat ráhkisvuoda gáldu, attášit sudno ja buot náitalanolbmuid šaddat ja rávásnuvvat ráhkisvuodas.

## II

Dákko sáhttá lasihit iežas hábmejuvvon rohkosa, ja / dahje maddái cahkkehit gintala.

Dahje: Searvegoddi lávlu rohkossálmma (dan botta go bárra lea čippiid alde).

## III

Ovddasrohkos loahpahuvo álo Hearrá rohkosiin.

L Rohkadallot ovttas Hearrá rohkosa.

*Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Atte midjiide min sudduid ándagassii,

nugo mii ge ándagassii addit velggolaččaidasamet.

Ale ge doalvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.  
Atte midjiide odne min beaivválaš láibámet.  
Ja atte midjiide min suttuideamet ándagassii,  
nugo maiddái mii ándagassii addit min velggolaččaidasamet.  
Ja ale doalvvo min geahččalusa sisa,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Amen.

Náittusbárra čohkkeda sadjásis.

Dákko sáhtta čuovvut

## 9 Musihkka / symboladagut

Mielčuovvut ja earát sáhttet oassálastit musihkain, jitnositlohkamiin dahje eará kultuvrralaš  
ovdanbuktimiiguin.

## 10 Sálbma

## 11 Buressivdnáduš

*Jogo A*

*L* searvegoddái čalmmát.

Máidnot Hearrá.

Searvegoddi čuoččaha.

S Máidnojuvvon lehkos Ipmil. Halleluja. Halleluja. Halleluja.

L Hearrá buressivdnidivččii du ja várjalivččii du.

Herrá divttášii muođuidis čuovgat du badjelii ja livččii dutnje árbmugas.

Herrá bajdivččii čalmmiidis du ala ja attášii dutnje ráfi. †

*S* Amen. Amen. Amen.

*Dahje B*

*L* searvegoddái čalmmát

Vuostáváldde buressivdnádusa.

*Searvegoddi čuoččaha.*

*L* Herrá buressivdnidivččii du ja várjalivččii du.

Herrá divttášii muođuidis čuovgat du badjelii ja livččii dutnje árbmugas.

Herrá bajdivččii čalmmiidis du ala ja attášii dutnje ráfi. †

*S* Amen.

*Čuovvovaš jaskes rohkosa botta čuojahuvvo girkobiellu golmma geardde golbma časkkástaga*

*Dákko sáhtá lávlut lávlaga dahje čuojahit instrumentamusihka.*

## **12 Postludia / Olggosmannan**

*Orgelmusihkka dahje eará heivvolaš musihkka. Náittusbárra manná fárrolaga girkus olggos.*

# ČÁLALOHKAMAT

L Gullo viidáseappot Ipmila sánis.

2 – 4 dáin čuovvovaš teavsttain dahje heivvolaš teakstalohkamiin, unnimus okta goabbatge testamenttain. Čálalohkosiid sáhttet muhtimat mielčuovvuin lohkat. Sii geat galget lohkat, mannet fárrolaga lohkanstullui.

Náittusbárra ja searvegoddi čohkkájit lohkanbottu.

A Sálmmaid girjji 23. sálmmas čuožžu čállojuvvon:

Herrá lea mu báimman,  
Ii mus váillo mihkkege.

Ruonas gittiide son livvuda mu,  
vuoiŋadusa čázi lusa son láide mu.

Son áhpásmahtta mu sielu.  
Son doalvu mu vanhurskkisvuoda bálgáid mielde  
namas dihtii.

Vaikko mun vádjolivččen jápminsuoivana leagis,  
de in balaše mange bahás eret.

Dasgo don leat mu mielde.  
Du soabbi ja báimmansoabbi jedđejit mu.

Don ráhkadat munnje beavddi  
mu vašálaččaid čalmmiid ovddas.

Don vuoiddat mu oaivvi oljjuin,



mu juhkanlihtti golgá badjel.

Aivvefal buorrevuohta ja árbmugasvuohta  
doarridit mu buot mu eallinbeivviid,

ja mun beasan ássat Hearrá viesus  
guhkes áiggiid čađa.

Sálbma 23

*B* Sálmmaid girjji 36. sálmmas čuožžu čállojuvvon:

Hearrá, du árbmugasvuohta ollá gitta albmái,  
du oskkáldasvuohta balvvaid rádjái.

Du vánhurskkisvuohta lea dego alla várit,  
du duomut dego stuorra mearračikṅodat.

Hearrá, don beasttát olbmuid ja elliid.  
Man divrras lea du árbmugasvuohta, Ipmil!  
Olbmot ohcet suoji du soajáid suoivanis.

Sii gallehuvvojit du viesu buoremus borramušain,  
don attát sidjiide juhkat iluidat jogažis.

Dasgo du luhtte lea eallima ája,  
du čuovgasis mii oaidnit čuovgasa.

Sálbma 36, 6 - 10

*C* Sálmmaid girjji 91. sálmmas čuožžu čállojuvvon:

Dat guhte čohkká Alimusa suojis  
ja ássá Buotveagalačča suoivanis, dadjá ná:

”Herrá lea mu báhtaranbáiki ja ladni,  
mu Ipmil geasa dorvvastan.”

Soadjádolggiidisguin son gokčá du,  
su soajáid vuolde don gávnnat suoji.  
Su oskkáldasvuohta lea galba ja suodjalus.

Dasgo don dajat: ”Herrá lea mu báhtaransadji.”

Don leat dahkan Alimusa orrunsadjinat.

Sálbma 91, 1-2.4.9

*D* Sálmmaid girjji 100. sálmmas čuožžu čállojuvvon:

Rámidehket Herrá, oppa eanan.  
Bálvalehket Herrá ilus,  
bohtet su muođuid ovdii ávuin!

Dovdet ahte Herrá lea Ipmil!  
Son lea sivdnidan min, ja mii leat su,  
su olbmot ja su sávzzat maid son geahččá.

Mannet su poarttaid čađa giittuslávlagiin,  
giitet su ja máidnot su nama.

Dasgo Herrá lea buorre,  
su árbmugasvuohta bistá agálaš áigái,  
su oskkáldasvuohta sogas sohki.

Sálbma 100

*E* Sálmmaid girjji 103. sálmmas čuožžu čállojuvvon:

Mu siellu, máinno Herrá,  
Buoht mii lea mu siste, máinno su bassi nama!

Mu siellu, máinno Hearrá,  
Ale vajáldahte su buorredaguid!

Son addá ándagassii buot du sudduid  
ja dálkkasta buot du vigiid.

Son lonista du heakka hávddis  
ja kruvnnida du árbmugasvuodain  
ja váibmoládisvuodain.

Sálbma 103, 1-5

*F* Salomo allalávlagis, 2. kapihttalís čuožžu čállojuvvon:

Ráhkkásan lea dego gasella,  
son lea nuorra sarvá láhkái.  
Duo son čuožžu min seainni guoras,  
son guovlá sisa ihkkonráiggi,  
vákšu čeargalasa čađa.  
Ráhkkásan cealká munnje:  
Čuožžil, ráhkkásan,  
boáde olggos, čábbážan!

Čuožžil, ráhkkásan,  
boáde olggos, čábbážan!  
Mu duvvá bákteskurččuid siste,  
báktestealli suojis,  
čájet munnje hámat,  
divtte mu gullat du jiena!  
Du jietna lea nu ládis  
ja du hápmi nu čáppis.

Allalávlla 2, 9 -10a.13b-14

*G* Salomo allalávlagis, 2. ja 8. kapihttalís čuožžu čállojuvvon:

Dán čálalohkosa sáhtta okta čálalohkki lohkat dahje nisu (I) ja olmmáiolmmoš (II).

*I*

Gula, ráhkkásan boahtá!  
Geahča, do son lea,  
son viehká váriid badjel,  
njuiku badjel dieváid.  
Ráhkkásan lea dego gasella,  
son lea nuorra sarvá láhkái.  
Duo son čuožžu min seainni guoras,  
son guovlá sisa ihkkonráiggi,  
vákšu čeargalasa čađa.  
Ráhkkásan cealká munnje:

*II*

Čuožžil, ráhkkásan,  
boade olggos, čábbážan!  
Dálvi lea gollan,  
arvviid áigi lea vássán.  
Liedit ihtet eatnamis,  
lávlunáigi lea boahtán,  
turtelduvvá jietna gullo min eatnamis.  
Fiikkonmuora šaddosat čuolbmadvvet,  
viidnemuoraid liedit haksojit.  
Čuožžil, ráhkkásan,  
boade olggos, čábbážan!  
Mu duvvá bákteskurččuid siste,  
báktestealli suojis,  
čájet munnje hámat,  
divtte mu gullat du jiena!  
Du jietna lea nu ládis  
ja du hápmi nu čáppis.

## *I*

Ráhkkásan lea mu, ja mun lean su,  
su guhte guođoha ealus liljáid gaskkas.  
Go bieggá bossugoahdá ja suoivanat gáidet,  
de máhce, ráhkkásan,  
dego gasella, dego nuorra sarvvis  
váriid badjel main njálggiida vuoiddashádja!

## *I / II*

Bija mu seailan váibmosat,  
seailan giehtasat.  
Ráhkisvuohta lea nanus nugo jápmin,  
hálidus garas dego jábmiid áibmu.  
Dat buollá dego dolla,  
dego fámolaš dollanjuokčamat.  
Stuorra čázit eai sáhte čáskadit ráhkisvuođa,  
eanut eai veaje dan heavahit. Allalávlla 2,8-14.16-17 + 8,6-7a

*H* Salomo allalávlagis, 8. kapihttalis, čuožžu čállojuvvon:

Bija mu seailan váibmosat,  
seailan giehtasat.  
Ráhkisvuohta lea nanus nugo jápmin,  
hálidus garas dego jábmiid áibmu.  
Dat buollá dego dolla,  
dego fámolaš dollanjuokčamat.  
Stuorra čázit eai sáhte čáskadit ráhkisvuođa,  
eanut eai veaje dan heavahit. Allalávlla 8, 6-7a

*I* Evangelista Matteus čállá 5. kapihttalis:

Jesus celkkii: Dii lehpet eatnama sálttit. Muhto jos sálttit veagahuvvet, mainna dalle sáhttá sáltet? Eai dat dohkke šat maninge, muhto bálkásit ja duolmmahallet olbmuide. Dii lehpet máilmmi čuovggas. Gávpot mii lea vári alde, ii sáhte leat čihkosis. Ja go olmmoš cahkkeha gintala, de ii bija dan gári vuollái, muhto baicca ginttaljuolgái, vai dat báitá buot viesu olbmuide. Nu báitos din čuovggas ge olbmuide, vai sii oidnet din buriid daguid ja máidnot Áhčádet guhte lea almmis! **Matt 5,13-16**

**J** Evangelista Matteus čállá 6. kapihttalis:

Jesus celkkii: Allet moraš heakkadet dihtii ahte dis lea maid borrat ja juhkat, allet ge rupmaša dihtii ahte leat biktasat. Ii go heagga leat eanet go borramuš ja rumaš eanet go biktasat? Gehččet almmi lottiid! Eai dat gilvve eai ge láddje eai ge čohkke láđuide, muhto din almmálaš Áhčči biebmá daid. Ehpet go dii leat ollu mávssolaččabut go dat? Guhtemuš ba dis sáhttá buot morrašiiddisguin lasihit ovttá állana ge eallinguhkkodahkasis? Ja manne moraštehpet biktasiid dihtii? Gehččet gietti lidiid, mo dat šaddet! Ei dat bargga eai ge bane, muhto mun cealkkán didjiide: Ii oppa Salomo ge buot hearvásvuodainis lean gárvvohuvvon nugo okta sis. Jus Ipmil gárvvoha gietti rásiid nu čábbát, daid mat odne leat ceaggámin ja ihttin bálkestuvvojit oapmanii, ii go son olu eanet gárvvohivčče din, dii uhccán oskkolaččat? Allet nappo moraš ja cealkke: Maid mii dál borrat? dahje: Maid juhkat? dahje: Mainna gárvodit? Buot dáid háhpohallet báhkinat, muhto din almmálaš Áhčči diehtá juo ahte dii dárbašehpet buot dáid. Ohcet baicca vuos Ipmil riikka ja su vanhurskkisvuoda, de buot dát addojuvvojit didjiide. Allet nappo moraš ihtáš beaivvi dihtii; gal ihtáš beaivi buktá morrašiiddis. Juohke beaivvis leat doarvái iežas váivvit. **Matt 6,25-34**

**K** Evangelista Matteus čállá 7. kapihttalis:

Jesus celkkii: Átnot, de oažžubehtet. Ohcet, de gávdnabehtet. Goalkkuhehket, de didjiide rahppojuvvo uksa. Dasgo juohkehaš guhte átnu, oažžu, ja son guhte ohcá, gávdná, ja guhte goalkkuha, sutnje rahppojuvvo uksa. Buot maid dii dáhttubehtet earáid dahkat alcceseattet, dahket dii ge sidjiide. Dasgo nu lea láchka ja profehtat.

**Matt 7,7-8.12**

**L** Evangelista Matteus čállá 7. kapihttalis:

Jesus celkkii: Juohkehaš guhte gullá dáid mu sániid ja dahká daid mielde, lea jierpmálaš olbmá láchásaš guhte huksii viesus bávtti ala. Arvi šoalai, jogat dulve ja

biekkat bosso ja čuhce viesu njeaiga. Muhto dat ii gahččan, dasgo dat lei huksejuvvon bávtti ala.

**Matt 7, 24-25**

**M** Evangelista Johanas čállá 15. kapihttalas:

Jesus celkkii: Nugo Áhčči lea ráhkistan mu, nu lean mun ge ráhkistan din. Bissot mu ráhkisvuodas! Jos doallabehtet mu báhkkomiid, de bissubehtet mu ráhkisvuodas, nugo mun ge lean doallan Áhččán báhkkomiid ja bisun su ráhkisvuodas. Dán lean sárdnon didjiide, vai mu illu bisošii din siste, ja din illu šattašii ollisin. Dát lea mu báhkkon: Ráhkistehket guhtet guimmiideattet nugo mun lean ráhkistan din.

[Ii ovttasge leat stuorit ráhkisvuohta go das guhte addá heakkas ustibiiddis ovddas. Dii lehpet mu ustibat jos dii dahkabehtet dan maid mun gohčun. In mun šat gohčot din bálvaleddjain, dasgo bálvaleddji ii dieđe maid su isit dahká. Muhto mun gohčodan din ustibin, dasgo mun lean almmuhan didjiide buot maid lean gullan Áhčistan. Ehpet dii leat válljen mu, muhto mun lean válljen din ja lean vuolggahan din šaddadit šattuid, bistevaš šattuid. Go nu dahkabehtet, de Áhčči addá didjiide buot maid átnubehtet mu nammii. Dát lea mu báhkkon didjiide: Ráhkistehtet guhtet guimmiideattet!]

**Joh 15, 9-12[-17]**

**N** Bávlos čállá reivvestis romalaččaide, 8. kapihttalas:

Dasgo mun lean vissis das ahte ii jápmin ii ge eallin, eai engelat eai ge eará oaivámuččat, eai dat mat leat dál eai ge dat mat bohtet, dahje miige fámuid, eai dat mat leat badjin eai ge dat mat leat čiekŋalassas, sáhte earuhit min Ipmila ráhkisvuodas Kristus Jesusis, Herrašteamet.

**Rom 8, 38-39**

**O** Bávlos čállá vuosttaš reivvestis Korintalaččaide, 13. kapihttalas:

**Sáhtá lohkat juogo visot kapihttala dahje dušše osiid das.**

Mun čájehan didjiide buot buoremus geainnu: Vaikko vel sártnošin ge olbmuid dahje engeliid gielaiguin, muhto mus ii livčče ráhkisvuohta, de livččen dušše čuoddji biellu dahje skilaideaddji divga. Vaikko mus vel livččii ge profehtastallanattáldat ja dovddašin buot čiegusvuodaid ja buot dieđu, ja vaikko mus livččii buot osku nu ahte sáhtášin váriid sirdit, muhto ii livčče ráhkisvuohta, de mun in livčče mihkkege. Vaikko vel juogadivččen váivvážiidda buot mii mus leažžá, ja vaikko divttášin iežan boldojuvvot, muhto mus ii livčče ráhkisvuohta, de dat ii livčče munnje ávkin.

Ráhkisvuohta lea gierdavaš, ráhkisvuohta lea ládis, ii dat gádaš ii ge rábmo ii ge čeavlástala. Ii dat daga maidege dohkkemeahttumiid ii ge bivdde iežas ávkki, ii dat suhta ii ge vurke baháid. Ii dat illut vearrivuodas, muhto baicca duohtavuodas. Dat gillá buot, osku buot, doaivu buot, gierdá buot.

Ráhkisvuohta ii noga goassege. Muhto profehtastallanattáldagat nohket, gielaiguin sárdnun jávohuvvá ja diehtu nohká. Dasgo min diehtu lea váilevaš, ja min profehtastallan lea váilevaš. Muhto go ollisvuohta boahtá, de jávká dat mii lea váilevaš. Mánnán mun hállen nugo mánná, mus lei máná miella ja máná jurdagat. Muhto go šadden rávisin, de gudden mánálašvuoda. Dál mii oaidnit dego njoadve speadjalis, dego árvádusa, muhto dalle oaidnit oktii čalmmiid. Dál lea áddejupmi váilevaš, muhto dalle dat lea ollislaš, nugo Ipmil dovda mu ollásit.

De dat bissot, dát golmmas: Osku, doaivu ja ráhkisvuohta. Muhto buot stuorimus dain lea ráhkisvuohta.

### 1 Kor 13

*P* Bávlos čállá reivvestis efesoslaččaide, 3. kapihttalas:

Dan dihtii mun sodjalahtán čippiidan Áhči ovddas, gii lea sin buohkaid áhčči geat gohčoduvvojit mánnán almmis ja eatnama alde. Vare son geas lea nu cealkemeahttun hearvásvuohta, nannešii din siskkáldas olbmo fámuinis ja Vuoiŋŋainis, vai Kristus ásašii din váimmuin go dii oskubehet. Ja vare ráhkisvuohta livččii din ruohtas ja vuodđu, vai dii áddegoadášeiddet Kristusa ráhkisvuoda govododaga ja guhkkodaga, allodaga ja čikŋodaga, ja oahpašeiddet dovdat maiddái dan, mii manná buot dieđu badjel, dassáziin go oppa Ipmila dievasvuohta deavdá din. Son guhte duddjo min siste fámuinis, ja sáhtá dahkat valljugasabut go dan maid mii sáhttit rohkadallat ja áddet, sutnje lehkos gudni girkus ja Kristus Jesusis buot buolvvaid čađa álo ja agálašvuhtii. Amen.

### Ef 3.14-21

*Q* Bávlos čállá reivvestis filippiláččaide, 2. kapihttalas:

Jos dasto Kristusis lea jeddehus, ráhkislaš árvvosmahttin, searvevuohta man Vuoiŋŋa addá, ja jos lea njuorasvuohta ja árkkálmastinvuohta din gaskkas, de dahket dál mu ilu ollisin: Atnet searvevuoda ovttain ráhkisvuodain, ovttain jurdagiin ja mielain. Allet daga maidege dušše vuovdnáivuoda ja guoros gudneáŋgirvuoda dihtii, muhto lehkot ustitlaččat ja atnet earáid alibun go iežadet. Allet jurddaš dušše iežadet ávkki, muhto maiddái earáid ávkki. Čájehehket seammá miellalági go Kristus Jesusis lei!

### Fil 2, 1-5



*R* Bávlos čállá reivvestis filippilaččaide, 4. kapihttalis:

Illudehket álelassii Hearrás! Vel oktii cealkkán: Illudehket! Dovdoset buot olbmot ahte dii lehpet láddásat. Hearrá lea lahka! Allet ane morraša mastege! Buktet baicca buot dárbbuideattet ovdan Ipmilii rohkadallamiin ja ánodemiin giitevašvuodain! De Ipmila ráfi, mii manná buot jierpmi badjel, várjala din váimmuid ja jurdagiid Kristus Jesusis. Loahpas, oskuguoimmit: Váldeht vuhtii buot dan mii lea duohta, gudnálaš, riehta ja buhtis, buot dan mii lea ráhkistan ja gudnejahttin veara, juohke buori dábi ja buot mii ánsšáša rámi! **Fil 4, 4-8**

*S* Bávlos čállá reivvestis kolossalaččaide, 3. kapihttalis:

Gárvodehket dan dihtii njuoras árkkálmastinvuodain, buorrevuodain, ustitlašvuodain, vuollegašvuodain ja gierdavašvuodain, nu ahte dii gierdabehtet guhtet guimmiideattet ja addibehtet ándagassii guhtet guoibmáseattet, jos nuppis lea váidámuš nuppi vuostái. Nugo Hearrá lea addán ándagassii didjiide, nu galgabehtet dii ge addit ándgassii guhtet guoibmáseattet. Muhto ovddimustá, gárvodehket ráhkisvuodain mii lea ollisvuoda báddi. **Kol 3, 12b – 14**

*T* Johanasa vuosttaš reivve 4. kapihttalis lea čállojuvvon:

Ráhkásiiddán, ráhkistehkot guhtet guimmiideamet! Dasgo ráhkisvuolta boahtá Ipmilis, ja juohkehaš guhte ráhkista, lea rieghádan Ipmilis ja dovdá Ipmila. Dat guhte ii ráhkis, ii dovdá Ipmila, dasgo Ipmil lea ráhkisvuolta. Nu lea Ipmila ráhkisvuolta almmustuvvan min gaskii ahte son vuolggahii áidnorieghádan Bártnis máillbmái vai mii ealášeimmet su bokte. Ráhkisvuolta ii leat dat ahte mii leat ráhkistan Ipmila, muhto ahte son lea ráhkistan min ja vuolggahan Bártnis min sudduid soabahussan. Ráhkásiiddán, jos Ipmil lea ráhkistan min nu, de mii ge leat geatnegasat ráhkistit guhtet guimmiideamet. Ii oktage lea goassege oaidnán Ipmila, muhto jos mii ráhkistit guhtet guimmiideamet, de Ipmil bissu min siste, ja su ráhkisvuolta ollašuvvá min siste. **1 Joh 4, 7-12**

# DÁBÁLAŠ MEARRÁDUSAT HÁVDÁDEAPMÁI

Dábálaš mearrádušat hávdádeapmái leat mearriduvvon 2002 Girkočoahkkimis. Mearrádusa vuodđon lea ruvdnaprinsareg. res. golggotmánu 26. beaivvi 1990, gč. vuodđolága § 16.

Mearrádušat doaibmagohtet njukčamánu 1. beaivvi rájes 2003 sorjjakeahtta mákkár hávdádanortnet adnojuvvo. Dan rájes doaibmagohtet dát mearrádušat daid sajis mat leat Dábálaš mearrádušain *Norgga girku Ipmilbálvalusgirjji* Oassi II, siiddut 129 – 131.

Čuovvovaš Hávdádan ortnet mearriduvvui 2002 Girkočoahkkimis ollistit *Norgga girku Ipmilbálvalusgirjji* ortnega. Mearrádusa vuodđun lea ruvdnaprinsareg. res. golggotmánu 26. b. 1990, gč.. vuodđolága § 16.

Njukčamánu 1. beaivvi 2003 rájes váldojuvvo ortnet atnui searvegottiin gos searvegotečoahkkimat dan leat mearridan.

# HÁVDÁDEAPMI

## DÁBÁLAŠ MEARRÁDUSAT

1 Hávdádeapmi lea searvegotti maŋemus bálvalus miellahttuiddasas. Go olmmoš jápmá, de lagamuččat, dábálaččat bearaš, fuolahit ahte jápmán olmmoš oažžu gudnálaš divššu ja hávdádeami. Hávdádeapmái leat vuoddonjuolggadusat hávdádanlágas.

Hávdádanlága § 9 lea mearridan geas lea riekti, ja maiddái lágalaččat ovddasvástádus, fuolahit hávdádeami.

Go olmmoš gii gullá Norgga girkui jápmá, de berre jođánepmosit ásahuvvot oktavuohhta gaskal searvegotti báhpá ja lagamuččaid. Hávdádeapmi galgá dahkkot maŋemus 8 beaivvi maŋŋil jápmima, gč. hávdádanlága § 10 goalmát lađđasa ja § 12.

2 Girkolaš ortnega mielde lea hávdádeapmi doaibma mas lea ipmilbálvalus vuohki. Ortnega hápmi ovdanbukta girku risttalaš oskku guovddáža: ahte olmmoš lea Ipmila sivdnáduš, ahte Ipmil lea Jesus Kristusa jápmima ja bajásčuožžileami ja sutnje oskuma bokte ásan bestojumi olbmui, ahte duopmobeavvi galgá dat ieš dahkat logu eallimis ovddas, ja ahte dat galgá bajásčuoččáldahttojuvvot.

3 Buohkat geain lea ovddasvástádus ja geat leat veahkkin hávdádeamis galget čálabáikkiid, rohkosiid ja sálmmaid válljemis ja das mii muđuid daddjojuvvo ja dahkkojuvvo, fuolahit ahte biibbalaš sáhka ovdanbuktojuvvo dievaslaččat.

Daguid, nugo čijaheami, symbolaid atnima ja hávdeliidiid bidjama galgá heivehit girkolašmeanuid vuohkái. Das berre mearri man ollu hávdeliediid ja dakkárat galget leat.

Hávdeliidiid bidjama oktavuodas ii biddjo áigi sártniide, jus nu ii leat šihttojuvvon singuin geat fuolahit hávdádeami.

Lagamuččat berrejit beassat fárus láchčimis.

4 Sálmmat ja lávlagat galget ovddalgihtii dohkkehuvvot sus gii galgá doaimmahit.

Seammaládje guoská maiddáid gudnejahttojumiide ja eará daguide maid hálidit čadahit lassin hávdádanortnegii.

Kantora/čuojaheadji galgá ovddalgihtii dohkkehan buot musihka mii galgá čuojahuvvot. Go galgá välljet vuohkkaseamos sálmmaid ja musihka ja eará doaimmaid, de berre lagamuččaiguin ásahit oktavuoda nu jodánit go vejolaš.

5 Lea dárbblaš bidjat buori áiggi vai sihkkarastá gudnálaš čadaheami doaimmas. Son gii doaimmaha galgá maid bearráigeahččat ahte buohkat geat oassálastet hávdáandoaimmas, ferejit nu ahte doaimma sáhtta čadahit buori ja gudnálaš vugiin, girku ortnegiid mielde.

6 Liturga doaimmaha barggus dilálašvuoda ja báikki vieruid mielde jogo girkus/kapeallas ja hávddi luhtte, dahje ruovttus ja hávddi luhtte, dahje dušše hávddi luhtte.

Hávdáandoaimma čadahuvvo girkus maiddáid dalle go lea kremašuvdna.

Gunaid biđgema birra dadjá hávdádanláhka ná: Ii sáhte gáibidit girkolaš oassálastima dakkár hávdádeapmái (hávdádanláhka § 20 maŋemus čuokkis ja § 9 maŋemus lađas).

Go liturga doaimmaha dušše ruovttus ja hávddi guoras dahje dušše hávddi guoras, de adno ortnet *Hávdádeapmi girkus dahje krematorias* nu guhkás go lea lunddolaš. Seammaládje dahkko dalle go hávdádeamis eai leat mieđušteaddjit. Girkolaš oassálastin ii sáhte ráddjejuvvot dušše muoldasuhppemii.

Ortnet *Hávdádeapmi girkus dahje krematorias* sáhtta dárbblaš lasáhusaiguin adnot muiorohkosbottus girkus dahje kapeallas go gistu ii leat girkus doaimma čadaheamis.

7 Njuoratmánáid hávdádeamis doibmet seamma mearrádušat go mánáid hávdádeamis, gč. s. 230. Seammaládje dalle go váhnemat hálidit hávdádit máná gii lea jápmán ovdal riegeadeami.

Dakkár oktavuodain lea vejolaš rievdadit ortnega lađđasiid nu movt dillái buoremusat heive, muhto Hearrá rohkos galgá álohii váldojuvvot mielde.

Sáhtta leat mávssolaš veahkehit váhnemiid addit nama jápmán njuoratmánái, dahje mánái gii lea ovdal riegádeami jápmán.

Go váhnemat geat hálidit iežaset máná gásttašahhtit, masset mánáset ovdal gásttašeami, de muittuha báhppa sidjiide dan jedđehus sáni ahte “Almmálaš Áhčči ii dáhto ahte oktage dain uhcahaččain láhppo”. (Matt 18,14) dahje eará čálabihtta.

8 Muoldasuhppen dahkko hávddi luhtte. Liturga sáhtta das spiehkastit jus olggaldas dahje vuđolaš persovnnalaš ákkat dan gáibidit, ja mearridit dan čadahit girkus / kapeallas.

Kremašuvnna oktavuodas čadahuvvo muoldasuhppen doaimma loahpaheamis.

Váldonjuolggadus lea ahte gistu luitojuvvo ovdal muoldasuhppema.

Searvegodderáđdi sáhtta mearridit muoldasuhppema čadahit ovdal go gistu luitojuvvo.

Gistu galgá luitojuvvot áibbas bodnái.

Jus eahpiduvvo ahte lea go muoldasuhppen čadahuvvon, ovdamearkka dihtii go kremašuvdna lea olgoriikkas dahkkon, de sáhtta muoldasuhppema čadahit urdnabidjama oktavuodas.

9 Hávdádeami sáhtta diakona doaimmahit jus nu lea suohkanbáhpain ja bismmain šiehtaduvvon.

Jus ii leat báhpas iige diakonas vejolašvuohta doaimmahit hávdádeami, de sáhtta dábálaš risttalaš olmmoš dan doaimmahit bismma dohkkeheami vuodul.

10 Stuorámus bielluin sáhtta goalkkuhit sullii 5 minuvtta ovdal oktiičuojahemiin, mii dahkko seamma bielluin.

Sáhtta goalkkuhuvvot go mieđušteaddjit mannet hávddi lusa ja go gistu luitojuvvo, ja doaimma loahpahettiin sáhtta čuojahit 3 geardde 3.

Biellut sáhttet čuodjat go mieđušteaddjit vulget hávddi luhtte.

11 Liturgalaš ivdni lea sáhppes ruoksat.

# ORTNET

## HÁVDÁDEAPMI

### GIRKUS DAHJE KREMATORIAS

#### 1 Girkobielločuojaheapmi

Go lea čuojahuvvon girkobielluiguin, de liturga čohkkeda korrii.

#### 2 Preludia

Heivvolaš čuojanasmusihkka, koarralávlun dahje aktolávlun sáhtá doaibmat preludian.

Preludia sáhtá álgun vuosttaš sálbmi.

#### 3 Sálbma

Dán sálbma lea vejolaš sirdit maŋabeallái 4. laddasa.

#### 4 Álggahansánit

*L* Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

Mii leat čoagganan dása (**namma namuhuvvo**) earrodearvvuođaid dahkat. Mii hálidit addit su Ipmila háldui [ja čuovvut su maŋemus vuoŋŋastanbáikái]. \*

\* Ruođuid siste teaksta ii dárbbas váldojuvvot mielde dalle go lea kremašuvdna.

Dasgo nu Ipmil lea ráhkistan máilmmi, ahte son attii áidnoriegádan Bártnis, vai dat geat oskot sutnje eai láhppo, muhto ožžot agálaš eallima. **Joh 3,16**

Dasto sáhtá liturgiija joatkit čuovvovaš čálabáikkiiguin:

*Jogo A*

Jesus cealká: Bohtet mu lusa, buohkat geat rahčabehtet ja guoddibehtet lossa nođiid,  
de attán didjiide vuoiŋjadusa. **Matt 11,28**

***Dahje B***

Ipmil cealká sánistis:

Čuorvvo mu heahtebeaivvi, de mun gájun du, ja don máinnut mu. **Sál 50,15**

## 5 Álggahanrohkos

L Rohkadallot.

***Jogo A***

Čiekŋalassas mun čuorvvun dutnje, Hearrá.

Hearrá, gula mu jiena!

Jorgal bealját mu guvlui

ja guldal mu njuoras rohkosiid.

Jos don vurket sudduid, Hearrá, gii dalle ceavzá?

Muhto dus lea ándagassii addojupmi,

dan dihtii mii ballat dus.

Mun vuorddán Hearrá,

mu siellu vuordá,

mun vuorddán su sáni.

Mu siellu vuordá Hearrá eambo

go goziheaddjit idida, goziheaddjit idida.

Israel, vuordde Hearrá,

dasgo Hearrá lea árbmugas,

sus lea fápmu lonistit.

Son lonista Israela buot sudduin.

**Sál 130, 1-8**

***Dahje B***

Hearrá, don leat leamaš min orrunsadji

sogas sohki.



Ovdal go várit riegádedje,  
ovdal go eanan ja máilbmi šadde,  
agálašvuodas agálašvuhtii leat don, Ipmil.

Don divttát olbmo šaddat fas muoldan  
ja cealkkát: “Máhccet ruoktot, olbmománát.”  
Dasgo duhát jagi du čalmmiin lea dego  
ievttáš beaivi mii jávkkihii meattá,  
dego idjagohcinvuorru.

Oahpat min lohkat beivviideamet,  
vai mii oažžut viissisvuoda váibmui!

Sál 90, 1-4.12

#### *Dahje C*

Ipmilan, Ipmilan, manne leat mu guodđán?  
Mun váidalan headistan, muhto bestojupmi  
lea guhkkín eret.  
Ipmilan, mun čuorvvun beaivet, itge don vástit,  
ja ihkku, inge oáččo ráfi.

Muhto Hearrá, ale leage guhkkín mus eret,  
doama veahkehit mu, don mu gievravuohtha!

Sál 22, 2-3.20

#### *Dahje D*

Bassi Ipmil, almmálaš Áhčči, don ráđđet buot eallima ja jápmima badjel. Go mii dál dahkat earrodearvvuodaide ráhkkásiinnámet, de nanne min oskku, vai mii hávddi luhtte ge sáhttit bidjat doaivvumet dutnje.

Hearrá Jesus, oskkáldas Beasti, guhte manai jápmima ja hávddi čađa min dihtii, oro min luhtte min mañimuš headis. Don guhte leat bajásčuožžileapmi ja eallin, bovtte min agálaš eallimii. Don guhte leat searvegotti Beasti ja Hearrá, suova min oktii čoagganit du Áhčát vissui duinna ja buot du olbmuiguin.

Bassi Vuoigŋa, alimus jedđejeaddji go mii eallit ja jápmit, deavdde buot morašteaddji váimmuid ipmilvuoda jeddehusainat. Beastte min vuoigŋalaš jápmimis, gease buohkaid du lusa, ja atte midjiide almmálaš dávvira.

#### *Dahje E*

Hearrá Ipmileamet, du luhtte lea eallima ája,

du čuovgasis oaidnit čuovgasa.  
Du siste mii eallit, lihkadit ja leat.  
Várjal min ráhkisvuodainat eallimis ja jápmimis,  
Bártnát Jesus Kristusa, Hearrámet bokte.

### *Dahje F*

Buorre Ipmil, don gii oainnát ja dovddat min, boađe min lahka jedđehusainat.

## **6 Muitosánit**

Báhppa dahje muhtin lagamuččain doallá oanehis muiosártni. Das berre namuhit muhtin beliid dan olbmo eallimis, ja deattuhit erenoamážit dan olbmo eallima mearkašumi su lagamuččaide, ja earáide geaiguin son su eallimis lea servvoštallan iešguđet oktavuodain.

Dás sáhttet buktit dearvvuodaid, bidjat hávdeliđiid ja dahkat eará muitodaguid jus leat dakkárat, nugo jitnositlohkan, musihkka, gintaliid cahkkeheapmi jna.

Dás sáhtta čuovvut:

## **7 Sálbma dahje musihkka**

Musihkkaosis sáhtta jogo lávlut dahje čuojahit čuojanasa.

## **8 Čálalohkan**

L Gullot maid Ipmila sátne duodašta dán eallima nohkavašvuoda birra, jápmima ja duomu birra, ja min doaivaga Jesus Kristusis.

Dákko leat golbma teakstaloškama. Teavsttat válljejuvvojit nu ahte gokčat dan sisdoalu mii ovdalis lea namuhuvvon.

Searvegoddi čohkká dan botta go lohkojuvvo.

Teavsttaid lohka liturga dahje okta dahje moadde eará.

Čálalohkan loahpahunvvo dáinna:

*L* Nu čuodjá Hearrá sátni.

Dákko sáhhtá čuovvut

## 9 Sálbma

Jus 7. lađas lea sálbma, de ii dárbbas 9. lađđasa váldit mielde.

## 10 Sárdni

Oanehis sárdni lohkkovuvvon čálabáikkiid vuođul dahje eará heivvolaš teavstta vuođul.

## 11 Rohkos

*L* Rohkadallot.

*Jogo A*

*L* Agálaš Áhčči, min dorvu morrašis, leage lahka ráfiinnat. Nanne min oskkus. Atte midjiide boahhteáiggi ja doaivaga. Mii giitit du (**namma namuhuvvo**) ovddas ja dan maid don su eallima bokte addet midjiide.

Váibmoláđis Ipmil, mii addit su du háldui. Don gii leat min sivdnidan govat mielde ja addán Jesus Kristusa midjiide Beastin, čuoččáldehte min bajásčuožžileami beivvi agálaš eallimii du luhtte.

*Dahje B*

*L* Jesus Kristus, don gii lohpidit leat minguin buot beivviid gitta máilmmi loahpa rádjái, leage min gievrvuohta ja jeđdehus, min čuovga ja oahpisteaddji. Suovašit min buohkaid dutnje oskkudettiin oktii oažžut oasi bajásčuožžileami ilus.

*Dahje C*

*L* Agálaš Ipmil, almmálaš Áhčči, don leat Bártnistat, Jesus Kristusis, addán midjiide vuoittu jápmima badjel. Mii rohkadallat: Láide min Bassi Vuoiŋŋainat, amamet jorgalit dus eret, muhto ealidettiin oskkošeimmet du Bárdnái, ja oktii olahit agálaš eallima du riikkas, Jesus Kristusa, Hearrámet bokte.

### *Dahje D*

L Hearrá Jesus Kristus, don gii buot min suttuid guddet, mii giitit du ráhkisvuođa ovddas mii lea gievrrat go jápmin. Atte midjiide oasi bestojumis maid jápmimat ja bajásčuožžileamát bokte vuitet, ja láide min fámoláš giedainat eallima, jápmima ja duomu čađa iežat agálaš illui.

### *Dahje E*

L Almmálaš Áhčči, mii giitit du dan ovddas maid don addet (**namma namuhuvvo**) bokte gii dál lea jápmán. Nanne ja jedde buohkaid geat moraštit ja dovdet ohcaleami. Mii bidjat iežamet du gievrras gihtii. Veahket searvevuodastat min eallit, vai mii oktii beassat vuolgit dáppe ráfis, Jesus Kristusa, Bárnát, Hearrámet bokte.

### *Dahje F*

Rohkos mii lea čállojuvvon dan dilálašvuhtii maid lagamuččat ja báikkálaš servodat leat dán jápmima oktavuodas muosáhan.

Dákko sáhtta čuovvut

## **12 Du giedaide**

*Buo* Du giedaide mun bijan vuoignan, Hearrá,  
oskkáldas Ipmil, don lonistat mu.

Du giedaide mun bijan vuoignan, Hearrá.

Gudni lehkos Áhččái ja Bárdnái ja Bassi Vuignii.

Du giedaide mun bijan vuoignan, Hearrá.

Dán laddasa sáhtta maiddái lávlut vurrolagaid, geahča NoS 936

Dákko sáhtta maiddái Simeona máidnunlávлага (Luk 2, 29-32) jogo lohkat dahje lávlut,  
geahča Norsk Salmebok 909-910.

## **13 Hearrá rohkos**

*L* Rohkadallot Hearrá rohkosa.

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## **14 Sálbma**

## **15 Postludia**

Ovdal postludia sáhtta jogo lávlut dahje čuojahit čuojanasa.

Go postludia lávlojuvvo dahje čuojahuvvo, de guddojuvvo gistu olggos.

# MUOLDASUHPPEN

## A HÁVDDI LUHTTE

Ovdal 16. lađđasa Sálbma biddjojuvvo gistu hávddi ala ja bissu das gitta 19. lađđasii

Luitojupmi.

Gos geavatláččat lea nu, luitojuvvo gistu hávddi bodnái ovdalaš go sálbma (16. ladas)

lávlojuvvo.

## 16 Sálbma

Dasto sáhtá ná jotkojuvvot

## 17 Čálalohkan

Okta čuovvovaš teavsttain, mat eai leat dán hávdádeamis ovdal lohkkjuvvon:

Sálbma 50,15

Sálbma 68,21

Matt 11,28

Alm 2, 17b-18

Sálbma 23

Sálbma 121

Matt 28, 1-10

Alm 21, 1-5a

Dákko sáhtá čuovvut

## 18 Rohkos hávddi luhtte

Dán rohkosis sáhtta liturga heivehit (namma namuhuvvo) nu mo lea vuohkkaseamos –  
ovdamearkka dihtii olles namain, ovdanamain, min ráhkis, min ustit jnv.

### *Jogo A*

Hearrá Jesus Kristus, divtte dán hávddi leat doaivvu báikin, oskkudettiin dutnje gii čuožžilit bajás jábmiid luhtte.

### *Dahje B*

Hearrá Jesus Kristus, don gii ieš hávdáduvvojit, divttášit čuovvut du jábmiid luhtte bajásčuožžileamis.

### *Dahje C*

Hearrá Jesus Kristus, divtte (namma namuhuvvo) vuoiŋastit ráfis ruossa mearkka vuolde gitta bajásčuožžileami iđidii. Veahket min eallimis ja jápmimis bidjat doaivvumet dutnje.

### *Dahje D*

Hearrá Jesus Kristus, don gii ieš hávdáduvvojit, divtte dán báikki leat doaivaga báikin, gos (namma namuhuvvo) beassá ruossa mearkka vuolde vuoiŋastit gitta dan beaivvi rádjái go don rávkkat buohkaid bajás hávddiin. Veahket min eallimis ja jápmimis bidjat doaivvumet dutnje.

## 19 Luitojupmi

Gistu luitojuvvo dábálaččat áibbas bodnái.

## 20 Muoldasuhppen

L Áhči, Bártni ja Bassi Vuoiŋa nammii.

Liturga suhpe dasto muoldda golmma geardde gisttu ala ja cealká:

1. geardde: Eatnamis leat don boahtán.
2. geardde: Eanamin don šattat.
3. geardde: Eatnamis don bajásčuožžilat fas.



## 21 Čálasátni ja buressivdnáduš

### *Jogo A*

*L* Min Hearrá Jesus Kristus cealká: Mun lean bajásčuožžileapmi ja eallin. Dat guhte osku munnje, oažžu eallit vaikko vel jápmá ge. Ii oktage guhte eallá ja osku munnje, jáme agálašvuodas ge. **Joh 11, 25-26**

### *Dahje B*

*L* Máidnojuvvon lehkos Ipmil, Hearrámet Jesus Kristusa Áhčči, guhte stuora árkkálmastinvuodastis lea riegeádahtán min ođđasis ja addán midjiide ealli doaivvu go bajásčuoččáldahtii Jesus Kristusa jábmiid luhtte. **1 Biet. 1,3**

*L* Vuostávdádet buressivdnádusa.

Hearrá buressivdnidivččii du ja várjalivččii du.

Hearrá divttášii muođuidis čuovgat du badjelii ja livččii dutnje árbmugas.

Hearrá bajidivččii čalmmiidis du ala ja attášii dutnje ráfi. †

## 22 Sálbma

### **B KREMATORIAS**

Hávdádandoaibma bajábealde (lađđasat 1-13) loahpahuvo muoldasuhppemiin (lađđasat 19-23).

Nubbin vejolašvuhtan sáhtá dán ortnega maddái čuovvut girkus / kapeallas, geahča Dábálaš mearrádušat, 8. čuoggá, s. 205.

## 19 Luitojupmi

## 20 Muoldasuhppen

L Áhči, Bártni ja Bassi Vuoiŋŋa nammii.

Dasto suhppe liturga golmma geardde muoldda gisttu ala ja cealká:

1. geardde: Eatnamis leat don boahtán.
2. geardde: Eanamin don šattat.
3. geardde: Eatnamis don bajásčuožžilat fas.

## 21 Čálasátni ja buressivdnádus

*Jogo A*

L Min Herra Jesus Kristus cealká: Mun lean bajásčuožžileapmi ja eallin. Dat guhte osku munnje, oážžu eallit vaikko vel jápmá ge. Ii oktage guhte eallá ja osku munnje, jáme agálašvuodas ge. **Joh 11, 25-26**

*Dahje B*

L Máidnojuvvon lehkos Ipmil, Herra met Jesus Kristusa Áhčči, guhte stuora árkkálmastinvuodastis lea riegádahtán min oddasis ja addán midjiide ealli doavvu go bajásčuoččáldahtii Jesus Kristusa jábmiid luhtte! **1 Biet. 1,3**

**Morašteaddji jovkui čalmmiid:**

Vuostávdet buressivdnádusa.

Herra buressivdnidivččii du ja várjalivččii du.

Herra divttášii muođuidis čuovgat du badjelii ja livččii dutnje árbmugas.

Herra bajidivččii čalmmiidis du ala ja attášii dutnje ráfi. †

## 22 Sálbma

## 23 Postludia

Lanjain gos luitojupmi ii leat vejolaš, berre gisttu doalvut eret postludia botta.

# ČÁLALOHKOSAT

## Teakstačoakkáldat I

### *Jogo A*

Mun dieđán ahte mu lonisteaddji eallá,  
ja loahpas son boahdá eatnama ala.  
Go mu liiki lea duššaduvvon, ja mu oažži lea nohkan,  
de mun beasan oaidnit Ipmila,  
beasan oaidnit su iežan čalmmiiguin,  
in dego vierrása.  
[Ohcaleapmi loaktá mu!]

*Job 19, 25-27a [27b]*

### *Dahje B*

Herrá lea mu báimman,  
ii mus váillo mihkkege.  
Ruonas gittiide son livvuda mu,  
vuoijñadusa čázi lusa son láide mu.  
Son áhpásmahtá mu sielu.  
Son doalvu mu vánhurskkisvuoda  
bálgáid mielde namas dihtii.  
Vaikko mun vádjolivččen jápminsuoivana leagis,  
de in balaše mange bahás.  
Dasgo don leat mu mielde.  
Du soabbi ja báimmansoabbi jedđejit mu.  
Don ráhkadat munnje beavddi mu  
vašálaččaid čalmmiid ovddas.  
Don vuoiddat mu oaivvi oljjuin,  
mu juhkanlihti golgá badjel.  
Aivvefal buorre vuolta ja árbmugasvuolta galgá  
doarridit mu buot mu eallinbeivviid,  
ja mun beasan ássat Herrá viesus  
guhkes áiggiid čađa.

## Sál 23

### *Dahje C*

Nugo sarvvis goikaluvvá golgi jogaid maŋŋái,  
nu goikaluvvá mu siellu du maŋŋái, Ipmilan.  
Mu siellu goiká Ipmila maŋŋái, ealli Ipmila maŋŋái.  
Goas beasan loaiddastit su muođuid ovdii?  
Mu gatnjalat leat šaddan mu borramuš ijjatbeivviid.  
Geažos beaivvi olbmot dadjet munnje: “Gos lea du Ipmil?”  
Mun golggahan sillon morrašis go muittán dan mii lei,  
go johten stuorra fáru mielde Ipmila vissui  
ávvučuorvasiin ja giitosiin, bassivádjoleddjiid joavkkus.  
Manne don muosehuvat, sillon, manne máraidat  
mu siste? Vuordde Ipmila! Dasgo velá oktii mun  
giittán su, Beastán ja Ipmilan.

### Sál 42, 2-6

### *Dahje D*

Muhto mun bisun álo du luhtte,  
don leat dohppen mu olgeš gieda.

Don láidet mu ráđiinat,  
ja dasto bajidat mu gudnái.

Jos mus leat don almmis, de mun in  
sáva šat maidege eatnama alde.

Jos mu oažži ja váibmu vuoimmehuvvá,  
de Ipmil lea agálaččat mu váimmu bákti ja mu oassi.

### Sál 73, 23-26

### *Dahje E*

Nugo áhčči árkkálmastá mánáidis,

nu Hearrá árkkálmastá sin guđet ballet sus.

Dasgo son diehtá mo mii leat sivdniduvvon,  
son muitá ahte mii leat muolda.

Olbmo beaivvit leat dego suoidni,  
olmmoš lea dego gietti liedđi.

Go bieggá šuviha meattá, de dat jávká,  
báiki gos dat lei ii šat dovdda dan.

Muhto Hearrá árbmugasvuohta lea  
agálašvuođas agálašvuhtii sin oassi guđet ballet sus.

*Sál 103, 13-17*

*Dahje F*

Mun bajidan čalmmiidan váriid guvlui:

Gos boahtá munnje veahkki?

Mu veahkki boahtá Hearrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
son lea Israela goziheaddji.

Hearrá lea du goziheaddji,  
Hearrá lea du suoivvan du olgeš gieda bealde.

Beaivváš ii vahágahte du beaivet iige mánnu ihkku.  
Hearrá várjala du buot bahás, son várjala du heakka.

Hearrá várjala du vuolgima

ja du boahtima dálážiis gitta agálaš áigái.

Sál 121

*Dahje G*

Hearrá don suokkardat mu ja dovddat mu.

Čohkkázanba vai čuččožan, de don dieđát dan,  
don árvidat mu jurdagiid guhkkin juo.

Vácežanba vai veallázan, de don  
oainnát dan, don dovddat buot mu geainnuid.

Hearrá, ovdal go mus lea sátni  
njuokčama alde, de don dieđát dan ollásit.

Maŋábeale ja ovddabealde don birastahtát mu,  
don leat bidjan gieđat mu ala.

Dat lea munnje menddo ovddolaš,  
dat lea ilá allat, mun in árvit dan.

Gosa mun sáhtášin mannat eret du Vuoiŋŋa ovddas?  
Gosa báhtarivččen du muođuid ovddas?

Jos manašin bajás albmái, de don leat doppe,  
jos lážašin vuoiŋŋastansadján jábmiid áibmui, de don leat doppe.

Jos girdilivččen iditroađi soajáiguin  
ja seivvošin ábi olggumus ravdii,  
de doppege du giehta fáhte mu,  
du olgeš giehta doallá mu gitta.

Jos mun dajašin: “Čihkos seavdnjadas mu  
ja šaddos čuovga mu birra idjan”,  
de seavdnjadas ii leat dutnje seavdnjat,

idja lea čuovgat dego beaivi ja seavdnjadas lea dego čuovga.

Suokkar mu, Ipmil, ja dovdda mu váimmu,  
geahččal mu ja dovdda mu ráfehis jurdagiid.

Geahča leango mun bahá geainnu alde,  
ja láide mu agálašvuoda geainnu mielde.

*Sál 139, 1-12.23-24*

### *Dahje H*

Juohke áššái lea mearriduvvon áigi,  
ja muhtun áigi lea juohke dahkui almmi vuolde.

Áigi lea riegádit ja áigi lea jápmit,  
áigi lea gilvit ja áigi bajásgaikut dan, mii lea gilvojuvvon.

Áigi čierut ja áigi boagustit,  
áigi biehkut ja áigi ilu dihtii njuikkodit.

Áigi ohcat ja áigi massit.

Buot lea son dahkan čáppisin dan áigái,  
maiddái agálašvuoda ge lea son bidjan sin váibmui.

Mun diedán, ahte buot, maid Ipmil dahká,  
dat galgá leat agálaččat; ii dasa leat mihkkege lasiheamošin,  
ja ii das leat mihkkege eretváldámuššan.

*Sár girji 3, 1-2.4.6a.11a.14a*

### *Dahje I*

Sion celkkii: "Herrá lea mu guodđán,  
ja Herrá lea vajáldahttán mu".

Vajáldahttágo nisson su njammi mánás,

nu ahte son ii árkkálmastte su heakkas bártni badjelii?

Jos velá sii vajáldahtežetge, de in mun almmatge vajáldahte du.

Geahča, goappešat gieđaidasan lean mun du gova dahkan.

*Jes 49, 14-16a*

*Dahje J*

Herrá árbmugasvuohta ii loahpa,

su ládisvuohta ii goassege noga.

Dat lea ođas juohke idida,

du oskkáldasvuohta lea stuoris.

Mun dajan: Herrá lea mu oassi,

danne mun dorvvastan sutnje.

Herrá lea buorre dasa guhte vuordá su

dasa guhte ohcá su.

Buorre lea jaskatvuodas

vuordit veahki Herrás.

*Vái girji 3, 22-26*



## Teakstačoakkáldat II

### *Jogo A*

Ehpet go dii dieđe ahte mii buohkat geat gásttašuvvuimet Kristus Jesusii gásttašuvvuimet su jápmimii? Mii nappo hávdáduvvuimet suinna go gásttašuvvuimet jápmimii, vai beasašeimmet eallit ođđa eallima, nugo Áhči hearvásuohta bajásčuoččáldahtii Kristusa jábmiid luhtte. Dasgo jus mii leat ovttahttojuvvon suinna go jápmit nugo son, de mii maiddá ovttahttojuvvot suinna go bajásčuoččáldahttojuvvot nugo son. **Rom 6,3-5**

### *Dahje B*

Jus Ipmil lea min beale, gii dalle lea min vuostái? Son guhte ii seastán Bárbnis, muhto attii su min buohkaid ovddas, manne son dalle ii galggaše addit midjiide buot eará ge oktan suinna? Gii sáhtta váidalit sin geaid Ipmil lea välljen? Ii oktage, go Ipmil lea dat guhte cealká sin vanhurskkisin. Gii sáhtta dubmet sin? Ii oktage, go Kristus Jesus lea dat guhte jámii ja velá bajásčuoččáldahttojuvvui ja čohkká Ipmila olgeš gieđa bealde ja rohkadallá min ovddas. Dasgo mun lean vissis das ahte ii jápmin ii ge eallin, eai engelat eai ge eará oaivámuččat, eai dat mat leat dál eai ge dat mat bohtet, dahje miige fámuid, eai dat mat leat badjin eai ge dat mat leat čiekŋalassas, sáhte earuhit min Ipmila ráhkisvuodas Kristusis Jesusis, Hearrásteamet. **Rom 8,31b-35.38-39**

### *Dahje C*

Dasgo ii oktage mis eale iežas várás, ii ge oktage jáme iežas várás. Jos mii eallit, de eallit Hearrá várás, ja jos jápmit, de jápmit Hearrá várás. Jogo mii dal eležat dahje jámežat, de mii gullat Hearrái. Aiddo dan dihtii Kristus jámii ja eallái fas, vai son sáhtášii leat sihke jábmiid ja elliid Hearrá. Muhto don, manne dubmet oskuguoimmát, dahje manne badjelgeahčat oskuguoimmát? Mii han galgat buohkat Ipmila duopmostuolu ovdii, dasgo lea čállojuvvon:

Nu duohta go ealán, cealká Hearrá,  
juohke čibbi sodjala mu ovddas,  
ja juohke njuovčča dovddasta Ipmila.

De juohkehaš mis galgá nappo doallat logu Ipmila ovddas. **Rom 14, 7-12**

### *Dahje D*

Ráhkisvuolta ii noga goassege. Muhto profestastallanattáldagat nohket, gielaiguin sárdnun jávohuvvá, ja diehtu nohká. Dasgo min diehtu lea váilevaš, ja min profestastallan lea váilevaš. Muhto go ollisvuolta boahtá, de jávká dat mii lea váilevaš. Mánnán mun hálle nugo mánná, mus lei máná miella ja máná jurdagat. Muhto go šadden rávisin, de gudden mánálašvuoda. Dál mii oaidnit dego njoadve speadjalis, dego árvádusa, muhto dalle oaidnit oktii čalmmiid. Dál lea áddejupmi

váilevaš, muhto dalle dat lea ollislaš, nugo Ipmil dovdá mu ollásit. De dat bissot, dát golmmas: Osku, doaivu ja ráhkisvuohta. Muhto buot stuorimus dain lea ráhkisvuohta.

**1 Kor 13, 8-13**

### *Dahje E*

Dasgo dat mii lea nohkavaš, ferte gárvvohuvvot nohkameahttunvuođain, ja dat mii lea jámolaš, ferte gárvvohuvvot jápmemeahttunvuođain. Ja go dat mii lea nohkavaš, lea gárvvohuvvon nohkameahttunvuođain, ja dat mii lea jámolaš, lea gárvvohuvvon jápmemeahttunvuođain, dalle ollašuvvá dat sátni mii lea čállojuvvon: Jápmín lea njielastuvvon ja vuitojuvvon. Jápmín, gos lea du seahčagas? Jápmín gos lea du vuoitu? Jápmíma seahčagas lea suddu, ja suttu fápmu lea láhka. Muhto giitu lehkos Ipmilii, gii addá midjiide vuoitu Hearrámet Jesus Kristusa bokte! **1 Kor 15,53-57**

### *Dahje F*

Muhto bissot čielggusin, mii geat gullat beaivái, ja atnot oskku ja ráhkisvuođa ruovdegárvun ja bestojumi doaivaga oaivesuodjin. Dasgo Ipmil ii leat mearridan min šaddat moari vuollái, muhto vuoitit bestojumi Hearrámet Jesus Kristusa bokte. Son jámii min ovddas vai mii, gozedettiin dahje oadedettiin, ealášeimmet suinna. Dan dihtii, arvvosmahttet ja nanosmahttet guhtet guimmiideattet. **1 Tess 5, 8-11a**

### *Dahje G*

De mun oidnen odđa almmi ja odđa eatnama, dasgo ovddit albmi ja ovddit eanan lei nohkan, ii ge mearra lean šat. Ja mu oidnen bassi gávpoga, odđa Jerusalema, njiedjamin almmis, Ipmila luhtte, válmmaštuvvon ja čiŋahuvvon dego moarsi irggis várás. Ja mun gullen truvnnus alla jiena cealkimin: “Geahča, Ipmila orrunsadji lea olbmuid luhtte. Son orru sin searvvis, ja sii leat su álbmot, ja Ipmil ieš lea sin luhtte. Son sihkku eret juohke gatnjala sin čalmmiin, ii ge jápmín leat šat, ii ge moraš ii ge bárgun ii ge giksi. Dasgo dat mii lei ovdal, ii lea šat”. Son guhte čohkká truvnnus, celkkii munnje: “Geahča, mun dagan buot ođasin.” **Alm 21, 1-5a**

## Teakstačokkáldat III

### *Jogo A*

Ávdugasat sii geat leat váivvážat vuoinjasteaset,

dasgo almmiriika lea sin.

Ávdugasat sii geat leat morrašis,

dasgo sii ožžot jeddehusa.

Ávdugasat sii geat leat vuollegaččat

dasgo sii árbejit eatnama.

Ávdugasat sii geain lea vanhurskkisvuoda

nealgi ja goiku, dasgo sii gallehuvvojit.

Ávdugasat sii geat leat váibmoláddásat, dasgo sii ožžot váibmoládisvuoda. Ávdugasat sii geat leat buhttasat váimmus, dasgo sii besset oaidnit Ipmila. Ávdugasat sii geat duddjojtit ráfi, dasgo sii gohčoduvvojtit Ipmila mánnán. Ávdugasat sii geat doarrádallojit vanhurskkisvuoda dihtii, dasgo almmiriika lea sin. Matt 5, 3-10

### *Dahje B*

Go sábbát lei vássán ja vahku vuosttaš beaivi čuvvgodišgodii, de Márjá Magdalena ja nubbi Márjá manaiga geahččat hávddi. Fáhkka šattai garra eatnandoarggástus, dasgo Hearrá engel njeijai almmis, manai hávddi lusa ja fierahii geađggi eret ja čohkánii dan ala. Son lei šearrat dego álddagas, ja biktasat ledje vielgadat dego muohta. Fávttat doarggistedje balus go oidne su, ja gahčče dego jápmán. Muhto engel sárdnugodii nissoniidda: “Alli bala! Mun dieđán ahte doai ohcabeahtti Jesusa, gii russiinávlejuvvui. Son ii leat dás, son lea bajásčuoččáldahttojuvvon, nugo celkkii. Boahtti geahččat báikki gos son veallái! Doapmaleahkki su máhttájeddjiid lusa ja daddji ahte son lea bajásčuožžilan jábmiid luhtte ja manná Galileai din ovdalis; doppe dii oaidnibehtet su. – Dál lean cealkán dan dudnuide.”

Soai doapmaleigga eret hávddi luhtte balus ja stuora ilus, ja viehkaleigga mitalit dan su máhttájeddjiide. Dalle Jesus bođii sudno ovddal ja dearvvahii sudno. Soai manaiga ja fátmasteigga su julggiid ja gopmirdeigga su. Jesus celkkii sudnuide: “Alli bala! Manni mitalit mu vieljaide ahte sii galget mannat Galileai. Doppe sii oidnet mu.”

Matt 28, 1-10

### *Dahje C*

Sii gudde uhca mánážiid Jesusa lusa vai son guoskkahivččii daid, muhto máhttájeddjit šiggo sin. Go Jesus oinnii dan, de moaráhuvai ja celkkii sidjiide: “Diktet uhca mánážiid boahtit mu lusa, allet ge hehte sin”. Dasgo Ipmila riika gullá dakkáraččaide. Duodaidd, mun cealkán didjiide: “Dat guhte ii vuostáiváldde Ipmila

riikka nugo uhca mánáš, ii eisege beasa dan sisa.” Ja son válddii sin sallasis, bijai giedaidis sin ala ja buressivdnidii sin. **Mark 10, 13-16**

### *Dahje D*

Bidjet boahkána ja doalahehket lámppáineattet čuovgga.

Lehket nugo bálvaleaddjit geat vurdet isideaset ruoktot heajain, vai sii sáhtášedje rahpat sutnje uvssa dakkaviđe go son bohtá ja goalkkuha. Ávdugasat dat bálvaleaddjit geaid isit gávdná gohcimin go bohtá! Duođaid mun cealkkán didjiide: Son bidjá boahkána, gohčču sin beavdá ja bálvala sin ieš. Jos son vel bođeš ge easkka nuppe dahje goalmát idjagohcinvuorus ja gávdná sin gárvvisin, de ávdugasat dat bálvaleaddjit. **Luk 12, 35-38**

### *Dahje E*

Jesus cealká:

Duođaid, duođaid, mun cealkkán didjiide: Dat guhte gullá mu sáni ja osku sutnje gii lea vuolggahan mu, sus lea agálaš eallin; son ii bođe dupmui, muhto lea juo mannan jápmimis eallimii. Duođaid, duođaid, mun cealkkán didjiide: Bohtá áigi, ja dat lea dál juo, go jábmit gullet Ipmila Bárti jiena, ja sii geat gullet, ožžot eallit. Dasto nugo Áhčis lea iešalddis eallin, de son lea maiddá suovvan Bárdni ge ahte sus lea iešalddes eallin. Áhčči lea addán sutnje dubmenválldi, danne go son lea Olbmobárdni.

**Joh 5, 24-27**

### *Dahje F*

Buohkat geaid Áhčči addá munnje, bohtet mu lusa, ja dat gii bohtá mu lusa, su in eisege áje eret. Dasgo mun in leat bohtán vuolás almmis dahkat dan maid ieš dáhtun, muhto su dáhtu, gii lea vuolggahan mu. Ja dát lea mu vuolgaheaddji dáhttu, ahte mun in masse ovttaga sis geaid son lea addán munnje, muhto bajásčuoččaldahtán sin mañimuš beavvi. Dasgo dát lea Áhččán dáhttu, ahte juohkehaš guhte oaidná Bárti ja osku sutnje, oážžu agálaš eallima, ja mun bajásčuoččaldahtán su mañimuš beavvi.”

**Joh 6, 37-40**

### *Dahje G*

Mun lean buorre báimman. Mun dovddan sávzzaidan, ja mu sávzzat dovdet mu. Ja mun attán daidda agálaš eallima; dat eai láhppo agálašvuodas ge, ii ge oktage gaikkid daid eret mu giedas. Áhččán, guhte lea addán daid munnje, lea stuorit go buohkat, ii ge oktage sáhte gaikkid eret ovttaga Áhččán giedas. **Joh 10,14.28-29**

### *Dahje H*

Alloset din váimmut suorganehko. Oskot Ipmilii ja oskot munnje! Mu Áhččán viesus leat ollu lanjat. Jos nu ii livčče, de mun cealkkášin didjiide dan. Dasgo mun manan gárvvistit didjiide saji. Ja go mun lean mannan ja lean gárvvistan didjiide saji, de boadán fas ja válldán din lusan, vai dii livččiidet doppe gos mun lean. Ja dii diehtibehtet geainnu dohko gosa mun manan. Duomás dadjá sutnje: “Hearrá, eat mii dieđe gosa don manat. Mo mii de sáhttit diehtit geainnu?” Jesus cealká: “Mun lean geaidnu, duohtavuohhta ja eallin. Ii oktage beasa Áhči lusa earet mu bokte.”

**Joh 14, 1-6**

*Mánáid hávdádeamis adnojuvvojit omd. dát lohkosat, ná álggahettiin:*

**L** Gullot mo Jesus rabasta Ipmila riikka mánáide.

**Čuovvovaš golbma teavstta lohkkovit manjalaga:**

Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: “Diktet uhca mánážiid boahit mu lusa, allet ge hehte sin”. Dasgo Ipmila riika gullá dakkáraččaide. Duodaid, mun cealkkán didjiide: “Dat guhte ii vuostáiváldde Ipmila riikka nugo uhca mánáš, ii eisege beasa dan sisa.” Ja son válldii sin sallasis, bijai gieđaidis sin ala ja buressivdnidii sin.

**Mark 10, 13-16**

Jesus cealká:

Mun lean buorre báimman. Mun dovddan sávzzaidan, ja mu sávzzat dovdet mu. Ja mun attán daidda agálaš eallima; dat eai lámppo agálašvuodas ge, ii ge oktage gaikkít daid eret mu gieđas. Áhččán, guhte lea addán daid munnje, lea stuorit go buohkat, ii ge oktage sáhte gaikkíhit eret ovttage Áhččán gieđas.

**Joh 10,14.28-29**

Hearrá apoasttal cealká:

De mun oidnen odđa almmi ja odđa eatnama, dasgo ovddit albmi ja ovddit eanan lei nohkan, ii ge mearra lean šat. Ja mu oidnen bassi gávpoga, odđa Jerusalema, njiedjamin almmis, Ipmila luhtte, válmmaštuvvon ja čináhuvvon dego moarsi irggis várás. Ja mun gullen truvnnus alla jiena cealkimin: “Geahča, Ipmila orrunsadji lea olbmuid luhtte. Son orru sin searvvis, ja sii leat su álbmot, ja Ipmil ieš lea sin luhtte. Son sihkku eret juohke gatnjala sin čalmmiin, ii ge jápmin leat šat, ii ge moraš ii ge

bárgun ii ge giksi. Dasgo dat mii lei ovdal, ii lea šat”. Son guhte čohkká truvnnus, celkkii munnje: “Geahča, mun dagan buot ođasin.“ Alm 21, 1-5a

Njuoratmánáid dahje mánáid hávdádeamis geat leat jápmán ovdal riegádeami, sáhtta válljet eará teavsttaid go daid mat bajábealde leat namuhuvvon; omd. 39. sálmma, 5-8 dahje 139. sálmma, 1-6.3-18. dahje teavsttaid mat sierraládje ovdanbuktet gillámuša, bákčasa ja dan maid ii sáhte ipmirdit.

Ortnega eará lađđasat adnojit nugo rávis olbmuid hávdádeamis ge.

# ROHKOS GISTTU GUORAS

Rohkos gisttu guoras geavahuvvo go olbmot háliidit dan, ja sáhtta doaimmahuvvot ruovttus, buohcceviesus ja eará institušuvnnain dahje hávdekapeallain/ullahiin.

Rohkosis sáhtta atnit daid lađđasiid mat heivejit buot buoremusat dillái.

Lađđasat +:in berrejit leat mielde.

Jos lea vejolaš, de dábálaš kristtalaš olmmoš jođiha rohkosa.

## +1 Sálbma

### 2 Dearvvuođat

Herrá ráfi lehkos dinguin buohkaiguin.

### +3 Rohkos

Rohkadallot.

Almmálaš Áhčči, mii addit iežamet du gievrras giitii ja giitit du dan ovddas maid don addet su bokte gii dál lea vadjolan eret. Jedde ja nanne sin geat leat morrašis ja ohcaleamis. Veahket min eallit du searvevuodas, vai mii oktii manašeimmet dáppe eret ráfiin, Jesus Kristusa, du Bártni, Hearrámet bokte. Amen.

### +4 Čálalohkan

Gullot Herrá sáni.

Dás lohkkovuođat okta čuovvovaš teavsttain:

*Jogo A*

Herrá lea mu báimman,

ii mus váillo mihkkege.

Ruonas gittiide son livvuda mu,  
vuoijñadusa čázi lusa son láide mu.  
Son áhpásmahtta mu sielu.  
Son doalvu mu vanhurskkisvuoda  
bálgáid mielde namas dihtii.  
Vaikko mun vádjolivččen jápminsuoivana leagis,  
de in balaše mange bahás.  
Dasgo don leat mu mielde.  
Du soabbi ja báimmansoabbi jedđejit mu.  
Don ráhkadat munnje beavddi mu  
vašálaččaid čalmmiid ovddas.  
Don vuoiddat mu oaivvi oljjuin,  
mu juhkanlihti golgá badjel.  
Aivvefal buorre vuoha ja árbmugasvuoha galgá  
doarridit mu buot mu eallinbeivviid,  
ja mun beasan ássat Hearrá viesus  
guhkes áiggiid čađa.

### Sál 23

#### *Dahje B*

Mun bajidan čalmmiidan váriid guvlui:  
Gos boahká munnje veahkki?  
Mu veahkki boahká Hearrás,  
almmi ja eatnama sivdnideaddjis.  
Ii son divtte du juolggi suoibut,  
du goziheaddji ii oadestuva.  
Ii son oadestuva iige nohka,  
son lea Israela goziheaddji.  
Hearrá lea du goziheaddji,  
Hearrá lea du suoivvan du olgeš gieđa bealde.  
Beaivváš ii vahágahte du beaivet iige mánnu ihkku.  
Hearrá várjala du buot bahás, son várjala du heakka.  
Hearrá várjala du vuolgima  
ja du boahtima dálážis gitta agálaš áigái.



## Sál 121

### *Dahje C*

Herrá árbmugasvuohta ii loahpa,  
su ládisvuohta ii goassege noga.  
Dat lea ođas juohke idida,  
du oskkáldasvuohta lea stuoris.  
Mun dajan: Herrá lea mu oassi,  
danne mun dorvvastan sutnje.  
Herrá lea buorre dasa guhte vuordá su  
dasa guhte ohcá su.  
Buorre lea jaskatvuođas  
vuordit veahki Herrás.

Váid 3,22-26

### *Dahje D*

Min Herrámet Jesus Kristus cealká:

Alloset din váimmut suorganehko. Oskot Ipmilii ja oskot munnje!

Mu Áhččán viesus leat ollu lanjat. Jos nu ii livčče, de mun cealkkášin didjiide dan. Dasgo mun manan gárvvistit didjiide saji. Ja go mun lean mannan ja lean gárvvistan didjiide saji, de boadán fas ja válddán din lusan, vai dii livččiidet doppe gos mun lean. Ja dii diehtibehtet geainnu dohko gosa mun manan."

Duomás dadjá sutnje: "Herrá, eat mii dieđe gosa don manažat. Mo mii de sáhttit diehtit geainnu?" Jesus cealká: "Mun lean geaidnu, duohtavuohta ja eallin. Ii oktage beasa Áhči lusa earet mu bokte.

Joh 14,1-6

### *Dahje E*

Herrá apoasttal cealká:

Ipmil Áhččámet jedđe min buot min átestusain dainna jeddehusain man mii ieža leat ožžon Ipmilis vai mii gis sáhtášeimmet jeddet sin geat leat buot lágán átestusain. Dasgo nugo mii leat valljougasat ožžon oasi Kristusa gillámušain, nu mii maiddái oažžut valljugasat dan jeddehusa man Kristus addá. Jos mii átestuvvat, de dat šaddá didjiide jeddehussan ja bestojupmin. Jos mii jeddejuvvot, de dalle maiddái dii ge jeddejuvvobehtet ja nanusmuvvabehtet gierdat daid seammá gillámušaid maid mii ge fertet gillát. Mii luohhtit nannosit didjiide, dasgo mii diehtit ahte nugo dis lea oassi gillámušas, nu dis lea maiddái oassi jeddehusas.

2 Kor 1,4-7

### *Dahje F*

Mii han diehtit ahte jos min eatnanlaš viessu, min goahti, gaikkoduvvo ge, de mis lea almmis viessu mii boahťá Ipmilis, agálaš viessu, mii ii leat huksejuvvon giedaiguin. Dáppe ealedettiineamet mii šuoħkkít ja áibbašít gárvvohuvvot almmálaš viesuineamet. Dasgo go mii leat gárvvohuvvon dainna, de eat leat šat álás. Nu guhká go mii ássat dan goađis, mii šuoħkkít váivvisteamet. Eat mii dáhto nuolahuvvot, muhto baicca gárvvohuvvot vai eallin njielašii dan mii lea jámolaš. Aiddo dán várás Ipmil lea gárvvistan min ja dáhkádussan son lea addán midjiide Vuoiŋŋa. Dan dihtii mii leat álo dorvvolaččat, vaikko diehtit ge ahte mii eat leat Hearrá luhtte nu guhká go min ruoktu lea rumaš. Dasgo mii vádjolit oskkus, oainnekeahtá.

*2 Kor 5,1-7*

## **5 Oanehis sárdni**

### **+6 Hearrá rohkos**

Rohkadallot Hearrá rohkosa.

#### *Jogo*

*Buo* Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddáí eatnama alde.

Atte midjiide odne min beaivválaš láibbi.

Atte midjiide min suddid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

#### *Dahje*

*Buo* Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## **7 Buressivdnáduš**

Hearrámet Jesus Kristusa árbmu, Ipmila ráhkisvuolta ja Bassi Vuoiŋŋa servvolašvuolta lehkos dinguin/minguin buohkaiguin.

## **8 Sálbma**

# RUOVTTU BURESSIVDNIDEAPMI

1 Dán liturgiija sáhtta geavahit go olbmot sihtet báhpa boahit vihahit ođđa viesu/ruovttu.

2 Jos báhppa bivdojuvvo boahit gullodahkes vissui dahje eará sivaiddihtii, de sáhtta maiddái geavahit dán liturgiija. Lea dehálaš ahte báhppa dalle diktá viesu olbmuid muitalit maid sii leat oaidnán dahje muosáhan viesus. Son berre maiddái čohkket viesu olbmuid dohko gos sii leat oaidnán dahje muosáhan juoidá. Sáhtta maiddái doallat rohkosa dan báikkis.

## 1 Sálbma

## 2 Álggaheapmi

Báhppa cealká:

*Jogo A*

Árbmu lehkos dinguin ja ráfi Ipmilis, Áhčisteamet, ja Hearrás Jesus Kristusis.

*Dahje B*

Áhči ja Bártne ja Bassi Vuoiŋŋa nammii.

Dasto joatká:

Ipmila sátni ja rohkos basuha buot. Dat guoská maiddái ruktui. Ruoktu lea Ipmila buorre attáldat. Mii áigut dál bidjat dán viesu ja din buohkaid Ipmila háldui vai dii beasašeiddet orrut dás ráfis ja soabalašvuodas.

Mii muitit Hearrá sániid: Gos guovttis dahje golmmas leat čoagganan mu nammii, doppe mun lean sin gasku.

*Matt 18, 20*

Báhppa sáhtta dás lasihit muhtun sániid ođđa ruovttu birra dahje ruovttu dili birra.

## 3 Čálalohkan

Báhppa lohka ovttá dáin teakstačoakkáldagain:

Gullot Ipmila sáni ruovttu ja kristtalaš eallima birra:

### *Jogo A*

Jesus bodii Jerikoi ja manai gávppoga čađa. Doppe lei olmmái gean namma lei Sakkeus; son lei tuolláriid oaivámuš ja hui rikkis. Son háliidii sakka oaidnit makkár olmmoš Jesus lea, muhto lei uhcci šattus iige beassan su lahka olbmuid dihtii. De son viegai ovddabeallái ja gavccui muhtun meahccefiikkonmurrui vai beasašii oaidnit Jesusa, muhtun báikkis gokko Jesus lei mannamin meattá. Ja go Jesus bodii dohko, de geahčastii bajás ja celkkii sutnje: "Sakkeus, doama vuolás! Dasgo odne mun áiggun boahtit du dálloi." Sakkeus doapmalii vuolás ja vuostáiválddii su iluin. Muhto buohkat geat oidne dan, nimmoredje ja dadje: "Son manná guossin suddolaš olbmá dálloi!" Muhto Sakkeus loaiddastii ovdan ja dajai Hearrái: "Hearrá, beali opmodagastan áiggun addit gefiide, ja jos leaččan váldán geasge ruđaid vearrivuodain, de attán daid fas sutnje njealjegeardásaččat." Jesus celkkii sutnje: "Odne lea bestojupmi bohtán dán vissui. Dasgo songe lea Abrahama bárdni, ja Olbmobárdni lea bohtán oheat dan gii lea láhpon ja beastit su." Luk 19,1-10

### *Dahje B*

Vádjolettiin Jesus bodii muhtun gillái, gos Mártá-nammasaš nisu vuostáiválddii su ruovttustis. Márttas lei oabbá gean namma lei Márjá; son čohkánii Hearrá julggiid ovdii ja guldalii su sániid. Muhto Mártá lei doaimmas buot bargguiguin bálvalan dihtii gussiid. Son bodii sudno lusa ja dajai: "Hearrá, itgo beroš go mu oabbá diktá mu okto buot bargat? Daja sutnje ahte galgá veahkehit mu." Muhto Hearrá vástidii sutnje: "Mártá, Mártá! Don muosehuvat ja ražat nu mánggain áššiin. Muhto goit okta lea dárbbášlaš. Márjá lea välljen buori oasi, ja dat ii váldojuvvo sus eret."

Luk 10,38-42

### *Dahje C*

Go dii lehpit Ipmila välljejuvvon, bassi ja ráhkistuvvon olbmot, de gárvodehket dan dihtii njuoras árkkálmastinvuoda, buorre vuoda, ustitlašvuoda, vuollegašvuoda ja gierdavašvuoda, nu ahte dii gierdabehtet guhtet guimmiideattet ja addibehtet ándagassii guhtet guoibmáseattet, jos nuppis leš váidámuš nuppi vuostái. Nugo Hearrá lea addán ándagassii didjiide, nu galgabehtet dii ge addit ándagassii guhtet guoibmáseattet.

Diktet Kristusa sáni orrut valljugasat din gaskkas. Oahpahehket ja cuigejehket guhtet guimmiideattet buot viissisvuodain. Lávlot Ipmilii giitevaš váimmus sálmmaid, giittuslávlagiid ja vuoinjalaš lávlagiid. Buot maid dii dahkabehtet, sániin dahje daguin, dahket dan Hearrá Jesusa nammii giittedettiin Ipmil Áhči su bokte.

Kol 3,12-13.16-17

Jos báhppa lea bivdojuvvon boahit vissui gos gullojit balddonasat dahje eará sivaid dihtii, de sáhtta lohkat maiddái Sál 121, Matt 28,18-20, Joh 14,1.14.27 dahje Kol 1,15-20 bajábealde namuhuvvon teavsttaid lassin.

### *Jogo*

Mun bajidan čalmmiidan váriid guvlui:

Gos boahotá munnje veahkki?

Mu veahkki boahotá Hearrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
son lea Israela goziheaddji.

Hearrá lea du goziheaddji,

Hearrá lea du suoivvan du olgeš gieda bealde.

Beaivváš ii vahágahte du beaivet iige mánnu ihkku.

Hearrá várjala du buot bahás, son várjala du heakka.

Hearrá várjala du vuolgima

ja du boahtima dálážis gitta agálaš áigái.

**Sál 121**

### *Dahje*

Jesus loaiddastii sin ovdii ja sártnui sidjiide: "Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lea gohččon din doallat. Ja geahča, mun lea dinguin buot beivviid gitta dálá máilmmi loahpa rádjai".

**Matt 28, 18-20**

### *Dahje*

Alloset din váimmut suorganehko. Oskot Ipmilii ja oskot munnje. Jos dii átnubehtet juoidá mu nammii, de mun dagan dan.

Ráfi mun guođán didjiide, ráfán attán didjiide, in fal dan láhkai go máilbmi addá ráfi. Alloset din váimmut suorganehko, alletge váivašuva dorvvuhisvuodas.

**Joh 14, 1, 14 ja 27**

### *Dahje*

Son lea oaidnemeahttun Ipmila govva,  
vuosttašriegádeaddji, gii lea ovdal buot sivdnádusa.

Dasgo su siste sivdniduvvui buot,  
buot mii lea almmis ja eatnama alde,  
oinnolaš ja oaidnemeahttun,  
truvnnut ja hearrávuodát,  
oaivámuččat ja fámut -  
buot lea sivdniduvvon su bokte ja su várás.

Son lea ovdal buot,  
ja buot bissu su siste.

Son lea rupmaša oaivi, ja su rumaš lea girku.  
Son lea álgu, vuosttašriegádeaddji jábmiid gaskkas,  
vai son juohke dáfus livččii vuosttamuš.

Dasgo su siste Ipmil dáhtui  
orrut oppa dievasvuodainis,  
ja su bokte soabahit buot sivdnádusa iežainis,  
buot mii lea eatnama alde ja almmis,  
go son varainis ruossa alde dagai ráfi.

Kol 1, 15-20

## **4 Sálbma**

Omd. "Min nana ladni Ipmil lea", "Herrá, min dál buressivdnit", "Vuoimmálaš Kristus", "Du háldui, ráhkis Áhčážan" dahje "Buorre Ipmilan, giittán ruovttustan".

## **5 Oanehis sárdni**

Áinnas lohkkjuvvon teavstta(id) oktavuodas.

"Biehttaleapmi ja osku" sáhtta čuovvut sárdni maŋŋil.

## 6 Rohkos

*Báhppa:*

Rohkadallot:

Ipmil Áhččámet, mii giitit du dán ruovttu ovddas ja rohkadallat: Váldde dán ruovttu árpmolaš ja fámoláš háldosat. Atte sidjiide guđet orrot dás, dearvvašvuoda ja návccaid atnit guhtet guimmiineaset fuola ja doarjut ja movttáskahttit earáid. Leage sin luhtte sihke miehtegiedageavadis ja vuostegiedageavadis.

Illudahte sin, jedđe sin morrašis ja atte sidjiide oskku ja dorvvu, nu ahte sii vuostáiváldet juohke beaivvi oadjebasvuodain ja ilolaš vuordámušaiuin.

Divtte ráhkisvuodát ja ráfát báidnit dán ruovttu, nu ahte buohkat guđet fitnet dáppe, fuomášit dan. Ale divtte maidege baháid ruohtasmuvvat sin gaskii dahje vahágahttit sin.

Buressivdnit dán ruovttu, sin guđet orrot dás ja sin guđet mannet dás sisa ja olggos. Áhči ja Bártni ja Bassi Vuoiŋŋa nammii. Amen.

**Báhppa sáhttá dán rohkosa sadjái rohkadallat friddja rohkosa mii lea heivehuvvon dillái.**

**De čuovvu:**

*Jogo*

Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min sudduid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

*Dahje*

Áhčči min, don guhte leat almmis!



Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ja ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## 7 Hearrá buressivdnáduš

*Báhppa:*

Vuostáiváldet Hearrá buressivdnádusa.

**Olbmot čuožžilit.**

*Báhppa:*

Hearrá buressivdnidivččii du ja várjalivččii du.

Hearrá divttášii muođuidis čuovgat du badjelii ja livččii dutnje árbmugas.

Hearrá bajdivččii čalmmiidis du ala ja attášii dutnje ráfi. Amen. †

## 8 Sálbma